

Namo tassa bhagavato arahato sammāsambuddhassa

Saṃyuttanikāye

Salāyatanavaggaṭikā

1. Salāyatanaṣaṃyuttaṃ

1. Aniccavaggo

1. Ajjhattāniccasuttavaṇṇanā

1. Cakkhatīti **cakkhu**, ñāṇaṃ, yathāsabhāvato ārammaṇassa jānanena samavisamaṃ ācikkhantaṃ viya pavattatīti attho. Tathā maṃsacakkhu. Tampi hi rūpadassane cakkhatīti **cakkhu**. Buddhānaṃyeva cakkhūti **buddhacakkhu**, asādhāraṇato hi sattasantānesu sassatucchedadīṭṭhi anulomikañāyayathābhūtañāṇānañceva kāmarāgānusaṃyādīnañca yāthāvato vibhāvitañāṇaṃ āsayānusaṃyāñāṇaṃ indriyaparopariyattañāṇaṇca. Heṭṭhimā tayo maggā catusaccadhammesu vuttākārena pavattiyā dhamme cakkhūti **dhammacakkhu**, tathā tesam phalāni taṃtaṃpaṭipakkhesu paṭippassaddhipahānavasena pavattanato. Samantato sabbadhammesu cakkhukiccasādhanato **samantacakkhu**, sabbaññutañāṇaṃ. Dibbavihārasannissayena laddhabbato devānaṃ dibbacakkhu viyāti taṃ **dibbacakkhu**, abhiññāviseso. Ālokaṃ vaḍḍhetvā rūpadassanato “**ālokapharaṇenā**”ti vuttaṃ. “Idaṃ dukkhaṃ ariyasaccanti me, bhikkhave, pubbe ananussutesu dhammesu cakkhum udapādī”tiādīnā (saṃ. ni. 5.1081; mahāva. 15) nayena āgatattā catusaccaparicchedakañāṇaṃ “paññācakkhū”ti vuttaṃ. Tadidaṃ “vipassanāñāṇa”nti vadanti, “vipassanāmaggaḥalappaccavekkhañāñāṇā”ti apare.

Paccayabhūtehi etehi abhisambhāriyanti sambhārā, upatthambhabhūtā catusamuṭṭhānikarūpā. Saha sambhārehīti **sasambhāraṃ**. Mahābhūtānaṃ upādāya pasīdatīti **pasādo**. **Akkhikūpake akkhipaṭalehīti** ubhoḥi akkhidalehi. **Sambhavoti** āpodhātumeva sambhavabhūtamaḥa. Idha “**terasa sambhārā**”ti vuttaṃ. **Aṭṭhasālīniyaṃ** (dha. sa. aṭṭha. 596) pana saṅghānena saddhiṃ “cuddasa sambhārā”ti āgataṃ. Tattha **saṅghānanti** vaṇṇāyatanaṃeva parimaṇḍalādīsaṅghānabhūtaṃ. Visuṃ vacanaṃ pana nesam tathābhūtānaṃ atathābhūtānañca āpodhātuvaṇṇāyatanaṃ yathāvutte maṃsapiṇḍe vijjamaṇattā. Sambhavassa catudhātunissitehi saha vuttassa dhātuttayanissitatā yojetabbā. **Dīṭṭhimaṇḍaleti** abhimukhaṃ ṭhitānaṃ paṭibimbapaññāyanaṭṭhānabhūte cakkhusaññitāya dīṭṭhiyā pavattīṭṭhānabhūte maṇḍale. **Sanniviṭṭhanti** etena cakkhupasādassa anekakalāpagatabhāvo dassito. Tathā hi so satta akkhipaṭalāni abhibyāpetvā vattati. Yasmā so satta akkhipaṭalāni byāpetvā ṭhitehi attano nissayabhūtehi katūpakāraṃ taṃnissiteheva āyuvaṇṇādīhi anupālitaparivāritaṃ tisantatirūpasamuṭṭhāpakehi utucittāharehi upatthambhiyamānaṃ hutvā tiṭṭhati. **Rūpadassanasamatthanti** attānaṃ nissāya pavattaviññāṇassa vasena rūpāyatanaḍḍassanasamattham. **Vitthārakathāti** tassa cakkhuno sotādīnañca hetupaccayādivasena ceva lakkhaṇādivasena ca vitthārakathā.

Sammasanacāraccittanti vipassanāya pavattīṭṭhānabhūtaṃ vipassitabbaṃ cittaṃ. Keci “vipassanupagatakiriyaṃyacitta”nti vadanti, taṃ tesam matimattaṃ. Tīṇi lakkhaṇāni dassetvā vipassanaṃ ussukkāpetvā arahattassa pāpanavasena desanāya pavattattā.

Ajjhattāniccasuttavaṇṇanā niṭṭhitā.

2-3. Ajjhattadukkkhasuttādivaṇṇanā

2-3. **Dve lakkhaṇānī**ti dukkhānattalakkhaṇāni. **Ekam lakkhaṇanti** anattalakkhaṇam. **Sesānī**ti vuttāvasesāni lakkhaṇāni. **Tehī**ti yehi dutiyatatiyāni suttāni desitāni, tehi. **Sallakkhitānī**ti sammadeva upadhāritāni. **Ettakenā**ti dvinnam ekasseva vā lakkhaṇassa kathanena.

Ajjhattadukkkhasuttādivaṇṇanā niṭṭhitā.

4-6. Bāhirāniccasuttādivaṇṇanā

4-6. **Vuttasadisovā**ti “dve lakkhaṇānī”tiādīnā vuttasadisō eva. **Nayoti** atidesanayo.

Bāhirāniccasuttādivaṇṇanā niṭṭhitā.

7-12. Ajjhānīcātītānāgatasuttādivaṇṇanā

7-12. **Sallakkhetvā**ti atītānāgatānaṃ avijjamānattā gāhassa daḷhatāya sallakkhetvā. **Paccuppannesu** vijjamānattā balavatā taṇhādīgāhena vipassanāvīthiṃ paṭipādetuṃ **kilamantānaṃ** vineyyānaṃ **vasena**.

Ajjhānīcātītānāgatasuttādivaṇṇanā niṭṭhitā.

Aniccavaggavaṇṇanā niṭṭhitā.

2. Yamakavaggo

1-4. Paṭhamapubbesambodhasuttādivaṇṇanā

13-16. Dvīsupi suttesu āyatanānaṃ vasena desanā ekarasāvāti “**paṭhamadutiyesū**”ti ekajjhaṃ paduddhāro kato. Āhito ahaṃmāno etthāti attā, attabhāvo. Attānamadhi ajjhattaṃ, tappariyāpannattā tatha bhavāni ajjhattikāni, tesam **ajjhattikānaṃ**. Ajjhattañca nāma ajjhattajjhattaṃ, niyakajjhattaṃ, gocarajjhattaṃ, visayajjhattanti catubbidhaṃ. Tatha ajjhattajjhattaṃ ajjhatte bhavanti ajjhattikanti āha “**ajjhattajjhattavasena ajjhattikāna**”nti. Tesam cakkhādīnaṃ ajjhattesupi ajjhattikabhāvo adhikasinehavatthutāyāti āha “**chandarāgassa adhimattabalavatāyā**”ti. Idāni tatha tamatthaṃ paṭiyoginā saddhiṃ udāharaṇavasena dassento “**manussānaṃ hī**”tiādīmāha. Taṃ uttānameva. **Bāhirānī**ti ajjhattikato bahi bhavāni.

Paṭhamapubbesambodhasuttādivaṇṇanā niṭṭhitā.

5-6. Paṭhamanoceassādasuttādivaṇṇanā

17-18. **Nikkhantā**ti lokato nikkhantā. Visamyuttā saṃyogahetūnaṃ kilesānaṃ pahīnattā **no saṃyuttā**. **No adhimuttā**ti na ussukkajātā. **Vimariyādī...pe... cetasāti** vigatakilesavaṭṭamariyādatāya nimmariyādikatena cittaena. **Catusaccameva kathitaṃ** cakkhādīnaṃ assādādino kathitattā.

Paṭhamanoceassādasuttādivaṇṇanā niṭṭhitā.

7-10. Paṭhamābhinandasuttādivaṇṇanā

19-22. **Vaṭṭavivaṭṭameva kathitaṃ** abhinandanānaṃ uppādanīrodhānañca vasena desanāya

pavattattā. **Anupubbakathā**ti ādito paṭṭhāya padatthavaṇṇanā. **Nesanti** suttānaṃ.

Paṭhamābhinandasuttādivaṇṇanā niṭṭhitā.

Yamakavaggavaṇṇanā niṭṭhitā.

3. Sabbavaggo

1. Sabbasuttavaṇṇanā

23. Sabba-saddo pakaraṇavasena katthaci sappadesepi pavattatīti tato nivattanatthaṃ anavasesavisayena sabba-saddena visesetvā vuttaṃ “**sabbasabba**”nti, sabbameva hutvā sabbanti attho. Āyatanabhāvaṃ sabbam **āyatanasabbam**, sesadvayepi eseva nayo.

Tassa avisayābhāvato **na addiṭṭhamidhatthi kiñcīti**. **Idhā**ti nipātamattaṃ, idha vā sadevake loke, dassanabhūtena ñāṇena adiṭṭhaṃ nāma kiñci natthīti attho. Yadi evaṃ anumānavisayaṃ nu kho kathanti āha “**atho aviññāta**”nti. Aññesaṃ apaccakkhampi aviññātaṃ tassa kiñci natthīti adiṭṭhaṃ aviññātaṃ natthi. Paccuppannaṃ atīameva ñeyyaṃ gahitaṃ, anāgataṃ nu kho kathanti āha – “**ajānitabba**”nti, tassa kiñci natthīti ānetvā sambandho. Jānituṃ ñātuṃ asakkuṇeyyaṃ nāma tassa kiñci natthīti dassento āha “**sabbam abhiññāsī**”tiādi.

Sakalassa sakkāyadhammassa pariggahitattā **sakkāyasabbam**. **Sabbadhammesū**ti pañcannaṃ dvārānaṃ ārammaṇabhūtesu sabbesu dhammesu. Yasmā chasupi ārammaṇesu gahītesu padesasabbam nāma na hoti, tasmā “**pañcārammaṇamatta**”nti vuttaṃ. Padesasabbam sakkāyasabbam na pāpuṇāti tassa tebhūmakadhammesu ekadesassa asaṅgaṇhanato. Sakkāyasabbam āyatanasabbam na pāpuṇāti lokuttaradhammānaṃ asaṅgaṇhanato. Āyatanasabbam sabbasabbam na pāpuṇāti. Yasmā āyatanasabbena catubhūmakadhammāva pariggahitā, na lakkhaṇapaññattiyo, yasmā sabbasabbam dassentena buddhañāṇavisayo dassito, tasmā “sabbasabbam na pāpuṇāti”ti etthāpi “**kasmā...pe... natthitāyā**”ti sabbam ñātārammaṇeneva pucchāvissajjanaṃ kataṃ. “Āyatanasabbepi idha vipassanupagadhammāva gahetabbā abhiññeyyaniddesavasenapi sammasanacārasseva icchitattā”ti vadanti.

Paṭikkhipitvāti “idaṃ sabbam nāma na hotī”ti evaṃ paṭikkhipitvā. **Tassā**ti “aññaṃ sabbam paññāpessāmī”ti vadantassa. **Vācāya vattabbavatthumattakamevā**ti vañjhāputtagaganakusumādivācā viya etassa vācāya kevalaṃ vattabbavatthukameva bhavēyya, na attho, vacanamattakamevāti attho. **Atikkamitvā**ti anāmasitvā aggahetvā. **Taṃ kissa hetū**ti vighātāpajjanaṃ kena hetunā. **Yathā taṃ avisayasminti** yathā aññopi koci avisaye vāyamanto, evanti attho. Aṭṭhakathāyaṃ pana yasmā pāliyaṃ “taṃ kissa hetū”ti vuttakāraṇameva upanāyanaṃ upanāyanaṃ dassetuṃ “**yathā ta**”ntiādi vuttaṃ. Kāraṇopanāyanañca kāraṇamevāti “**yathāti kāraṇavacana**”nti vuttanti daṭṭhabbaṃ. Tenevāha “**evaṃ imasmimpi avisaye**”tiādi.

Sabbasuttavaṇṇanā niṭṭhitā.

2. Pahānasuttavaṇṇanā

24. **Sabbassā**ti dvārārammaṇehi saddhiṃ dvārappavattassa. **Pahānāyā**ti tappaṭibaddhachandarāgapahānavasena pajahanāya. **Cakkhusamphassanti** cakkhusannissitaphassaṃ. **Mūlapaccayanti** mūlabhūtaṃ paccayaṃ katvā, sahaṃjāavedanāya cakkhusamphassapaccayabhāve vattabbameva natthi. **Eseva nayoti** apadesena “sotasamphassaṃ mūlapaccayaṃ katvā”tiādinā vattabbanti dasseti. **Manoti** bhavaṅgacittaṃ manodvārassa adhippetattā. **Ārammaṇanti**

dhammārammaṇaṃ. **Sahāvajjanakajavananti** sahamanodvārāvajjanakaṃ javanaṃ. Taṃpubbakattā manoviññāphassavedanānaṃ mūlapaccayabhūtā sabbesveva cakkhudvārādīsu vuttittā tadanurūpato “**bhavaṅgasahajāto samphasso**”ti vuttaṃ. **Sahāvajjanavedanāya javanavedanā** “vedayita”nti adhippetā, **bhavaṅgasampayuttāya pana** vedanāya gahaṇe **vattabbameva natthi**. **Bhavaṅgato amocetvā** bhavaṅgacittena saddhimyeva āvajjanaṃ gahetvā manodvārāvajjanaṃ **bhavaṅgaṃ datṭhabbaṃ**. **Yā panettha desanāti** yā ettha “pahānāyā”tiādīnā pavattadesanā satthu anasiṭṭhi āṇā. **Ayaṃ paṇṇatti nāma** tassa tassa atthassa pakārato ñāpanato. Ettha sabbaggaṇaṇena sabbe sabhāvadhammā gahitā, paññatti pana katamāti vicāraṇāya taṃ dassetuṃ “**yā panetthā**”tiādī vuttanti datṭhabbaṃ.

Pahānasuttavaṇṇanā niṭṭhitā.

3. Abhiññāpariññāpahānasuttavaṇṇanā

25. Abhiññāti abhiññāya. Ya-kāralopavasenāyaṃ niddeso “sayam abhiññā”tiādīsu (dī. ni. 1.28, 405; ma. ni. 1.154) viya, tathā “pariññā”ti etthāpi. **Sabbanti** āyatanasabbaṃ. Tañhi abhiññeyyaṃ. **Abhijānitvāti** abhiññāya jānitvā. **Parijānitvāti** tīraṇapariññāya aniccādito parijānitvā. **Pajahanatthāyāti** pahānapariññāya anavasesato pajahanāya.

Abhiññāpariññāpahānasuttavaṇṇanā niṭṭhitā.

4. Paṭhamaaparijānanasuttavaṇṇanā

26. “Abhijāna”ntiādīnā ettha bhagavā paṭhamaṃ kaṇhapakkhaṃ dassetvā sukkapakkaṃ dasseti veneyyajjhāsayavasena. Tenettha vaṭṭavivaṭṭaṃ kathitaṃ.

Paṭhamaaparijānanasuttavaṇṇanā niṭṭhitā.

5. Dutyaaparijānanasuttavaṇṇanā

27. Cakkhuviññānaviññātabbadhammo nāma rūpāyatanaevāti āha “**heṭṭhā gahitarūpamevā**”ti. **Idha anāpāthagataṃ** “cakkhuviññānaviññātabbā dhammā”ti vuttattā. **Heṭṭhā apāthagatampi anāpāthagatampi gahitameva** “ye ca rūpā”ti anavasesato vuttattā. **Te hi** vedanāsaññāsankhārakkhandhā **saha cakkhuviññāṇena viññātabbattā**. Tathā hi cakkhuviññāṇaṃ tehi ekuppādaṃ ekavatthukaṃ ekanirodhaṃ ekārammaṇameva. **Sesapadesūti** sesesu “yañca sotaṃ ye ca saddā”tiādīnā āgatesu kaṇhapakkhe pañcasu, sukkapakkaṃ chasupi padesu. **Eseva nayoti** yvāyaṃ “heṭṭhā gahitarūpameva gaṇhitvā”ti attho vutto. Eso eva tatthapi atthavaṇṇanāyayo.

Dutyaaparijānanasuttavaṇṇanā niṭṭhitā.

6. Ādittasuttavaṇṇanā

28. Gayānāmikāya nadiyā avidūre pavatto gāmo gayā nāma, tassaṃ **gayāyaṃ viharatīti** samīpatthe cetam bhumavacanaṃ. Gayāgāmassa hi āsanne gayāsīsanāmake piṭṭhipāsāṇe bhagavā tadā vihāsī. Tenāha “**bhagavā tattha viharatī**”ti.

Tatrāti “bhikkhū āmantesī”ti ye bhikkhū āmantesi, yathā cāyaṃ desanā tesam sappāyā jātā, tatra tasmim atthadvaye vibhāvetabbe **ayaṃ anupubbikathā** samudāgamato paṭṭhāya anupaṭipāṭikathā. **Itoti** imasmā kappato. **Kirāti** anussavanatthe nipāto. Pāramitāparibhāvanāya **paripākagate**. **Ñāṇeti** bodhiñāṇe. **Kaniṭṭhaputto** vemātikabhātā bhagavato. **Veḷubhittikuṭikāhi parikkhipitvā** bahiddhā, anto

pana paṭasāṇīhi.

Sabbesaṃ sattānaṃ. **Puññacetanaṃ anto** abbhantare **paveseti**. Bhagavāpi tassa puttoti katvā “**aññe tayo puttā**”ti vuttaṃ. **Avippakiritvā**ti parājayena avippakiriya apalāyivā. **Pidahīti** dātuṃ na sakkomīti tathā akāsi. **Saccavāditāya gaṇhimsūti** rājakulassa saccavāditāya attano varam gaṇhimsu.

Vinivattitunti paṭiññāya nivattituṃ. **Antarāti** tumhehi paricchinnakālassa antarā eva matā. Aṭṭhavīsatihatthāṭṭhānaṃ **usabhaṃ** nāma. **Usabhe** aṭṭhavīsatihatthappamāṇe ṭhāne. **Dānage byāvaṭoti** pasuto.

Soti bhagavā. Tathārūpañhi buddhānaṃ desanāpāṭihāriyaṃ, yathā desanāya gahito attho paccakkhato vibhūto hutvā upaṭṭhāti. Tenāha “**imesaṃ...pe... desessāmi**”ti. **Sanniṭṭhānanti** cirakālaparicitāaggikānaṃ ādittapariyāyadesanāva sappāyāti nicchayamakāsi. **Padittanti** padīpitaṃ ekādasahi aggīhi ekajālībhūtaṃ. Tenāha “**sampajjalita**”nti. **Dukkhalakkaṇaṃ kathitaṃ** cakkhādīnaṃ ekādasahi aggīhi ādittabhāvena dukkhamatāya dukkhassa kathitattā.

Ādittasuttavaṇṇanā niṭṭhitā.

7. Addhabhūtasuttavaṇṇanā

29. Adhisaddena samānattho addhasaddoti āha “**addhabhūtanti adhibhūta**”ntiādi. Sesam vuttanayameva.

Addhabhūtasuttavaṇṇanā niṭṭhitā.

8. Samugghātasārūppasuttavaṇṇanā

30. Maññitaṃ nāma taṇhāmānadiṭṭhīhi gahetabbaṃ maññitaṃ. Sabbasmiṃ maññitanti sabbamaññitaṃ, tassa samugghāto setughāto, tadāvahaṃ **sabbamaññitasamugghātasārūppaṃ**. Aṭṭhakathāyaṃ pana “maññitaṃ nāma cakkhādīsu eva uppajjati, nāññasmi”nti dutiyanayo vutto. **Anucchavikanti** anurūpaṃ avilomaṃ. **Idhāti** idheva sāsane aññattha tadabhāvato. “Taṇhā-mānadiṭṭhimaññitāna”nti vuttaṃ maññitattayaṃ saparasantānesu paṭipakkhavasena yojtvā dassetuṃ “**cakkhuṃ ahanti vā**”tiādi vuttaṃ. Tattha “cakkhuṃ aha”nti iminā ajjhattavisayaṃ diṭṭhimaññitāna dasseti attābhinivesāhaṃkāradīpanato. “Mama”nti iminā taṇhāmaññitaṃ mānamaññitampi vā, pariggahamukhenapi seyyādito mānuppajjanato. Sesapadadvayepi iminā nayena maññitavibhāgo veditabbo. **Ahanti** attāva, so ca cakkhusmiṃ tadadhīnavuttittā “paro”ti na maññati. **Mama kiñcanapalibodho cakkhusmiṃ** sati labbhanato, asati na maññati tathāmaññitassa paccayaghātato. Sesapadadvayepi eseva nayo.

Ahaṃ cakkhuto niggatoti “aha”nti vattabbo ayaṃ satto cakkhuto niggato tattha sukhumākārena upalabbhanato. **Mama kiñcanapalibodho cakkhuto niggato** tasmim sati eva upalabbhanato. Sesadvayepi eseva nayo. Tattha **paroti** paro satto. **Mama cakkhūti na maññati** yassa taṃ cakkhu, tassa “aha”nti vattabbasseva abhāvato. **Mamattabhūtanti** mama kāraṇaṃ. Sesam uttānameva. Evametasmim sutte cakkhurūpa-cakkhuvīññāṇa-cakkhusamphassa-sukhadukkhādukkhamasukhavasena satta vārā cakkhudvāre, tathā sotadvārādīsūti cha satta kā dvecattālīsa. Puna sakkāyavasena “sabbaṃ na maññati”tiādinā vuttaṃ, tena tecattālīsa. Puna tebhūmakavaṭṭaṃ “loko”ti gahetvā “na kiñci loke upādiyati”ti vuttaṃ, tena catucattālīsa honti. Evaṃ sabbathāpi **catucattālīsāya ṭhānesu arahattaṃ pāpetvā vipassanā kathitāti** veditabbā. “Catucattālīsādhikasatesū”ti kesuci potthakesu likhanti, sā ca pamādalekhā.

Samugghātasārūppasuttavaṇṇanā niṭṭhitā.

9. Paṭhamasamugghātasappāyasuttavaṇṇanā

31. Upakārabhūtā tadāvahattā. **Tatoti** maññitākārato. **Tanti** maññanāvattum. **Aññenākārenāti** yathā maññati aniccādiākārato, aññena aniccādinā ākārena hoti. **Aññathābhāvaṃ vipariṇāmanti** uppādavayatāya aññathābhāvaṃ jarāya maraṇena ca dvedhā vipariṇāmetabbaṃ. Taṃ **upagamanena aññathābhāvī**, evaṃbhūto **hutvāpi** jīraṇabhijjanasabhāvesu. **Bhavesu satto loko** uparipi **bhavaṃyeva abhinandati. Heṭṭhā gahitameva saṅkaḍḍhitvāti** “cakkhum na maññatī”tiādinā heṭṭhā gahitameva khandhadhātuāyatanāti khandhādiipariyāyena ekato gahetvā punapi maññanāvattum dasseti. Avasāne “tato taṃ hotī”ti vuttapadena saddhiṃ sabbavāresu aṭṭha aṭṭha hontīti “**aṭṭhacattālisāya ṭhānesū**”ti vuttam.

Paṭhamasamugghātasappāyasuttavaṇṇanā niṭṭhitā.

10. Dutiyasamugghātasappāyasuttavaṇṇanā

32. Dassetvāti ettha lakkhaṇe ayaṃ **tvā-saddo**, hetumhi vā. Anādisattasantānagatagāhattayalakkhitā hi satthu, tīparivaṭṭadesanā taṃnimittam yāvadeva tappahānāya pavattitabhāvato. Arahattam pāpetvā vipassanā kathitāti aṭṭhakathāyaṃ vuttam “**saha vipassanāya cattāropi maggā kathitā**”ti.

Dutiyasamugghātasappāyasuttavaṇṇanā niṭṭhitā.

Sabbavaggavaṇṇanā niṭṭhitā.

4. Jātidhammavaggavaṇṇanā

33-42. Nibbattanasabhāvanti hetupaccayehi uppajjanasabhāvaṃ. Uppādānantaram buddhipattiyā **jīraṇasabhāvaṃ**. Yattha cakkhādayo, tattheva visabhāgasamuṭṭhānalakkhaṇena byādhino **uppattipaccayabhāvena byādhisabhāvaṃ. Maraṇasabhāvanti** vināsasabhāvaṃ. **Sokasabhāvanti** ñātibyasanādinā ḍayhamānadukkhasabhāvaṃ. **Samkilesikasabhāvanti** taṇhādivasena samkilissanasabhāvaṃ.

Jātidhammavaggavaṇṇanā niṭṭhitā.

5. Sabbaaniccavaggavaṇṇanā

43-52. Nātapariññā āgatā visayavasena tabbisayassa dhammassa jotitattā. **Itarā dve** tīraṇapahānapariññāpi āgatā evāti veditabbā, tāsam abhiññeyyadhammavisayattā ñāṇassa ca tīraṇapahānapariññāsambhavato. Pariññeyyapade tīraṇapariññāva āgatā, pahātabbapade pahānapariññāva āgatāti yojanā. **Itarāpi dve gahitāyeva** tāhi vinā atthasiddhiyā abhāvato. **Paccakkham kātabbam** ārammaṇato asammohato paṭivijjanena. **Avuttāpi gahitāyeva** parijānanassa yāvadeva pahānatthattā. Ekasabhāvena vinābhāvo **anekaggaṭṭho**. Upasatṭharogena viya anto eva abhihataṣabbatā **upahataṭṭho**.

Sabbaaniccavaggavaṇṇanā niṭṭhitā.

Paṭhamo paṇṇāsako.

6. Avijjāvaggavaṇṇanā

53-62. Catūsu saccesu aññāṇaṃ tappaṭicchādakasammoho. Avindiyaṃ vindati, vindiyaṃ na vindatīti katvā vijjāya paṭipakkhova **avijjā**. Vijjāya uppannāya anavasesato avijjā pahīyati, taṃ dassento “**vijjāti arahattamaggavijjā**”ti āha. Na kevalaṃ aniccānupassanāvaseneva maggavuṭṭhānaṃ, atha kho itarānupassanāvasenapīti dassento “**dukkhā...pe... pahīyatīyevā**”ti āha. **Sabbatthāti** uparisuttante sandhāyāha. Tato aparepi taṃatthalakkhaṇavasena kathitasuttantepi. Tānipi hi tathā bujjanakapuggalānamajjhāsayena vuttānīti.

Avijjāvaggavaṇṇanā niṭṭhitā.

7. Migajālavaggo

1. Paṭhamamigajālasuttavaṇṇanā

63. Cakkhuvīññāṇaṃ dassanakkicanti vuttacakkhuvīññāṇena passitabbanti āha “**iṭṭhārammaṇabhūtā**”ti. **Kamanīyāti** kāmetabbā. Manaṃ appāyantīti **manāpāti** āha “**manavaḍḍhanakā**”ti. Piyāyitabbasabhāvā **piyarūpā**. **Kāmūpasamhitāti** kāmapaṭisaṃyuttā. Ālambitabbatā eva cettha upasamhitatāti “**ārammaṇaṃ katvā**”tiādīmāha. Taṇhāsāṅkhātā nandī **taṇhānandī**, na tuṭṭhinandīyeva “nandiṃ caratī”tiādīsu viya. **Gāmantanti** gāmasamīpaṃ. “**Anupacāraṭṭhāna**”nti vatvā taṃ dasseti “**yatthā**”tiādīnā.

Etthāti yathānīhate pāṭhe. “**Imaṃ ekaṃ pariyāyaṃ ṭhapetvā**”ti vuttaṃ tassa “pantānī”tipadena saṅgahitattā. **Appasaddāni appanigghosānīti** ettha **appa**-saddo abhāvattho.

Paṭhamamigajālasuttavaṇṇanā niṭṭhitā.

6. Samiddhilokapañhāsuttavaṇṇanā

68. Āyācanasuttato paṭṭhāyāti migajālavagge dutiyasuttato paṭṭhāya. Paṭhamasutte pana dutiyakavīhārādībhāvo vuttoti.

Samiddhilokapañhāsuttavaṇṇanā niṭṭhitā.

7. Upasenaāsīvisasuttavaṇṇanā

69. Gahetvāti pārūpanassa sithilakaraṇena vīmaṃsato mocetvā. **Leṇacchāyāyāti** purimadisāya leṇacchāyāyaṃ. **Pativāti** leṇacchadanato bhassitvā. **Phuṭṭhavisoti** catūsu āsīvisesu so phuṭṭhavisō. Tenāha “**tasmā**”tiādi. **Pariyādiyamānamevāti** khepentameva, vināsentamevāti attho. **Yathāparicchedenāti** attano visaparicchedānurūpaṃ. **Aññathābhāvanti** vaḍḍhabhāvādīpakatijahaṇaṃ. **Sabhāvavigamoti** vināso.

Upasenaāsīvisasuttavaṇṇanā niṭṭhitā.

8. Upavāṇasandiṭṭhikasuttavaṇṇanā

70. Rūpaṃ paṭisaṃviditaṃ karoti nātāpariññāvasena. **Rūparāganti** nīlādībhede rūpadhamme rāgaṃ. **Paṭisaṃviditaṃ karoti** “ayaṃ me rāgo appahīno”ti. Etena sekkhānaṃ paccavekkhāṇā kathitā. Tena vuttaṃ “evampi kho, upavāṇa, sandiṭṭhiko dhammo hotī”tiādi. **Rūparāgaṃ paṭisaṃviditaṃ karoti** “natthi me ajjhattaṃ rūpesu rāgo”ti pajānāti. Asekkhānaṃ hāyaṃ paccavekkhāṇā.

Upavāṇasandiṭṭhikasuttavaṇṇanā niṭṭhitā.

9. Paṭhamachaphassāyatanasuttavaṇṇanā

71. **Phassākarānanti** channaṃ phassānaṃ ākarānaṃ uppattiṭṭhānānaṃ, cakkhādānanti attho. **Naṭṭho nāma ahanti vadati**, yo channaṃ phassāyatanānaṃ samudayādiṃ yathābhūtaṃ pajānāti, so vusitavā, itaro avusitavā ahañca tādisoti. **Ayamevāti** ayaṃ cakkhusmiṃ “netamā mamā”tiādīnā tiṇṇaṃ gāhānaṃ abhāvo eva.

Paṭhamachaphassāyatanasuttavaṇṇanā niṭṭhitā.

10. Dutiyachaphassāyatanasuttavaṇṇanā

72. **Apunabbhavoti** punabbhavābhāvo.

11. Tatiyachaphassāyatanasuttavaṇṇanā

73. **Panassasanti** ekaṃsena naṭṭhoti ayamettha atthoti āha “**atinaṭṭho**”ti, dhurato eva naṭṭhoti attho.

Tatiyachaphassāyatanasuttavaṇṇanā niṭṭhitā.

Migajālavaggavaṇṇanā niṭṭhitā.

8. Gilānavaggo

1-5. Paṭhamagilānasuttādivaṇṇanā

74-78. **Appaṇṇātoti** nāmagottato ceva sīlādiguṇehi ca appaṇṇāto avissuto. Theramajjhimabhāvaṃ appattatāya **navo**.

Paṭhamagilānasuttādivaṇṇanā niṭṭhitā.

7. Dutiyaavijjāpahānasuttavaṇṇanā

80. Aniccādivasena abhinivisaṇaṃ **abhiniveso**, so eva dhammasabhāvaṃ atikkamivā parato āmasanato **parāmāso**, so eva **gāho**. Tena abhinivesaparāmāsaḡgāhena **gaṇhituṃ na yuttā** aniccādisabhāvattā. Saṅkhārā eva pavattiyā kāraṇabhāvato **saṅkhāranimittāni**. Yo saṅkhāresu apariṇṇātābhinivesena passitabbo attākāro, so na hotīti añño anattākāro, **tato aññato passati**. **Pariṇṇātābhinivesoti** tīraṇapariṇṇāya paricchijja ṇātamicchābhiniveso. **Pariṇṇātābhinivesoti** vā pariṇṇātavipassanābhiniveso. **Vipassanāti** arūpasattakavasena vipassanāya pariṇṇatābā.

Dutiyaavijjāpahānasuttavaṇṇanā niṭṭhitā.

8. Sambahulabhikkhusuttavaṇṇanā

81. **Kevalanti** itaralakkhaṇehi avomissaṃ.

10. Phaggunapañhāsuttavaṇṇanā

83. Taṇhāya pahīnāya diṭṭhimānāpi pahīnā evāti “**taṇhāpapañcassa chinnattā chinnapapañce**”ti vuttaṃ. Dutiyaṇṇāseva nayo. Idha sattavohāro cakkhādīsū vijjamānesu eva hoti, tasmā parinibbutānañca vohāro cakkhādīsū sannissayeneva, nāññathāti **atikkantabuddhehi pariharitāni cakkhusotādīni pucchāmīti pucchati** “atthi nu kho bhante”tiādīnā. **Cakkhusotādivaṭṭaṃ** vaṭṭe pavatteyya.

Phaggunapañhāsuttavaṇṇanā niṭṭhitā.

Gilānavaggavaṇṇanā niṭṭhitā.

9. Channavaggo

1. Palokadhammasuttavaṇṇanā

84. **Aniccalakkhaṇameva kathitaṃ**, tañca pariyāyena, aniccalakkhaṇe kathite itaralakkhaṇāni kathitāneva honti byabhicārabhāvato.

2. Suññatalokasuttavaṇṇanā

85. Attano idanti **attaniyanti** āha “**attano santakenā**”ti.

3. Saṃkhittadhammasuttavaṇṇanā

86. **Vuttanayeneva veditabbanti** khandhiyavagge khandhavasena āgataṃ, idha āyatanavaseṇāti ayameva viseso.

4. Channasuttavaṇṇanā

87. Sabbanimittehi paṭisallīyati etenāti **paṭisallānaṃ**, phalasaṃpatti. **Jīvitahārakasatthaṃ** jīvitassa haraṇato, sattānañca sasanato hiṃsanato. **Paricaritoti** payirupāsito. Tena yathānusiṭṭhaṃ paṭipajjinti dīpeti.

Anupavajjanti parehi na upavaditabbaṃ. Taṃ panettha āyatim appaṭisandhibhāvato hotīti āha “**appavattika**”nti. “Netam mamā”tiādīni vadanto **arahatte pakkhipitvā kathesi**.

Puthujjanabhāvameva dīpento vadati akatakkicabhāvādīpanena. Kiñcāpi thero pucchitaṃ pañhaṃ arahatte pakkhipitvā kathesi, “na samanupassāmī”ti pana vadanto kiñci nipphattiṃ na kathesi, tasmā “idampi manasi kātabba”nti idaṃ ānetvā sambandho.

Kilesapassaddhīti kilesapariḷāhavūpasamo. **Bhavatthāya** puna bhavattāya. **Ālayanikanti pariyaṭṭhāneti** bhavantare apekkhāsaññite ālaye nikantiyā ca pariyaṭṭhānappattiyā. **Asati** avijjamānāya. Paṭisandhivasena aññabhavato idhāgamaṇaṃ **āgati nāma**. **Cutivasena gamananti** cavanavasena ito gati. Anurūpagamaṇaṃ gati nāma tadubhayaṃ na hoti. Cutūpapāto aparāparabhavanavasena **cuti**, upapajjanavasena **upapāto**, tadubhayaṃ na hoti. Evaṃ pana cutūpapāte asati **nevidha** na idha loke. **Na huram** na paraloke hoti. Tato eva **na ubhayattha hoti**. **Ayameva anto** ayaṃ idhaloke paraloke ca abhāvoyeva dukkhassa pariyosānaṃ. **Ayamevāti** yathāvutto eva – **ettha** etasmiṃ pāṭhe paramparāgato pamāṇabhūto **attho**.

Ye panāti sammavādino sandhāya vadati. **Antarābhavaṃ icchanti** “evaṃ bhavena bhavantarasaṃbandho yujjeyyā”ti. **Niratthakaṃ** antarābhavassa nāma kassaci abhāvato. Cutikkhandhānantarañhi paṭisandhikkhandhānaṃyeva pātubhāvo. Tenāha “**antarābhavassa...pe...**

paṭikkhittoyevā’ti. Tattha **bhāvoti** atthitā. **Abhidhamme kathāvattuppakarane** (kathā. 505-507) **paṭikkhittoyeva**. Yadi evaṃ “antarenā”ti idaṃ kathanti āha “**antarenā**”tiādi. Vikappato aññaṃ **vikappantaram**, tassa dīpanaṃ “antarenā”ti vacanaṃ. Na antarābhavadīpanaṃ tādissa anupalabbhanato payoanābhāvato ca. Yattha hi vipākaviññāssa paccayo, tathassa nissayabhūtassa vatthussa sahabhāvīnañca khandhānaṃ sambhavoti saddhiṃ attano nissayena viññānaṃ uppajjatevāti nāssa uppattiyā desadūratā veditabbā. “Neva idha na hura”nti vuttadvayato aparaṃ vikappena “na ubhaya”nti, tatthapi na hotiyevāti adhippāyo. “**Antarenā**”ti vā “vinā”ti iminā samānattho nipāto, tasmā nevidha, na huraṃ, ubhayaṃ vināpi nevāti attho.

Āharīti chinnavasena gaṇhi. Tenāha “**kaṇṭhanāḷaṃ chindī**”ti. **Pariggaṇhantoti** sammasanto. **Parinibbuto** dīgharattaṃ vipassanāyaṃ yuttapayuttabhāvato. “**Anupavajjaṃ channena bhikkhunā satthaṃ āharita**”nti, **kathesīti** asekkhakāle byākaraṇaṃ viya katvā kathesi.

Imināti “upavajjakulānī”ti iminā vacanena. **Theroti** sārīputtatthero. **Evanti** evaṃ pubbakālesu saṃsatthavīhārī hutvā ṭhito pacchā arahattaṃ pāpuṇissatīti āsānkanto pucchati. Sesam uttānameva.

Channasuttavaṇṇanā niṭṭhitā.

5-6. Puṇṇasuttādivaṇṇanā

88-89. Tanti cakkhurūpadvayaṃ. Tenāha “**cakkuñceva rūpañcā**”ti. **Nandisamudayāti** nandiyā samudayatanhāya sesakāraṇehi nandiyā samuditi samodhānaṃ nandisamudayo, tasmā nandisamudayā. Tenāha “**taṇhāya samodhānenā**”ti. Pañcakkhandhasāṅkhātassa dukkhassa samodhānena samuditi pavattiyevāti saha samudayena dukkhassa dassitattā “**vaṭṭaṃ matthakaṃ pāpetvā**”ti vuttaṃ. Nirodhūpāyena saddhiṃ nirodhassa dassitattā “**vivaṭṭaṃ matthakaṃ pāpetvā**”ti. Pucchānusandhiādīsu aññataro na hotīti āha – “**pāṭiyekko anusandhī**”ti.

Caṇḍāti kodhanā. **Duṭṭhāti** dosavantoti attho. **Kibbisāti** pāpā. **Kakkhalāti** dāruṇā. **Ghaṭikamuggarenāti** ekasmiṃ pakkhe ghaṭikaṃ dassetvā katena rassadaṇḍena. Sattānaṃ sasanato satthaṃ, tato eva jīvitassa haraṇato hārakañcāti **satthahārakaṃ. Indriyasamvaro “damo”ti vutto** manacchatthānaṃ indriyānaṃ damanato. **Paññā “damo”ti vuttā** kilesavisevitānaṃ damanato vūpasamanato. **Uposathakammaṃ “damo”ti vuttaṃ** kāyadvārādīhi uppajjanakaasamassa damanato. **Khanti “damo”ti veditabbā** akkhantiyā damanato vūpasamanato. Tenāha “**upasamoti tasseva vevacana**”nti.

Etthāti sunāparantajanapade. **Ete dveti** ayaṃ puṇṇatthero tassa kaniṭṭhoti ete dve bhātaro. **Āhacca aṭṭhāsi** uḷāraṃ buddhārammaṇaṃ pītiṃ uppādetvā. **Satta sīhanāde naditvāti** mammacchedakānampi akkosaparibhāsānaṃ khamane santosābhāvadīpanaṃ, pāṇippahārassa, leḍḍuppahārassa, daṇḍappahārassa, satthappahārassa, jīvitavoropanassa, khamane santosābhāvadīpanaṃcāti evaṃ satta sīhanāde naditvā. Catūsu ṭhānesu vasitattā pāḷiyāṃ vasanaṭṭhānaṃ anuddesikaṃ katvā “**sunāparantasmīṃ janapade viharati**”iceva vuttaṃ.

Catūsu ṭhānesūti abbuhatthapabbate, samuddagirivihāre, mātulagirimhi, makuḷakārāmavīhāreti imesu catūsu ṭhānesu. **Tanti** caṅkamaṃ āruya koci bhikkhu caṅkamituṃ samattho natthi mahatā samuddaparissayena bhāvanāmanasikārassa anabhisambhuṇanato. **Uppātikanti** uppātakaraṃ mahāsāṅkhobhaṃ utthapetvā. **Sammukheti** anilapadese. **Paṭivedesunti** pavedesuṃ.

Āraddhakālato paṭṭhāyāti maṇḍalamāḷassa kātuṃ pathavīmitakālato pabhuti. Saccabandhena pañcasatāni paripūretuṃ “**ekūnapañcasatāna**”nti vuttaṃ. **Gandhakuṭinti** jetavanamahāvīhāre mahāgandhakuṭiṃ.

Saccabandhanāmoti saccabandhe pabbate ciranivāsītāya ‘‘saccabandho’’tveva laddhanāmo. **Arahattaṃ pāpuṇīti** pañcābhiñṇāparivāraṃ arahattaṃ adhigacchi. Tenāha ‘‘**maggenevassa abhiñṇā āgatā**’’ti.

Tasmiṃ sannipatitā mahājanā keci sotāpannā, keci sakadāgāmino, keci anāgāmino, keci arahanto ahesuṃ. Tatthāpi keci tevijjā, keci chalabhiñṇā, keci paṭisambhidappattā ahesuṃ. Taṃ sandhāya vuttaṃ ‘‘**mahājanassa bandhanamokkho jāto**’’ti. Ye pana tatha saraṇagamanapañcasīladasasīlasamādānena laddhānuggahā, tesam devatānañca vasena ‘‘**mahantaṃ buddhakolāhalaṃ ahoṣī**’’ti vuttaṃ.

Aruṇaṃ pana mahāgandhakuṭiyāmyeva uṭṭhapesi devatānuggahatthañceva kulānudayāya ca. **Apāyamagge otārīto** ‘‘koci lokassa sajitā atthi, tassa vasena pavattisaṃhārā honti, tenevāyaṃ pajā sanāthā hoti, taṃ yuñjati ca tasmiṃ tasmiṃ kamme’’ti micchāgāhehi. **Paricaritabbaṃ yāci** ‘‘ettha mayā ciraṃ vasitabba’’nti.

Chaṭṭhanti bāhiyasuttaṃ. Taṃ **uttānameva** heṭṭhā vuttanayattā.

Puṇṇasuttādivaṇṇanā niṭṭhitā.

7-8. Paṭhamaejāsuttādivaṇṇanā

90-91. Ejati chaḷārammaṇanimittaṃ kampaṭīti **ejā**. Tenāha ‘‘**calanaṭṭhena**’’ti. **Ābādhanatṭhena** pīlanatṭhena. **Anto dosanaṭṭhena**ti antocitte eva padussanaṭṭhena. **Nikantaṇatṭhena**ti chindanaṭṭhena. **Heṭṭhā gahitamevāti** heṭṭhā maññitasamugghātasārappasutte āgatameva. **Vuttanayameva** maññitasamugghātasutte.

Paṭhamaejāsuttādivaṇṇanā niṭṭhitā.

9-10. Paṭhamadvayasuttādivaṇṇanā

92-93. **Dvayanti** dukam. Pāḷiyam āmedītalopena niddesoti āha ‘‘**dve dve koṭṭhāse**’’ti. **Evametanti** evaṃ aniccādibhāvena etaṃ cakkhurūpañcāti dvayaṃ. **Calatīti** anavaṭṭhānena pacalati. **Byathatīti** jarāya maraṇena ca pavedhati. **Hetu ceva** uppattinimittattā. **Sahagatīti** sahappavatti, tāya gahetabbattā ‘‘saṅgati’’ti phasso vutto. Esa nayo sesapadadvayepi. Yasmā ca saṃgacchamānadhammavimuttā saṅgati nāma natthi, tathā sannipātasamavāyā, tesam vasena nibbato phasso tathā vuccatīti. Tenāha ‘‘**iminā**’’tiādi.

Vatthūti cakkhu nissayapaccayādibhāvena. **Ārammaṇanti** rūpaṃ ārammaṇapaccayādibhāvena. **Sahajāta tayo khandhā** vedanādayo, te sahajātādipaccayabhāvena. **Ayaṃ hetūti** ayaṃ tividho hetū. **Phassenāti**ādīsu ayaṃ saṅkhepattho – yasmā rūpārammaṇe phasse attano phusanakiccaṃ karonte evaṃ vedanā anubhavanakiccaṃ, saññā sañjānanakiccaṃ karoti, tasmā ‘‘**phassena phuṭṭhamevā**’’tiādivuttameva atthaṃ idāni puggalādhiṭṭhānena dassetuṃ ‘‘**phuṭṭho**’’tiādi vuttaṃ. Pañceva khandhā bhagavatā samatimsāya ākārehi vuttā. Kasmāti āha ‘‘**katha**’’ntiādi. Rukkhasākhāsu rukkhasākhāro viya ekekadhammepi khandhavohāro hotiyeva. Tenāha bhagavā – ‘‘viññāṇaṃ viññāṇakkhandho’’ti (yama. khandhayamaka 2).

Paṭhamadvayasuttādivaṇṇanā niṭṭhitā.

Channavaggavaṇṇanā niṭṭhitā.

10. Saḷavaggo

1. Adantaaguttasuttavaṇṇanā

94. Adamitāti damaṃ nibbisevanabhāvaṃ anītā. **Agopitāti** satsaṅkhātāya vatiyā na rakkhitā. **Apihitāti** satikavāṭena na pihitā. Catūhipi padehi indriyānaṃ anāvaraṇamevāha. Adhikaṃ vahantīti adhivāhā, dukkhassa adhivāhā **dukkhādhivāhā**. Nirayesu uppajjanakaṃ **nerayikaṃ**. **Ādi-saddena** sesapāliṃ saṅgaṇhāti.

Saḷevāti cha-kārassa sa-kāro, ḷa-kāro padasandhikaro. **Yatthāti** nimittatthe bhummaṃ. **Anavassutā atintāti** rāgena atemitā.

Assāditanti assādaṃ itaṃ upagataṃ. Tenāha “**assādavanta**”nti. **Sukhadukkhanti** iṭṭhāniṭṭhaṃ. Anvayatīti anvayo, hetu. Phassoti anvayo etassāti **phassanvayanti** āha – “**phassahetuka**”nti. “**Aviruddha**”iti vibhattilopena niddeso.

Papañcasaññāti taṇhādisamadhūpasamḥatasaññā. Tenāha “**kilesasaññāya papañcasaññā nāma hutvā**”ti. Papañcasaññā etesaṃ atthīti **papañcasaññā**, itarītārā narā. **Papañcayantāti** saṃsāre papañcaṃ cirāyanaṃ karontā. **Saññinoti** gehassitasaññāya saññāvanto. **Manomayaṃ vitakkanti** kevalaṃ manasā sambhāvitaṃ micchāvitakkaṃ. **Iriyatīti** iriyaṃ paṭipattiṃ iriyati paṭipajjati.

Suṭṭhu bhāvitoti suṭṭhubhāvaṃ subhāvanaṃ ito bhāvitaḥbhāvito. **Phuṭṭhassa cittanti** tena yathāvuttaphassena phuṭṭhaṃ assa cittaṃ. **Na vikampate kvacīti** kismiñci iṭṭhāniṭṭhārammaṇe na kampati. **Pāragāti** pāragāmino bhavatha.

Adantaaguttasuttavaṇṇanā niṭṭhitā.

2. Mālukyaputtasuttavaṇṇanā

95. Apasādetīti tajjeti. **Ussādetīti** ukkaṃseti. **Ayaṃ kira** thero mālukyaputto. **Pamajjitvāti** yonisomanasikārassa ananuyujjanena pamajjitvā.

Yatrāti paccattaṃ vacanālaṅkāre. **Nāmāti** asambhāvane apasādanapakkhe, ussādanapakkhe pana sambhāvane. **Kim jātanti** kiṃ tena mahallakabhāvena jātanti mahallakabhāvaṃ tiṇāyapī amaññamāno vadati. Tenāha “**yadi...pe... anuggaṇhanto**”ti. **Anuggaṇhantoti** acintento. Mādisānaṃ bhagavato ovādo upakārāvahoti etarahi **ovādañca pasamsanto**.

“**Adiṭṭhā adiṭṭhapubbā**”tiādīnā parikappavasena vuttanidassanaṃ “**yathā** etesu chandādayo na honti, evamitareshu pariññātesū”ti nayapaṭipajjanatthaṃ, tesampi imehi samānetabbattā. Tena vuttaṃ “**supinakūpamā kāmā**”ti (ma. ni. 1.234; 2.46; pāci. 417; cūḷava. 65).

Cakkhuviññāṇena diṭṭhe diṭṭhamattanti cakkhuviññāṇassa rūpāyatanaṃ yattako gahaṇākāro, tattakaṃ. Kittakaṃ pamāṇanti attasaṃvediyaṃ parassa na disitabbaṃ, kappanāmattaṃ rūpaṃ. Tenāha “**cakkhuviññāṇaṃ hi**”tiādī. **Rūpeti** rūpāyatane. **Rūpamattamevāti** nīlādibhedaṃ rūpāyatanaṃmattaṃ, na nīlādi. Visesanivattanattho hi ayaṃ matta-saddo. Yadi evaṃ, **eva-kāro** kimatthiyo? Cakkhuviññāṇaṃhi rūpāyatane labbhamānampi nīlādivisesaṃ “**idaṃ nīlaṃ nāma, idaṃ pītaṃ nāmā**”ti na gaṇhāti. Kuto niccāniccādisabhāvattanti saṃhitassapī nivattanatthaṃ evakāraggaṇaṃ. Tenāha “**na niccādisabhāva**”nti. **Sesaviññāṇehipīti** javanaviññāṇehipi.

Diṭṭhaṃ nāma cakkhuviññāṇaṃ rūpāyatanaṃ dassananti katvā. Tenāha “**rūpe rūpavijānana**”nti. **Cakkhuviññāṇamattamevāti** yattakaṃ cakkhuviññāṇaṃ rūpāyatane gahaṇamattaṃ, tamattameva me sabbaṃ cittaṃ bhavissatīti attho. “**Rāgādirahenā**”ti vā pāṭho.

Diṭṭhaṃ nāma padatthato cakkhuvīññāṇena diṭṭhaṃ rūpaṃ. **Tatthevāti** cakkhuvīññāṇena diṭṭhamatte rūpe. **Cittattayaṃ** diṭṭhamattaṃ nāma cakkhuvīññāṇaṃ viya rāgādivirahena pavattanato. Tenāha “yathā ta”nti ādi.

Manodvārāvajjanena viññātārammaṇaṃ viññātanti adhippetam rāgādivirahena viññeyyato. Tenāha “yathā āvajjanenā”tiādi.

Tadāti tasmim kāle, na tato paṭṭhāyāti ayamettha atthoti dasseti. “Diṭṭhamatta”ntiādinā yesam rāgādīnaṃ nivattanaṃ adhippetam, te “tenā”ti ettha ta-saddena paccāmasīyantīti “**tena rāgena vā rato**”tiādi vuttaṃ. **Tatthāti** visaye bhumbaṃ, visayabhāvo ca visayinā sambandhavasena icchitabboti vuttaṃ “**paṭibaddho**”tiādi.

Satīti rūpassa yathāsabhāvasallakkaṇā sati **muṭṭhā** piyanimittamanasikārena anuppajjanato na dissati nappavattati. **Ajjhosāti** ajjhosāya. **Gilitvā** pariniṭṭhapetvā attaniyakaraṇena.

Abhijjhā ca vihesā cāti karaṇatthe paccattavacananti āha – “**abhijjhāya ca vihesāya cā**”ti. Atthavasena vibhattipariṇāmoti āha – “**abhijjhāvihesāhī**”ti. **Ācinantassāti** vaḍḍhentassa. **Paṭissatoti** patissato sabbattha satiyā yutto. **Sevato cāpīti** ettha ca-saddo **api**-saddo ca nipātamattanti “**sevantassa**”iceva attho vutto.

Mālukyaputtasuttavaṇṇanā niṭṭhitā.

3. Parihānasuttavaṇṇanā

96. Parihānasabhāvanti anavajjadhammehi parihāyanasabhāvaṃ. **Abhibhavitānīti** abhibhūtāni nibbisevanabhāvākārena. **Sarasaṅkappāti** tasmim tasmim visaye anavaṭṭhitabhāvena saṅkappā. **Samyojanīyāti** samyojetabbā. Samyojanānaṅhi punappunaṃ uppattiyā okāsaṃ dento kilesajātaṃ adhivāseti nāma. Kilesa eva **kilesajātaṃ**. **Ārammaṇaṃ** pana citte karonto adhivāseti nāma. **Chandarāgappahānena na pajahati** ārammaṇaṃ, kilesaṃ pana anuppattidhammatāpādanena eva. **Abhibhaviṃ āyatananti kathitaṃ** adhivāsanādinā. “Kathaṅca, bhikkhave, parihānadhammo hotī”ti **dhammaṃ pucchitvā** taṃ **vibhajanta bhagavatā** “taṅce bhikkhu adhivāsetī”tiādinā **puggalena** puggalādhiṭṭhānena **dhammo dassito**.

Parihānasuttavaṇṇanā niṭṭhitā.

4. Pamādavihārīsuttavaṇṇanā

97. Na pidahitvā cakkhundriyaṃ na pidahitvā sañchāditvā ṭhitassa. **Byāsiṅcatīti** kilesehi visesena āsiṅcatī. **Kilesatintanti** kilesehi avassutaṃ. **Dubbalapīti** taruṇā na balappattā. **Balavapīti** ubbegā pharaṇappattā ca pīti. **Darathappassaddhīti** kāyacittadarathavūpasamalakkaṇā passaddhi. **Na uppajjanti** paccayaparamparāya asiddhattā. “Kathaṅca, bhikkhave, pamādavihārī hotī”tiādinā **puggalaṃ pucchitvā** “pāmojjaṃ na hotī, pāmojjaṃ jāyatī”tiādinā ca, **dhammena** “pamādavihārī appamādavihārī”ti ca **puggalo dassito**.

Pamādavihārīsuttavaṇṇanā niṭṭhitā.

5. Saṃvarasuttavaṇṇanā

98. Idanti “kathaṅca, bhikkhave, asaṃvaro”ti? Idaṃ vacanaṃ. **Pahātabbadhammakkhānavasenāti** pahātabbadhammasseva kathaṅcaṃ vuttaṃ. “Kathaṅca, bhikkhave,

asaṃvaro hotī’ ti **dhammaṃ pucchivā** ‘santi, bhikkhave, cakkhuvīññeyyā rūpā’ tiādinā **dhammova vibhatto**.

Samvarasuttavaṇṇanā niṭṭhitā.

6. Samādhisuttavaṇṇanā

99. **Cittekaggatāyāti** samathavasena cittekaggatāya. **Parihāyamāneti** tassa alābhena parihāyamāne. **Kammaṭṭhānanti** vipassanākammaṭṭhānaṃ, samathameva vā.

7. Paṭisallānasuttavaṇṇanā

100. **Kammaṭṭhānanti** samathavipassanākammaṭṭhānaṃ.

8-9. Paṭhamanatumhākaṃsuttādivaṇṇanā

101-102. **Upamaṃ parivāretvāti** upamaṃ pariharitvā. **Suddhikavasenāti** upamāya vinā kevalameva.

10. Udakasuttavaṇṇanā

103. **Udakoti** tassa nāmaṃ. **Vedaṃ** ñāṇaṃ. Sabbamaṃ jītavāti **sabbaji**. **Avakhatanti** nikhatamaṃ. **Ucchādanadhammoti** ucchādetabbasabhāvo. **Parimaddanadhammoti** parimadditabbasabhāvo. **Parihatoti** pariharito. Odanakummāsūpacayucchādanaparimaddanapadehīti vattabbaṃ. Ucchādanaṃ vā parimaddanamattamevāti katvā na gahitaṃ.

Udakasuttavaṇṇanā niṭṭhitā.

Saḷavaggavaṇṇanā niṭṭhitā.

Dutiyo paṇṇāsako.

11. Yogakkhemivaggo

1. Yogakkhemisuttavaṇṇanā

104. **Catūhi yogehīti** kāmayogādīhi catūhi yogehi. **Khemīnoti** khemavato kusalino. **Kāraṇabhūtanti** kattabbaupāyassa kāraṇabhūtaṃ. Pariyāyati pavattiṃ nivattiñca ñāpetīti pariyāyo, dhammo ca so pariyattidhammattā pariyāyo cāti dhammapariyāyo, taṃ **dhammapariyāyaṃ**. Yasmā pana so tassādhiḡamassa kāraṇaṃ hoti, tasmā vuttaṃ ‘**dhammakāraṇa**’nti. **Yuttinti** samathavipassanādhammānīti vā catusaccadhammānīti vā. ‘Tasmā’ ti padaṃ uddharitvā – ‘kasmā’ ti kāraṇaṃ pucchanto ‘**kiṃ akkhātattā, udāhu pahīnattā**’ ti vibhajitvā pucchi. Yasmā pana chandarāgappahānaṃ yogakkhemibhāvassa kāraṇaṃ, na kathanamaṃ, tasmā ‘**pahīnattā**’ tiādi vuttaṃ.

Yogakkhemisuttavaṇṇanā niṭṭhitā.

2-10. Upādāyasuttādivaṇṇanā

105-113. **Vedanāsukhadukkanti** vedanāsaṅkhātaṃ sukhañca dukkhañca kathitaṃ. ‘Ajjhattamaṃ sukhaṃ dukkha’nti vuttattā vimuttisukhassa ca saḷāyatanadukkhassa ca kathitattā vivaṭṭasukhaṃ cettha

kathitamevāti sakkā viññātuṃ. Kāmaṃ khandhiyavagge khandhavasena desanā āgatā, na āyatanavasena. Ettha pana vattabbaṃ atthajātaṃ khandhiyavagge vuttanayamevāti.

Upādāyasuttādivaṇṇanā niṭṭhitā.

Yogakkhemivaggavaṇṇanā niṭṭhitā.

12. Lokakāmaguṇavaggo

1-2. Paṭhamamārapāsasuttādivaṇṇanā

114-115. Āvasati ettha kilesamāroti **āvāso**. Kāmaguṇaajjhakkabāhirāni āyatanāni. Kilesamārassa āvāsaṃ gato **vasaṃ gato**. **Tividhassāti** papañcasaññāsankhātassa tividhassapi mārassa. Tato eva devaputtamārassapi vasaṃ gatoti sakkā viññātuṃ.

Paṭhamamārapāsasuttādivaṇṇanā niṭṭhitā.

3. Lokantagamanasuttavaṇṇanā

116. Lokiyanti ettha sattakāyabhūtagāmādīti **loko**, cakkavāḷo. Saṅkhāro pana lujjanapalujjanatṭhena **loko**. **Antanti** osānaṃ. **Sabbaññutaññāṇena saṃsanditvāti** sabbaññutaññāṇagatiyā samānetvā avirodhetvā. **Thomessāmīti** pasamsissāmi.

Evamsampattikanti evamsampajjanakaṃ evampassitabbaṃ idaṃ mama ajjhesanaṃ. Tenāha “**īdisanti attho**”ti. **Jānaṃ jānātīti** sabbaññutaññāṇena jānitabbaṃ jānāti eva. Na hi padesaññāṇe ṭhito jānitabbaṃ sabbaṃ jānāti. Ukkaṭṭhaniddesena hi avisesaggahaṇena ca “jāna”nti iminā niravasesaṃ ñeyyajātaṃ pariggayhatīti tabbisayāya jānanakiriyāya sabbaññutaññāṇameva karaṇaṃ bhavituṃ yuttaṃ. Pakaraṇavasena “bhagavā”ti padasannidhānena ca ayamattho vibhāvetabbo. **Passitabbameva passatīti** dibbacakkhu-paññācakkhu-dhammacakkhu-buddhacakkhu-samantacakkhu-saṅkhātehi ñāṇacakkhūhi passitabbaṃ passati eva. Atha vā **jānaṃ jānātīti** yathā aññe savipallāsā kāmarūpapariññāvādino jānantāpi vipallāsavasena jānanti, na evaṃ bhagavā. Bhagavā pana pahīnavipallāsattā jānanto jānāti eva, diṭṭhidassanassa abhāvā passanto passati evāti attho.

Dassanapariṇāyakaṭṭhenāti yathā cakkhu sattānaṃ dassanatthaṃ pariṇeti sādheti, evaṃ lokassa yāthāvadassanasādhanatopi dassanakkaparīṇāyakaṭṭhena **cakkhubhūto**, paññācakkhumayattā vā sayambhūñāṇena paññācakkhuṃ bhūto pattoti vā **cakkhubhūto**. **Ñāṇabhūtoti** etassa ca evameva attho daṭṭhabbo. Dhammā vā bodhipakkhiyā, tehi uppannattā lokassa ca taduppādanato anaññāsādhāraṇaṃ vā dhammaṃ patto adhigatoti **dhammabhūto**. “Brahmā”vuccati seṭṭhaṭṭhena maggañāṇaṃ, tena uppannattā lokassa ca taduppādanato tañca sayambhūñāṇena pattoti **brahmabhūto**. Catusaccadhammaṃ vadatīti **vattā**. Ciraṃ saccapaṭivedhaṃ pavattento vadatīti **pavattā**. **Atthaṃ nīharitvāti** dukkhādiatthaṃ uddharitvā. Paramatthaṃ vā nibbānaṃ pāpayitā. Amatasacchikiriyāṃ sattesu uppādentō amataṃ dadātīti **amatassa dātā**. Bodhipakkhiyadhammānaṃ tadāyattabhāvato **dhammassāmī**. Punappunaṃ yācāpentō bhāriyaṃ karonto **garuṃ karoti** nāma, tathā duviññeyyaṃ katvā kathentopi.

Cakkhunā vijjamānena **lokasaññī hoti**, na tasmim asati. Na hi ajjhakkāyatanavirahena lokasamaññā atthi. Tenāha “**cakkhuñhi loko**”tiādi. **Appahīnadiṭṭhīti** asamūhataśakkāyadīṭṭhiko ghanavinibbhogaṃ kātuṃ asakkonto samudāyaṃ viya avayavaṃ “loko”ti sañjānāti ceva maññati ca. Tathāti iminā “lokoti sañjānāti ceva maññati cā”ti padattayaṃ ākaḍḍhati. **Tassāti** puthujjanassa, cakkavāḷalokassa vā. Cakkhādimeva hi saḥokāsena “cakkavāḷo”ti puthujjano sañjānāti. **Gamanenāti**

padasā gamanena. **Na sakkā** tesam anantattā. **Lujjanatṭhenā**ti abhisankhāralokavasena lokassa antam dassetum vuttam. Tassa **anto** nāma nibbānam. Tam pattum sakkā sammāpaṭipattiyā pattabbattā. Cakkavāḷalokassa pana anto nāma, natthi tassa gamanena appattabbattā.

Imehi padehīti imehi vākyavibhāgehi padehi. Tāni pana akkharasamudāyalakkhaṇānīti āha “**akkharasampiṇḍanehi**”ti. **Pāṭiyekkaakkharehī**ti tasmim tasmim pade paṭiniyatasannivesehi visum visum cittaena gayhamānehi akkharehīti attho.

Gamanatṭhena “paṇḍā” vuccati paññā, tāya ito gato pattoti **paṇḍito**, paññavā. Mahāpaññatā nāma paṭisambhidāvasena veditabbāti āha “**mahante atthe**”tiādi. **Yathā tanti** ettha **tanti** nipātamattam paṭhamavikappe, dutiyavikappe pana paccāmasananti āha “**taṃ byākata**”nti.

Lokantagamanasuttavaṇṇanā niṭṭhitā.

4. Kāmaguṇasuttavaṇṇanā

117. Cetasoti karaṇe sāmivacanam. Cittaena samphusanam nāma anubhavoti āha “**cittena anubhūtapubbā**”ti. Ututtayānurūpatāvasena **pāsādattayam**, tam vasena **tividhanāṭakabhedo**. Manorammatāmattena kāmaguṇam katvā dassitam, na kāmavasena. Na hi abhinikkhamanato uddham bodhisattassa kāmavitakkā bhūtapubbā. Tenāha māro pāpimā –

“Satta vassāni bhagavantam, anubandhim padāpadam;
Otāram nādhigacchissam, sambuddhassa saṭimato”ti. (su. ni. 448);

Metteyyo nāmātiādi anāgatārammaṇadassanamattam, na bodhisattassa evam uppajjati. Attā piyāyitabarūpo etassāti **attarūpo**, uttarapade purimapadalopenāti “**attano hitakāmajātikenā**”ti attho vutto. **Attarūpenā**ti vā pītisomanassehi gahitasabhāvena tuṭṭhapahaṭṭhena udaggudaggena. **Appamādoti** appamajjanam kusaladhammesu akhaṇḍakāritāti āha “**sātaccakiriyā**”ti. **Avossaggoti** cittaassa kāmaguṇesu avossajjanam pakkhanditum appadānam. Purimo vikappo kusalānam dhammānam karaṇavasena dassito, pacchimo akusalānam akaraṇavasena. **Dve dhammā**ti appamādo satīti dve dhammā. Appamādo sati ca tathā pavattā cattāro kusaladhammakhandhā veditabbā. **Kattabbā**ti pavattetabbā.

Tasmim āyataneti tasmim nibbānasaññite karaṇe paṭivedhe. **Tam kāraṇanti** channam āyatanānam kāraṇam. Saḷāyatanam nirujjhati etthāti **saḷāyatananirodho vuccati nibbānam**. Tenāha “**nibbānam**. **Tam sandhāyā**”tiādi. **Nibbānasminti** nibbānamhi.

Kāmaguṇasuttavaṇṇanā niṭṭhitā.

5-6. Sakkapañhasuttādivaṇṇanā

118-119. Diṭṭheti paccakkhabhūte. **Dhammeti** upādānakkhandhadhamme. Tattha hi attāti bhavati saññā diṭṭhi cāti attabhāvasaññā. Tenāha – “**diṭṭheva dhammeti imasmimyeva attabhāve**”ti. “**Tannissita**”nti ettha **taṃ**-saddena heṭṭhā abhinandanādipariyāyena vuttā taṃhā paccāmatṭhāti āha – “**taṃhānissita**”nti. Tam upādānam etassāti **tadupādānam**. Tenāha – “taṃgahaṇa”ntiādi. Taṃhupādānasaṅkhātam gahaṇam etassāti **taṃgahaṇam**. **Chaṭṭham uttānameva** pañcame vuttanayattā.

Sakkapañhasuttādivaṇṇanā niṭṭhitā.

7. Sāriputtasaddhivihārikasuttavaṇṇanā

120. Ghaṭṭessatīti pubbenāparaṃ ghaṭṭitaṃ sambandhaṃ karissati. **Vicchedanti** brahmacariyassa virodhipaccayasamuppattiyā ucchedaṃ.

8. Rāhulovādasuttavaṇṇanā

121. Ye dhammā sammadeva bhāvitā bahulīkatā vimuttiyā arahattassa sacchikiriyaṃ saṃvattanti, te saddhādayo sambhārā **vimutti-paripācaniyāti** adhippetā. **Paripācentīti** paripākaṃ pariṇāmaṃ gamenti. **Dhammāti** kāraṇabhūtā dhammā. **Visuddhikāraṇavasenāti** visuddhikāraṇatāvasena, sā pana saddhindriyādīnaṃ kāraṇato visuddhi. Yathā nāma jātisampannaṃ khattiyakumārassa vipakkhavigamena pakkhasaṅgahena pavattiṭṭhānasamuppattiyā ca parisuddhi hoti, evamevaṃ daṭṭhabbāti dassento “**vuttaṃ heta**”ntiādīmāha.

Assaddhādayopi puggalā saddhādīnaṃ yāvadeva parihānāya honti, saddhādayo pāripūriyāva, tathā pasādaniyasuttantādipaccavekkhaṇā, **pasādaniyasuttantā** nāma sampasādaniyasuttādayo. **Sammappadhāneti** sammappadhānasuttante. **Satipaṭṭhāneti** cattāro satipaṭṭhāne. **Jhānavimokkheti** jhānāni ceva vimokkhe ca uddissa pavattasuttante. **Gambhīrañāpacariyeti** khandhāyanadhātupaṭṭicasamuppādapāṭisaṃyuttasuttante.

Kalyāṇamittatādayoti kalyāṇamittatā sīlasaṃvaro abhisallekhakathā vīriyārambho nibbedhikapaññāti ime kalyāṇamittādayo **pañca dhammā**, ye “idha, meghiya, bhikkhu kalyāṇamitto hoti”tiādīnā **udāne** (udā. 31) kathitā. **Lokaṃ volokentassāti** āyasmato rāhulassa tāsāṅca devatānaṃ indriyaparipākaṃ passantassa. Tato yena andhavanaṃ, tattha divāvihārāya mahāsamāgamo bhavissatīti. Tathā hi vakkhati “**ettakāti** gaṇanāvasena paricchedo natthi”ti.

Rukkhapabbatanissitā **bhūmaṭṭhakā**, ākāsacārivimānavāsino **antalikkhaṭṭhakā**. **Dhammacakkhanti veditabbāni** catusaccadhammānaṃ dassanaṭṭhena.

Rāhulovādasuttavaṇṇanā niṭṭhitā.

Lokakāmaguṇavaggavaṇṇanā niṭṭhitā.

13. Gahapativaggo

1-3. Vesālīsuttādivaṇṇanā

124-126. Dvīsūti imasmiṃ gahapativagge paṭhamadutiyesu **tatiye ca vuttatthameva** pāṭhajātaṃ apubbaṃ natthīti attho.

4-5. Bhāradvājasuttādivaṇṇanā

127-128. Kāmaṃ aññepi pabbajitā yuttakāle piṇḍaṃ ulamānā carantiyeva, ayaṃ pana odarito, teneva kāraṇena pabbajitoti dassento “**piṇḍaṃ ulamāno**”tiādīmāha. **Ghaṃsantovāti** bhūmiyaṃ ghaṃsanto eva pattaṃ ṭhāpeti. **Parikkhīṇanti** samantato parikkhīṇaṃ. **Nāliko ...pe... jātaṃ**, atirekapattaṭṭhapanassa paṭikkhittatā aññaṃ na gaṇhāti. “**Indriyabhāvananti** cakkhādipañcindriyabhāvana”nti keci vadanti, tathā vipassanābhinivesaṃ katvā uparivipassanaṃ vaḍḍhitvāti adhippāyo. Apare pana “saddhāpañcamānaṃ indriyānaṃ vasena vipassanābhinivesaṃ katvā tena sukkena abhiññāpahānānaṃ sampādanavasena indriyaṃ bhāvetvā”ti vadanti.

Upasaṅkamatīti ettha yathā so rājā upasaṅkami, taṃ āgamanato paṭṭhāya dassetaṃ “**thero kirā**”tiādi āradhamaṃ. **Mahāpānaṃ** nāma aññaṃ kammaṃ akatvā pānapasuto hutvā sattāhaṃ

tadanurūpaparijanassa surāpivanaṃ. Tenāha “**mahāpānaṃ nāma pivitvā**”ti. Sālithusehīti rattasālithusehi. **Dayhamānaṃ viya** kipillikadaṃsanajātāhi dukkhavedanāhi. **Mukhasattīhi vijjhimsu** vallabhatāya. Itthilolo hi so rājā.

Paveṇinti tesam samādānapaveṇiṃ brahmacariyapabandhaṃ. **Paṭipādentīti** sampādentī. **Garukārammaṇanti** garukātabbaārammaṇaṃ, avītikkamitabbārammaṇanti attho. **Assāti** rañño. **Cittaṃ anotarantanti** pasādavīthiṃ anotarantaṃ anupagacchantaṃ. **Viheṭhetunti** vibādhituṃ.

Lobhassa aparāparuppattiyā bahuvacanavasena “**lobhadhammā**”ti vuttaṃ. **Uppajantītipi attho yeva**, yasmā uppajjamāno lobhadhammo attano hetupaccaye pariggahāpento jānāpento viya sahati pavattatīti. **Imameva kāyanti** ettha samūhatthe eva **kāya**-saddo gabbhāsayaḍiṭṭhānesu uppajjanadhammasamūhavisayattā, itare pana kāyūpalakkhitāya “kāyo”ti veditabbā. **Uttānameva heṭṭhā** vuttanayattā.

Bhāradvājasuttādivaṇṇanā niṭṭhitā.

6. Ghositasuttavaṇṇanā

129. Rūpā ca manāpāti nīlādibhedā rūpadhammā ca manasā manuññā piyarūpā saṃvijjanti, idaṅca sukhavedanīyassa phassassa sabhāvadassanattamaṃ. Evaṃ “**rūpā ca manāpā upekkhāvedaniyā**”ti etthāpi yathārahaṃ vattabbaṃ. **Cakkhuvīññāna...pe... phassanti** vuttaṃ. Upanissayakoṭiyā hi cakkhuvīññānasampayuttaphasso sukhavedanīyo, na sahaajātakotiya. Tenāha – “**ekaṃ phassaṃ paṭicca javanavasena sukhavedanā uppajjati**”ti. **Sesapadesūti** “saṃvijjati kho, gahapati, sotadhātū”ti āgatesu pañcasu koṭṭhāsesu.

Tevīsati dhātuyo kathitā channaṃ dvārānaṃ vasena vibhajjagahaṇena. **Vatthunissitanti** hadayaavatthunissitaṃ. Pañcadvāre vīsati, manodvāre tisso **evaṃ tevīsati**.

Ghositasuttavaṇṇanā niṭṭhitā.

7-8. Hālidikānisuttādivaṇṇanā

130-131. Taṃ itthetanti cakkhunā yaṃ rūpaṃ diṭṭhaṃ, taṃ itthanti attho. **Taṃ sukhavedaniyanti** taṃ sukhavedanāya upanissayakoṭiyā paccayabhūtaṃ cakkhuvīññānañceva, yo ca yathārahaṃ upanissayakoṭiyā vā, anantaro ce anantarakotiya vā, saha jāto ce sampayuttakoṭiyā vā, sukhavedanāya paccayo phasso. Taṃ sukhavedaniyañca phassaṃ paṭicca uppajjati sukhavedanāti yojanā. **Esa nayo sabbattha** sabbesu sesesu sattasu vāresu. **Manodhātuyeva vā samānāti** abhidhammanayena. Suttantanayena pana suññataṭṭhena nissattanijjivaṭṭhena ca manodhātusamaññaṃ labhateva. **Aṭṭhamam uttānameva** heṭṭhā vuttanayattā.

Hālidikānisuttādivaṇṇanā niṭṭhitā.

9. Lohicasuttavaṇṇanā

132. Tepi māṇavakātveva vuttā, na brāhmaṇakumārā eva. **Seleyyakānīti** aññamaññaṃ silissanalaṅghanakīlanāni.

Upaṭṭhānavasena ibhaṃ harantīti **ibbhā**, hatthigopakā. Te pana nihīnakuṭumbassa bhoggaṃ upādāya gahapatibhāvaṃ upādāya “gahapatikā”tipi vuccantīti āha “**gahapatikā**”ti. **Kaṇhāti** kaṇhābhijātikā. **Raṭṭhaṃ bharantīti** yasmim raṭṭhe vasanti, tassa raṭṭhassa balim bharaṇena, attano vā

kuṭumbassa bharaṇena bharatā. **Pariyāyantā**ti parito saṃcarantā kīḷanti.

Sīlajēṭṭhakāti sīlappadhānā. Ye purāṇaṃ saranti, te sīluttamā ahesuṃ. **Dvārāni** cakkhādidvārāni.

Apakkamivā apētā virahitā hutvā. **Visamānī**ti vigatasamāni duccharitasabhāvāni.
Nānāvidhadaṇḍā nānāvidhadaṇḍanipātā.

Anāhārakāti kiñci abhuñjanakā. Paṅko viya **paṅko**, malaṃ. Dantapaṅko purimapadalopena paṅkoti vuttoti “**paṅko nāma dantamala**”nti vuttaṃ. Ajeḥi kātābbakānaṃ akopetvā karaṇaṃ samādānavasena **vataṃ**. Esa nayo sesesupi. Kohaññaṃ nāma attani vijjamānadosaṃ paṭicchādetvā asantaṅṅapapakāsanāti āha – “**paṭicchanna...pe... kohaññañcevā**”ti. **Parikkhārabhaṇḍakavaṇṇā**ti parikkhārabhaṇḍā kappakāti. Te ca kho attano jīvikatthāya āmisakiñjakkhassa attanibandhanatthāya amocanattāya katā.

Akhilanti cetokhilarahitaṃ brahmavihārasena. Tenāha “**muḍu athaddha**”nti.

Adhimuttoti abhirativasena yuttapayutto. **Parittacittoti** parito khaṇḍitacitto. **Appamāṇacittoti** ettha “ko aya”nti paṭikkhituṃ sakkuṇeyyacitto.

Lohiccaṣuttavaṇṇanā niṭṭhitā.

10. Verahaccānisuttavaṇṇanā

133. Brāhmaṇiṃ dhammasavanāya codento māṇavako “**yagghe**”ti avoca. Tenāha “**yaggheti codanatthe nipāto**”ti.

Verahaccānisuttavaṇṇanā niṭṭhitā.

Gahapativaggavaṇṇanā niṭṭhitā.

14. Devadahavaggo

1. Devadahasuttavaṇṇanā

134. **Manaṃ ramayantā**ti āpāthagatā manassa ramaṇavasena piyāyitabbatāvasena pavattantā.

2. Khaṇasuttavaṇṇanā

135. **Chaphassāyatānikā**ti chahi phassāyatanehi anīṭṭhasaṃvedaniyā.
Chadvārāphassapaṭiviññattīti chahipi dvārehi ārammaṇassa paṭisaṃvedanā hotiyeva sabbaso dukkhānubhavanatthaṃ. **Tāvatiṃsapuranti** sudassanamahānagaraṃ. **Abhāvo nāma natthi** sabbathā sukhānubhavanato. **Nirayeti** iminā duggati bhavasāmaññaena itarāpāyāpi gahitā eva.
Maggabrahmacariyavāsaṃ vasituṃ na sakkāti iminā pana sabbesampi acchindikatthānānaṃ gahaṇaṃ daṭṭhabbaṃ. **Imevā**ti imasmiṃ manussaloke eva. **Apāyopi paññāyati** apāyadukkhasadisassa dukkhassa kadāci paṭisaṃvedanato. **Saggopi paññāyati** devabhogasadisasampattiyā kadāci paṭilabhitabbato.

Ayaṃ kammabhūmīti ayaṃ manussaloko purisathāmakaraṇāya kammabhūmi nāma tāsāṃ yogyaṭṭhānabhāvato. Tattha padhānakammaṃ dassento “**idha maggabhāvanā**”ti āha. **Ṭhānānī**ti karaṇāni. **Samvejanīyānī**ti samvegajananāni bahūni jātiādīni. Tathā hi jāti, jarā, byādhi, maraṇaṃ,

apāyabhavaṃ, tatthapi nirayūpapattihetukaṃ, tiracchānupapattihetukaṃ, asūrakāyūpapattihetukaṃ, atīte vaṭṭamūlakaṃ, anāgate vaṭṭamūlakaṃ, paccuppanne āhārapariyeṭṭhimūlakanti bahūni saṃvegavatthūni paccavekkhitvā **saṃvegajāto** sañjātasamvego yoniso padhānamanuyuñjassu. **Saṃvegāti** saṃvegamaṃpajjassu.

Khaṇasuttavaṇṇanā niṭṭhitā.

3. Paṭhamarūpārāmasuttavaṇṇanā

136. Sammuditā sammodappattā, **pamoditā** sañjātapamodā. **Dukkhāti** dukkhavanto sañjāta dukkhā. Tenāha “**dukkhitā**”ti. Sukhaṃ etassa atthīti **sukho**, sukhi. Tenāha “**sukhito**”ti. **Yattakā** rūpādayo dhammā loka **atthīti vuccati**. **Passantānanti** saccapaṭivedhena sammadeva passantānaṃ. “**Paccanīkaṃ hotī**”ti vatvā taṃ paccanīkabhāvaṃ dassetuṃ “**loko hī**”tiādi vuttaṃ. **Asubhāti** “āhū”tipadaṃ ānetvā sambandho. **Sabbametanti** “sukhaṃ diṭṭhamariyebhi...pe... tadariyā sukhatō vidū”ti ca vuttaṃ. Sabbametaṃ nibbānameva sandhāya vuttaṃ. Nibbānameva hi ekantato sukhaṃ nāma.

Pañcanavuttipāsaṇḍino tesaṇca pāsaṇḍibhāvo papañcasūdaniṭṭhakathāyaṃ pakāsito eva. **Kilesanīvaraṇena nivutānanti** kilesakhandhā kilesanīvaraṇaṃ, tena nivāritānaṃ. **Nibbānadassanaṃ** nāma ariyamaggo, tena tassa paṭivijjhanaṇca **kāḷameghaavacchāditaṃ viya candamaṇḍalaṃ**.

Paricchinditvāti asubhabhāvaparicchindanena sammāviññānadassanena ca paricchinditvā. **Maggadhammassāti** ariyamaggadhammassa.

Anupannehīti anu anu avihāya paṭipannehi. **Ko nu añño jānituṃ arahati**, añño na jānātīti dasseti.

Paṭhamarūpārāmasuttavaṇṇanā niṭṭhitā.

4-12. Dutiyarūpārāmasuttādivaṇṇanā

137-145. Suddhikaṃ katvā gāthābandhanena vinā kevalaṃ cuṇṇiyapadavaseneva. **Tathā tathāti** ajjhattikāni bāhirāni ca āyatanāni aniccalakkhaṇena dukkhānattalakkhaṇehi ca yojetvā dassanavasena.

Dutiyarūpārāmasuttādivaṇṇanā niṭṭhitā.

Devadahavaggavaṇṇanā niṭṭhitā.

15. Navapurāṇavaggo

1. Kammanirodhasuttavaṇṇanā

146. Sampatī vijjamaṇassa cakkhussa taṃnibbattassa kammaṃ ca adhippetattā “**na cakkhu purāṇaṃ, kammameva purāṇa**”nti vatvā yathā tassa cakkhussa purāṇapariyāyo vutto, taṃ dassento āha – “**kammato panā**”tiādi. **Paccayanāmenāti** purimajātisamaṃsiddhattā “purāṇa”nti vattabassa paccayabhūtaṃ kammaṃ nāmena. **Evaṃ vuttanti** “purāṇakamma”nti evaṃ vuttaṃ. **Paccayehi abhisamāgantvā katanti** taṃhāvijjāpaccayehi abhimukhabhāvena samāgantvā samecca nibbattitaṃ. **Cetanāyāti** kammacetanāya. **Pakappitanti** abhisamīhitaṃ. **Vedanāyāti** attānaṃ nissāya ārammaṇaṃ katvā pavattāya vedanāya. **Vatthūti** nibbattikāraṇaṃ pavattaṭṭhānanti vipassanāpaññāya **passitabbaṃ**. **Kammaṃ nirodhenāti** kilesānaṃ anuppādanirodhasiddhena kammaṃ nirodhena. **Vimuttiṃ phusatīti** arahattaphalavimuttiṃ pāpuṇāti. **Ārammaṇabhūto nirodho** nibbānaṃ “**kammanirodho**”ti

vuccati, “kammaṃ nirujjhati etthā”ti katvā. “Jhāyatha, bhikkhave, mā pamādatthā”ti vuttattā “pubbabhāgavipassanā kathitā”ti vuttaṃ.

Kammanirodhasuttavaṇṇanā niṭṭhitā.

2-5. Aniccanibbānasappāyasuttādivaṇṇanā

147-150. Nibbānassāti nibbānādhigamassa, kilesanibbānasseva vā. **Upakārapaṭipadanti** upakārāvahaṃ paṭipadaṃ. **Catūsūti** dutiyādīsu catūsu. Nibbānasappāyā paṭipadā desitāti katvā “saha vipassanāya cattāro maggā kathitā”ti vuttaṃ.

Aniccanibbānasappāyasuttādivaṇṇanā niṭṭhitā.

6-7. Antevāsikasuttādivaṇṇanā

151-152. Anta-saddo samīpatthe vattati “udakantaṃ vananta”ntiādīsu, kilesa pana atīāsanne vasati abbhantaravuttitāyāti “antevāsika”nti vutto vibhattialopena yathā “vanekusalo, kulerukkā”ti. Tenāha – “anantevāsikanti antovasanakilesavirahita”nti. **Ācaraṇakakilesavirahitanti** samudācaraṇakilesarahitaṃ. **Anto assa vasantīti** assa puggalassa anto abbhantare citte vasanti pavattanti. **Te etaṃ adhibhavanti** te kilesā etaṃ puggalaṃ abhibhavivā attano vase vattenti. Tenāha – “ajjhottharanti sikkhāpentī vā”ti. **Tehi ācariyehīti** tehi kilesasaṅkhātehi satte attano gatiyaṃ ṭhapentehi ācariyehi. **Sattamaṃ heṭṭhā kathitanayamevāti** yasmā heṭṭhā khandhavasena desanā āgatā, idha āyatanavasenāti ayameva viseso.

Antevāsikasuttādivaṇṇanā niṭṭhitā.

8. Atthinukhopariyāyasuttavaṇṇanā

153. Pariyāyati parigacchati phalaṃ etassāti **pariyāyo** hetūti āha – “yaṃ pariyāyanti yaṃ kāraṇa”nti. Paccakkhadīṭṭhe aviparīte atthe pavattasaddhā **paccakkhasaddhā** yathā “sammāsambuddho bhagavā, svākhāto dhammo”ti (ma. ni. 1.288) ca. **Evaṃ kirāti** iti kirāya uppanno saddahanākāro saddhāpatirūpako. **Etanti** “aññatreva saddhāyā”ti etaṃ vacanaṃ. **Rucāpetvāti** kiñci atthaṃ attano matiyā rocetvā. **Khamāpetvāti** tasseva vevacanaṃ, cittaṃ tathā khamāpetvā. Tenāha – “atthetanti gahaṇākāro”ti. Paramparāgatassa atthassa evaṃ kirassāti **anussavanaṃ**. **Kāraṇaṃ cintentassāti** yuttim cintentassa. **Kāraṇaṃ upaṭṭhātīti** “sādhū”ti attano cittassa upaṭṭhāti. **Atthetanti** “etaṃ kāraṇaṃ evamayamattho yujjati”ti cittena **gahaṇaṃ**. **Ākāraparivitakkoti** yuttiparikappanā. **Laddhīti** nicchayena gahaṇaṃ, sā ca kho dīṭṭhi ayāthāvaggahaṇena aññānamevāti daṭṭhabbaṃ. **Tanti** laddhiṃ. **Atthesāti** esā laddhi mama uppannā atthi yuttarūpā hutvā upalabbhati. Evaṃ gahaṇākāro **dīṭṭhinijjhānakkhanti nāma**, paṭhamuppannaladdhisāṅkhātāya dīṭṭhiyā nijjhānaṃ khamanākāro **dīṭṭhinijjhānakkhanti nāma**. **Pañca ṭhānānīti** yathāvuttāni saddhādīni pañca kāraṇāni. **Muñcitvā** aggahetvā. Heṭṭhimamaggavajjhānaṃ rāgādīnaṃ abhāvaṃ sandhāya “natthi me ajjhataṃ rāgadosamoho”ti ayaṃ sekkhānaṃ paccavekkhāṇā, sabbaso abhāvaṃ sandhāya asekkhānanti āha – “sekkhāsekkhānaṃ paccavekkhāṇā kathitā”ti. “Santaṃ vā ajjhatta”ntiādīnā **sekkhānaṃ**, “asantaṃ vā ajjhatta”ntiādīnā **asekkhānaṃ paccavekkhāṇā kathitāti** daṭṭhabbaṃ.

Atthinukhopariyāyasuttavaṇṇanā niṭṭhitā.

9-10. Indriyasampannasuttādivaṇṇanā

154-155. “Sampannasīlā, bhikkhave, viharathā”tiādīsu (ma. ni. 1.64) viya paripuṇṇattho idha

sampanna-saddoti āha “**paripuṇṇindriyo**”ti. Indriyehi samannāgatattā paripuṇṇindriyo nāma hotīti sambandho. Evaṃ sati samannāgamasampatti vuttā hotīti āsaṅkanto “**cakkhādīni vā**”tiādimāha. **Taṃ sandhāyāti** dutiyavikappena vuttamatthaṃ sandhāya. Heṭṭhā khandhiyavagge khandhavasena desanā āgatā, idha āyatanavasenāti āha “**vuttanayamevā**”ti.

Indriyasampannasuttādivaṇṇanā niṭṭhitā.

Navapurāṇavaggavaṇṇanā niṭṭhitā.

Tatiyo paṇṇāsako.

16. Nandikkhayavaggo

1-4. Ajjhattanandikkhayasuttādivaṇṇanā

156-159. Atthatoti sabhāvato. Ñāṇena ariyato ñātabbato **attho**, sabhāvoti. Evañhi abhijjanasabhāvo nandanatṭhena **nandī**, rañjanatṭhena **rāgo**. **Vimuttivasenāti** vimuttiyā adhigamavasena. **Ettāti** imasmiṃ paṭhamasutte. **Dutiyādīsūti** dutiyatatiyacatutthesu. **Uttānameva** heṭṭhā vuttanayattā.

Ajjhattanandikkhayasuttādivaṇṇanā niṭṭhitā.

5-6. Jīvakambavanasamādhisuttādivaṇṇanā

160-161. Samādhivikalānaṃ cittekaggataṃ labhantānaṃ, paṭisallānavikalānaṃ kāyavivekañca cittekaggatañca labhantānanti yojanā. **Pākaṭaṃ hotīti** vibhūtaṃ hutvā upaṭṭhāti. **Okkhāyati paccakkhāyatīti** catusaccadhammānaṃ vibhūtabhāvena upaṭṭhānassa kathitattā vuttaṃ – “**dvīsūpi... pe... kathitā**”ti.

Jīvakambavanasamādhisuttādivaṇṇanā niṭṭhitā.

7-9. Koṭṭhikaaniccasuttādivaṇṇanā

162-164. Aniccānupassanādayo eva **vimuttiparipācaniyā dhammā** nāma. Therassa tadā saddhādīni indriyāni na paripākaṃ upagatāni, thero imāhi desanāhi indriyaparipākamagamāsi.

Koṭṭhikaaniccasuttādivaṇṇanā niṭṭhitā.

10-12. Micchādiṭṭhipahānasuttādivaṇṇanā

165-167. Pāṭiyekanti visuṃ visuṃ. **Vuttanayenevāti** heṭṭhā vuttanayeneva apubbassa vattabbassa abhāvā.

Micchādiṭṭhipahānasuttādivaṇṇanā niṭṭhitā.

Nandikkhayavaggavaṇṇanā niṭṭhitā.

17. Saṭṭhipeyyālavaggo

1-60. Ajjhattaaniccachandasuttādivaṇṇanā

168-227. “Yaṃ, bhikkhave, aniccaṃ, tatra vo chando pahātabbo”tiādinā tesam tesam puggalānaṃ ajjhāsayavasena saṭṭhi suttāni kathitāni, tāni ca peyyālanayena desanaṃ āruḷhānīti “**saṭṭhipeyyālo nāma hotī**”ti vuttaṃ. Tenāha “**yāni panetthā**”tiādi.

Ajjhattaaniccachandasuttādivaṇṇanā niṭṭhitā.

Saṭṭhipeyyālavaggavaṇṇanā niṭṭhitā.

18. Samuddavaggo

1. Paṭhamasamuddasuttavaṇṇanā

228. Yadi “duppūraṇaṭṭhena samuddanaṭṭhenā”ti iminā atthadvayena sāgaro “samuddo”ti vuccati, cakkhussevetam nippariyāyato yujjati dassetum “**yadī**”tiādi vuttaṃ. Tattha **duppūraṇaṭṭhenā**ti pūretum asakkuṇeyyabhāvena. **Samuddanaṭṭhenā**ti sabbaso uparūparipakkhittagamanena. Mahāgaṅgādīmahānadīnaṃ mahatā udakoghena anusaṃvaccharaṃ anupakkhandamānopi hi samuddo pāripūriṃ na gacchati, yañca bhūmipadesaṃ ottharati, taṃ samuddabhāvaṃ neti, abhāvaṃ vā pāpuṇāti apayāte samuddodake, taṃ vā anudakabhāvapattiyā atathameva hoti. Kāmañcesa duppūraṇaṭṭho samuddanaṭṭho sāgare labbhati, tathāpi taṃ dvayaṃ cakkhusmiṃyeva visesato labbhati dasseto “**tassa hī**”tiādimāha. **Samosarantanti** sabbaso nīlādibhāgehi osarantaṃ, āpāthaṃ āgacchantanti attho. **Kātum na sakkoti** duppūraṇiyattā. **Sadosagamanena gacchati** sattasantānassa dussanato. Dussanaṭṭhatā cassa cakkhudvārikatanhāvasena veditabbā. Yathā samudde aparāparaṃ parivattamāno ūmiyā vego samuddassāti vuccati, evaṃ cakkhusamuddassa purato aparāparaṃ parivattamānaṃ nīlādibhedaṃ rūpāramaṇaṃ cakkhussāti vattabbaṃ arahati anaññasādhāraṇaṭṭhāti vuttaṃ “**rūpamayo vego**”ti. **Asamapekkhite**ti sammādassane rūpe manāpabhāvaṃ amanāpabhāvañca gahetvā, “idaṃ nāma mayā diṭṭha”nti anupadhārentassa kevalaṃ samūhaghanavasena gaṇhantassa gahaṇaṃ asamapekkhanaṃ. **Sahatī**ti adhibhavati, taṃnimittaṃ kañci vikāraṃ nāpajjati.

Ūmīti vīciyo. **Āvaṭṭo** āvaṭṭanavasena pavattaṃ udakaṃ. Gāharakkhasamakārādayo **gāharakkhaso**. Yathā samudde ūmiyo uparūpari vattamānā attani patitapuggalaṃ ajjhottharivā anayabyasanaṃ āpādentī, tathā āvaṭṭagāharakkhasā. Evamete rāgādayo kilesā sayam uppannakasatte ajjhottharivā anayabyasanaṃ āpādentī, kilesuppattinimittatāya sattānaṃ anayabyasanaṃ āpattihetubhūtaṃ ūmibhayassa ārammaṇavasena cakkhusamuddo “saūmisāvaṭṭo sagāho sarakkhaso”ti vutto.

Ūmibhayanti ettha bhāyati etasmāti bhayaṃ, ūmīva bhayaṃ ūmibhayaṃ. Kujjhanaṭṭhena **kodho**. Sveva cittassa ca abhimaddanavasenuppādanatthena daḷhaṃ āyāsanatthena **upāyāso**. Ettha ca anekavāraṃ pavattivā satte ajjhottharivā sīsaṃ ukkhipitum adatvā anayabyasanaṃ nipphādanena kodhūpāyāsassa **ūmisadisatā** daṭṭhabbā. Tathā kāmaguṇā kilesābhībhūte satte māne viya rūpādivisayaśākhāte attani saṃsāretvā yathā tato bahībhūte nekkhamme cittampi na uppajjati, evaṃ āvaṭṭetvā byasanaṃ nipphādanena **āvaṭṭasadisatā** daṭṭhabbā. Yadā pana gāharakkhaso ārakkharahitaṃ attano gocaraḥūmigataṃ purisaṃ abhibhuyya gahetvā agocare ṭhitampi gocaraṃ netvā bheravarūpadassanādīnā attano upakkamaṃ kātum asamatthaṃ katvā anvāvisitvā vaṇṇabalabhogaāyusukhehi viyojetvā mahantaṃ anayabyasanaṃ āpādeti, evaṃ mātugāmopi yonisomanasikārarahitaṃ avīrapurisaṃ attano rūpādīhi palobhanavasena abhibhuyya gahetvā vā vīrajātiyampi itthikuttabhūtehi attano hāvabhāvavilāsehi itthimāyāya anvāvisitvā vā avasaṃ attano upakāradhamme sīlādayo sampādetum asamatthaṃ karonto guṇavaṇṇādīhi viyojetvā mahantaṃ anayabyasanaṃ āpādeti, evaṃ mātugāmaṃ **gāharakkhasasadisatā** daṭṭhabbā. **Ūmibhayanti** lakkhaṇavacanaṃ. Yathā hi ūmī bhāyitabbaṭṭhena bhayaṃ, evaṃ āvaṭṭagāharakkhasāpīti ūmiādibhayaṃ sabhayanti attho veditabbo. **Antaṃ** avasānaṃ gato, evaṃ pāraṃ nibbānaṃ gatoti vuccati.

Paṭhamasamuddasuttavaṇṇanā niṭṭhitā.

2-3. Dutiyasamuddasuttādivaṇṇanā

229-230. Kilesānaṃ allabhāvūpanayananti āha “**temanatṭhenā**”ti. **Ariyasāvake**ti anāgāmino. Te hi kāmabhavavasena atintatāya na samunnā. **Tayo maccūti** kilesābhisaṅkhāradevaputtamāre. **Tīhi upadhīhīti** kilesābhisaṅkhārakāmaguṇānaṃ vasena tīhi upadhīhi. Khandhupadhinā pana so na nirūpadhi saupādisesasseva nibbānassa adhigatattā. **Gatoti** paṭipattigamanena gato.

Dutiyasamuddasuttādivaṇṇanā niṭṭhitā.

4-6. Khīrarukkhopamasuttādivaṇṇanā

231-233. **Appahīnatṭhenāti** maggena asamugghāṭitabhāvena. **Atthīti** vijjati. Sati paccaye vijjāmānakiccakaraṇato pariyuṭṭhānaṃ appakaṃ mūsikāvisaṃ viya **parittaṃ nāma hoti** appānubhāvattā. **Evarūpāpīti** appakāpi. **Assāti** appahīnakilesassa. **Adhimattānanti** iṭṭhānaṃ rajanīyānaṃ, vatthuvaseṇa parittakampi iṭṭhārammaṇaṃ adhimattameva. Tenāha “**nakhapiṭṭhippamāṇampī**”tiādi. **Daharotiādīni tīṇipi** padāni. **Ābhindeyyāti** bhindeyya. **Taṃ ubhayanti** taṃ cakkhurūpanti ubhayampi āyatanaṃ.

Khīrarukkhopamasuttādivaṇṇanā niṭṭhitā.

7. Udāyīsuttavaṇṇanā

234. **Itipīti** imināpi kāraṇena. **Aniccenāti** aniccabhāvena anattalakkhaṇaṃ kathitaṃ. Yasmā hetupaccayā viññāṇassa uppatti sati ca uppāde nirodhena bhavitabbaṃ, uppādavayavantaṭāya aniccaṃ viññāṇaṃ, yadi ca attā siyā paccayehi vinā sijjheyya, na ca tathāssa siddhi, tasmā “viññāṇaṃ anattā”ti aniccatāya anattatā kathitā.

Udāyīsuttavaṇṇanā niṭṭhitā.

8. Ādittapariyāyasuttavaṇṇanā

235. Kilesānaṃ anu anu byañjanato paribyattiyā uppattipaccayabhāvato **anubyañjanaṃ**, hatthapādādiavayavāti āha – “hatthā sobhanā”tiādi. **Nimittaggāhoti** kilesuppattiyā nimittabhūto gāho. **Samsandevā gahaṇanti** avayave samodhānetvā “itthipuriso”tiādinā ekajjhaṃ gahaṇaṃ. **Vibhattigahaṇanti** vibhāgena anavasesaggahaṇaṃ. **Kumbhīlasadisoti** kumbhīlagāhasadiso. Tenāha – “**sabbameva gaṇhāti**”ti hatthapādādīsu taṃ taṃ koṭṭhāsaṃ vibhajitvā **gahaṇaṃ rattapāsadiso** jalūkaḡahasadiso. **Ekajavanavārepi labbhantīti** idaṃ cakkhudvārānusāreṇa uppannamanodvārikajavanaṃ sandhāya vuttaṃ.

Nimittassādena ganthitanti yathāvutte nimitte assādagāhena ganthitaṃ sambaddhaṃ.

Bhavaṅgenevāti mūlabhavaṅgeneva. **Kilesabhayaṃ dassentoti** tathā kilesuppattiyā sati akusalacittena antaritaṃ ce maraṇacittaṃ bhavēyya, ekantato niraye vā tiracchānāyoniyā vā uppatti siyāti kilesānaṃ bhāyitabbaṃ dassento. “**Samayavasena vā evaṃ vutta**”nti vatvā tamatthaṃ vivaranto “**cakkhudvārasmīhī**”tiādimāha. **Rattacittaṃ vāti** rāgavasena rattacittaṃ vā. Duṭṭhacittena kathaṃ ārammaṇarasānubhavananti? Domanassavedanuppatti eva tassa ārammaṇarasānubhavanaṃ daṭṭhabbaṃ. **Imassa samayassāti** maraṇasamayassa.

Ubhinnaṃ nāsacchiddānaṃ majjhe ṭhita-aṭṭhitudanaṃ saha khuraṭṭhena chindanaṃ. **Daṇḍakavāsīti** dīghadaṇḍakā mahāvāsī. **Nipajjitvā niddokkamananti** iminā pacalāyikaniddaṃ paṭikkhipati. Tattha hi kadāci antarā micchāvitakkānaṃ sallakānaṃ avasaro siyā, nattheva nipajjitvā mahāniddaṃ okkantakāle.

Vitakkānanti micchāvitakkānaṃ.

Ādittapariyāyasuttavaṇṇanā niṭṭhitā.

9-10. Paṭhamahatthapādopamasuttādivaṇṇanā

236-237. Navamaṃ “paññāyatī”ti vuccamāne bujjanakānaṃ ajjhāsayaavasena vuttanti āha – “**dasame na hotīti vuccamāne**”tiādi. Ettakameva hi dvinnaṃ suttānaṃ visesoti.

Paṭhamahatthapādopamasuttādivaṇṇanā niṭṭhitā.

Samuddavaggavaṇṇanā niṭṭhitā.

19. Āsīvisavaggo

1. Āsīvisopamasuttavaṇṇanā

238. Ye bhikkhū tadā bhagavantaṃ parivāretvā nisinnā, tesu keci ekavihārino, keci attadutiya, keci attatatiyā, keci attacattutthā, keci attapañcamā hutvā araññāyatanesu viharantīti vuttaṃ – “**ekacārika... pe... pañcacārike**”ti. Samānajjhāsayatā **sabhāgavuttino**. Kammatṭhānānuyuñjanassa **kārake**. Tato eva tattha **yuttapayutte**. **Puggalajjhāsayena** kāraṇabhūtena. **Paccayabhūtaṃ** apassayabhūtaṃ. “Seyyathāpi, bhikkhave”ti ārabhitvā yāva “tiṇṇo pāraṅgato thale tiṭṭhati brāhmaṇo”ti ayaṃ mātīkānikkhepo. Tesam mātīkāya vitthārabhājanaṃ. **Vāsanā bhavissatīti** vāsanāvahaṃ bhavissati. **Sineruṃ ukkhipanto viyāti**tiādi imissā desanāya anaññasādhāraṇatāya sudukkarabhāvadassanaṃ.

Mañcaṭṭhesu mañcasamaññā viya mukhaṭṭhaṃ viyaṃ “mukha”nti adhippetam. Sukkhakaṭṭhasadisabhāvāpādanato “kaṭṭha”nti vuccatīti kaṭṭhaṃ mukhaṃ etassāti **kaṭṭhamukho**, daṃsanādinā kaṭṭhasadisabhāvavakaro sappo. Atha vā kaṭṭhasadisabhāvāpādanato kaṭṭhaṃ viyaṃ vā mukhe etassāti **kaṭṭhamukho**. Iminā nayena sesapadesupi attho veditabbo. **Ime cattāro**ti ime visakiccabhedena cattāro. Idāni taṃ nesaṃ visakiccabhedam dassetuṃ “**tesū**”tiādi vuttaṃ. **Ayasūlasamappitaṃ viyāti** abbhantare ayasūlam anuppavesitaṃ viya. **Pakkapūtipanasam viyāti** paccivā kālātikame kuthitapanasaphalaṃ viya. **Caṅgavāreti** rajakānaṃ khāraparissāvane surāparissāvane vā. Anavasesam chijjanena **asanipātāṭṭhānaṃ viya**. **Mahānikhādanenāti** mahantena nikhādanena.

Visavegavikārenāti visavegagatena vikārena. **Vātenāti** tassa sappassa sarīraṃ phusitvā uggatavātena. Nāsavāte pana vattabbameva natthi. **Puggalapaṇṇattivāsenāti** tesameva soḷasannaṃ sappānaṃ āgatavisotītiādi puggalanāmassa vasena **catusaṭṭhi honti** paccekaṃ catubbidhabhāvato. **Āgatavisoti** āgacchavisoti, sīghataraṃ abhiruhanavisoti attho. **Ghoravisoti** kakkhaḷavisoti, duttikicchavisoti. **Ayaṃ sītaudakaṃ viya hoti** gāḷhadubbinimmocayabhāvena. Udakasappo hi ghoravisoti hoti yevāti vuttaṃ – “**udakasappādīnaṃ viyaṃ viyā**”ti. **Paññāyatīti** gaṇḍapiḷakādivasena paññāyati. **Anelakasappo** nāma mahāsīvisoti. **Nilasappo** nāma sākhaṇṇo rukkhaggādīsū vicaraṇakasappo. **Iminā upāyenāti** yoyaṃ kaṭṭhamukhesu daṭṭhavisānaṃyeva “āgatavisoti no ghoravisoti”tiādinā catubbidhabhāvato, iminā upāyena. **Kaṭṭhamukhe daṭṭhavisādayoti** kaṭṭhamukhesu daṭṭhavisoti, phutṭhavisoti, vātavibhoti tayo, **pūtimukhādīsū ca daṭṭhavisādayo** cattāro cattāro veditabbo.

Ekekanti catusaṭṭhiyo ekekaṃ. **Catudhāti** aṇḍajādivibhāgena catudhā vibhajitvā. **Chapaṇṇāsānāti** chapaṇṇāsādhikāni. **Gatamaggassāti** yathāvuttasaṅkhyāgatamaggassa **paṭilomato saṃkhippamānā** anukkamena cattārova honti. **Kulavāsenāti** kaṭṭhamukhādijātivāsenā.

Sakalakāye āsiñcivā viya ṭhapitavisāti hi tesam phuṭṭhavisatā, vātavisatā vuccati. **Evanti** “āsittavisā”tiādinā. **Etthāti** āsivisasadde **vacanattho** niruttinayena **veditabbo**. **Uggatatejāti** udaggatejā, attano visatejena nesam kurūradabbatā vā. **Dunnimmaddanavisāti** mantāgadehi animmaddanīyavisā. **Cattāro āsivīsāti** ettha **iti**-saddo ādiattho. Tenettha avasesapāḷim saṅgaṇhāti.

Āsivisesūti ime āsivīsā daṭṭhavisā evāti veditabbā. **Sariraṭṭhakesuyevāti** tena purisena tesam kassaci anīṭṭhassa akatattā āyusesassa ca vijjamānattā nam na daṃsimṣūti daṭṭhabbam. **Pucchi** yathābhūtaṃ pavedetukāmo. **Durupaṭṭhāhāti** durupaṭṭhānā. **Sotthimaggoti** sotthibhāvassa upāyo.

Antaracaroti antaram carā sukhasattu vissāsaghātī. Tenāha “**vadhako**”ti. Idāni tāsam pesane kāraṇam dassetuṃ “**paṭhama**”ntiādi vuttaṃ. Abhimukhagataṃ viya **abhimukhagataṃ**. Īdisīpi hi vacoyutti loke nirūpīyati santiyaṃ purisaṃ ṭhapetīti viya. Tasmā **abhimukhagatanti** abhimukham tena sampattanti attho. **Vaṅkasaṅṭhānaṃ phalakaṃ** rukkhamūle āgatāgatānaṃ nisīdanatthāya **atthataṃ**.

Aritthattho puriso santāreti etāyāti **santāraṇī**. Orimatīrato uttaraṇāya setu **uttarasetu**. Ekena dvīhi vā gantabbo rukkhamayo setu **rukkhasetu**. Jaṅghasatthena gamanayoggo setu **jaṅghasetu**. Sakaṭena gantuṃ sakuṇeyyo **sakaṭasetu**. **Na kho esa brāhmaṇo** paramatthato. Tadattho pana ekadesena sambhavatīti tathā vuttanti dassento “**ettakānaṃ paccatthikānaṃ bāhitattā**”ti āha. **Desananti** uddesadesanaṃ. **Vinivattenti** paṭisaṃharanto. **Na laddho vatāsīti** na laddho vata āsi.

Rājā viya kammaṃ sattesu issariyassa vattāpanato. **Rājā...pe... puthujjano** vattadukkhasaṅkhātāparādhatāya. **Ñāṇapalāyanenāti** mahābhūtehi nibbinditvā virajjitvā vimuccitukāmatāvasena uppannañāṇapalāyane maggādhigamasiddheneva ñāṇapalāyanena. Evañhettha upamāsaṃsandanaṃ matthakaṃ pāpitameva hoti.

Yatheva hītiādinā ekadesanāsamudāyassa nidassanaṃ āradham. Yathāvuttavacanam aṭṭhakathācariyānaṃ vacanena samattheti “**patthaddho bhavati**”tiādinā. Tattha **kaṭṭhamukhena vāti vā**-saddo upamattho. Yathā kaṭṭhamukhena sappena daṭṭho patthaddho hoti, evaṃ pathavīdhātuppakopena so kāyo kaṭṭhamukheva hoti, kaṭṭhamukhagato viya patthaddho hotīti attho. Atha vā **vā**-saddo avadhāraṇattho. So “pathavīdhātuppakopena vā”ti evaṃ ānetvā sambandhitabbo. Ayañhettha attho – kaṭṭhamukhena daṭṭhopi kāyo pathavīdhātuppakopeneva patthaddho hoti, tasmā pathavīdhātuyā aviyutto so kāyo sabbadā kaṭṭhamukhagato viya hotīti. **Vā**-saddo vā aniyamattho. Tatrāyamattho – kaṭṭhamukhena daṭṭho kāyo patthaddho hoti vā, na vā mantāgadavasena. Pathavīdhātuppakopena pana mantāgadarahito so kāyo kaṭṭhamukhagato viya hoti ekantapatthaddhoti. Tattha **kāyoti** pakatikāyo. **Pūtikoti** kuthito. **Santattoti** sabbaso tatto mahādāhappatto. **Sañchinnoti** sabbaso chinno cuṇṇavicuṇṇabhūto. Yādā kāyo patthaddhādibhāvappatto hoti, tadā puriso kaṭṭhamukhādisappaṃ mukhe vattamāno viya hotīti attho.

Visesatoti kaṭṭhamukhādivisesato ca pathavīdivisesato ca. **Anatthaggahaṇatoti**ādi acetanesupi bhūtesu sacetanesu viya anattāhādīnaṃ paccakkhatāya nibbedajananattham āradham. Tattha **āsayatoti** pavattiṭṭhānato. **Etesanti** mahābhūtānaṃ. **Sadisatāti** vammikāsayasusiragahanasaṅkāraṭṭhānāsayatāya ca sadisatā.

Paccattalakkhaṇavasenāti visuṃ visuṃ lakkhaṇavasena. Pathavīādīnaṃ kakkhaḷabhāvādi, taṃsamaṅgino puggalassa kakkhaḷabhāvāpādanādinā vikāruppādanato **visavegavikārato sadisatā** **veditabbā**.

Anatthāti byasanā. **Byādhinti** kuṭṭhādibyādhiṃ. **Bhave jātābhinandinoti** bhavesu jātiyā abhinandanasīlā. Pañcavokāre hi jātiyā abhinandanā nāma mahābhūtābhinandanā eva.

Durupaṭṭhānatarānīti duppaṭṭikāratarānī. **Durāsadāti** durupasaṅkamanā. “Upaṭṭhāmī”ti

upasaṅkamtum na sakkonti. Parijānāma kammanāmāni, upakārā nāma natthi.
Anantadosūpaddavatoti aparimāṇadosūpaddavahetuto. **Ekapakkhalanti** ekadukkham.

Rūpakkhandho bhijjāmāno cattāro arūpakkhandhe gahetvāva bhijjati arūpakkhandhānaṃ ekanirodhattā. **Vatthurūpampi gahetvāva bhijjanti** pañcavokāre arūpakkhandhesu bhinnesu rūpakkhandhassa avatṭhānābhāvato. **Ettāvatāti** lobhuppādanamattena. Paññā nāma attabhāve uttamaṅgaṃ paññuttarattā kusaladhammānaṃ, sati ca kilesuppattiyam paññāya anuppajjanato vuttam – **“ettāvatā paññāsisaṃ patitaṃ nāma hoti”**ti. **Yoniyo upaneti** tadupagassa kammaṃpaccayassa bhāve. **“Jātibhayaṃ, jarābhayaṃ, maraṇabhayaṃ, corabhaya”**ntiadinā āgatāni **pañcavīsati mahābhayāni**, **“hatthampi chindati”**tiadinā āgatāni **dvattiṃsa kammakāraṇāni āgatāneva honti** kāraṇassa samavattṭhitattā. **Nandīrāgo saṅkhārakkhandhoti** saṅkhārakkhandhapariyāpannattā vuttam.

Pāḷiyamyeva āgatā “cakkhuto cepi naṃ, bhikkhave”tiadinā. **Kiñci alabhivāti** tasmim suññagāme corānaṃ gayhūpagassa alābhavacaneneva tassa purisassa attano paṭisaraṇassa alābho vutto eva hotīti na uddhaṭo, purisaṭṭhāniyo bhikkhu, corā pana bāhirāyatanatṭhāniyā. **Abhinivisitvāti** vipassanābhinivesam katvā. **Ajjhattikāyatanavasena** desanāya āgatattā vuttam **“upādārūpakammaṭṭhānavasena”**ti.

Bāhirānanti bāhirāyatanānaṃ. **Pañca kiccānīti** corehi tadā kātābbāni pañca kiccāni. **Hatthasāranti** attano santake hatthehi gahetabbasāraḥḥaṇḍam. Pātanādivasena **hatthaparāmāsaṃ karonti**. **Pahāraṭṭhāneti** pahaṭṭhāne. Tṭhānaso tasmim eva khaṇeti vadanti. Attano sukhāvahaṃ kusaladhammaṃ **pahāya** dukkhāvahena akusalena samaṅgitā sukhāvahaṃ bhaṇḍam **pahāya bahi nikkhamaṃ viyāti** vuttam sukhaniṣṣayattā tassa. **Hatthaparā...pe... āpajjanakālo** guṇasarīrassa tadā pamādena bādhitattā. **Pahāra...pe... kālo** tato daḥḥataram guṇasarīrassa bādhitattā. **Pahāram...pe... assamaṇakālo** guṇasarīrassa maraṇappattisadisattā. **Avasesajanassa dāsaparibhogena paribhuñjitabbatā** aññathattappattigihibhāvāpattiyā nidassanabhāvena vuttā. Yaṃ “chasu dvāresu ārammaṇe āpāthagate”ti vuttam, tameva ārammaṇam niṣāya samparāyiko dukkhakkhandho veditabboti yojanā.

Rūpādīnīti rūpasaddagandharasāni. **Tesanti** yathāvuttabhūtopādārūpānaṃ. **Lahutādivasenāti** tesam lahutādivasena. **Duruttaraṇatṭhoti** uttaritum asakkuṇeyyabhāvo **oghaṭṭho**. **Vuttanayenāti** “sampayuttā vedanā vedanākkhandho”tiadinā vuttanayena. **Catumahābhūtādīhīti** ādisaddena upādānakkhandhādīnaṃ gahaṇam. **Cittakiriyadassanatthanti** cittaṃpayogadassanattham. **Vuttavāyānamevāti** “sammāvāyāmo”ti yo ariyamagge vutto. **Bhaddekarattādīnīti** “ajjeva kiccaṃ ātappa”ntiadinā (ma. ni. 3.272, 275, 276) vuttāni bhaddekarattasuttādīni.

Kuṇṭhapādoti chinnapādova hutvā gatavikalo. **Mānasaṃ bandhatīti** tasmim citte kiccaṃ nibandhati. “Ayaṃ ariyamaggo mayham oghuttaranupāyo”ti tatha cittassa sannitṭhānaṃ puna tatha pavattanaṃ vīriyārambho cittabandhanaṃ.

Tassa nāmarūpassa ime nandīrāgādayo taṇhāvijjādayoti katvā paccayo **dhammāyatane kadeso**. Ariyamagganibbānataṇhāvajjo idha dhammāyatane kadesoti ca. **Soḷasahākārehi** pīḷanādīhi soḷasahi ākārehi. Satipaṭṭhānavibhaṅge āgatanayena **saṭṭhinayasahashehi**. **Desanāpariyosāne...pe... patiṭṭhahimsūti** vipaṇcitanñū evettha gahaṇavasena adhigatavisesā paricchinditā. Te hi tadā dhammapaṭiggāhakabhāvena satthu santike sannisinnā. Ugghaṭṭitaññūnaṃ pana neyyānaṃca visesādhigamo aṭṭhakathāyaṃ na ruḥhoti idha na gahitoti.

Āsīvisopamasuttavaṇṇanā niṭṭhitā.

2. Rathopamasuttavaṇṇanā

239. Susaṃvutindriyassa bhojane mattañño satassa sampajānassa viharato kilesanimittaṃ dukkhaṃ anavasaraṃti **sukhasomanassabahulatā** vuttā. Yavati tena phalaṃ missitaṃ viya hotīti **yonī**, ekantikaṃ kāraṇaṃ. **Assāti** bhikkhuno. **Paripuṇṇanti** avikalaṃ. Anavasesaṃ āsave khepetīti **āsavakkhayo**, aggamaḃgo. **Yaṃ yanti** dandhaṃ majjhaṃ javoti javādīsu yaṃ yaṃ **gamaṇaṃ**. **Rakkhaṇatthāyāti** kilesacorehi rakkhaṇatthāya. **Veganiggahaṇatthāyāti** kilesahetukassa indriyavegassa niggaṇhanatthāya. **Nibbisevanatthāyāti** visevanassa vipphanditassa nirodhanāya. **Kilesūpasamatthāyāti** kilesānaṃ uparūpari samanatthāya vūpasamanatthāya.

Samaṇarati nāma samathavipassanāmaggaḃphalasukhāni. Dantānampi sindhavānaṃ sārathino payogena siyā kāci visevanamattāti tadabhāvaṃ dassento “ **nibbisevane katvā pesento**”ti vuttaṃ. **Ñāṇaṃ gacchatīti** asaṅgamaṇaṃ pavattati pageva indriyabhāvanāya katattā, kilesaniggahassa sukheveva siddhattā. **Dāyakaṃ** ajjhāsayaṃ **vaso** uḃaro lāmaḃko. **Deyyadhammaṃ** pamāṇaṃ **vaso** appakaṃ bahukaṇca.

Mahāmaṇḃapaṭṭhānaṃ nāma lohapāsādassa purato eva mahābhikkhusaṅghassa sannipātakāle tesam pahonakavasena mahāmaṇḃapassa kattabbaṭṭhānaṃ. **Gahaṇamānanti** parivisaḃgahaṇabhājanaṃ.

Pakatiyā bhattakāraḃicce adhigato **upaṭṭhākupāsako**. Mudusamakharasaṅgāṇitehi, dahanapacanabhajjanasaṅgāṇitehi vā **tīhi pākehi**.

Parisodhetvāti raṅṅo anucchavikabhāvaṃ parisodhetvā. **Bhūmiyaṃ chaḃḃesi** “bhikkhūnaṃ adatvā mayā mukhe pakkhitta”nti. **Mukhena gaṇhi** tassa niddosabhāvaṃ dassetuṃ. Mattaṃ jānāpetuṃ **pamajji**. “Tvam kuto āgato”ti pucchane **pamādaṃ āpajji**. **Anubhāgoti** avasiṭṭhabhāgo. **Idamatthiyanti** idaṃ payojaṇaṃ. **Itaranti** pāliyaṃ anāgatampi āhāre pamāṇajānaṃ.

Sayanaṃ seyyā, kāmaḃhogīnaṃ seyyā **kāmaḃhogiseyyā**. **Dakkhīṇapassena sayāno nāma natthi** dakkhīṇatthena kātabbakiccakaraṇato. **Tejussadattāti** idaṃ anutrāsasseva sīhassa sayananti dassetuṃ vuttaṃ. **Dve purimaḃpāde ekasmiṃ, pacchimaḃpāde ekasmiṃ ṭhāne ṭhapetvāti** hi idaṃ pādānaṃ avikkhattabhāvakaraṇadassanaṃ.

Catutthajjhānaseyyāti catutthajjhānikaṃ phalasaṃpattim vadati. Yebhuyyena hi tathāgatā phalasaṃpattim saṃpajjitvāva sayanti. Sā ca nesaṃ catutthajjhānato vuṭṭhāya, kilesapariniḃbānassa ca katattāti vadanti. **Idha sīhaseyyā āgatā** pādaṃ accādhāya pubbenāparaṃ ajaḃhitasamaḃlakkhaṇā seyyāti katvā. Tenāha “**ayaṃ hī**”tiādi. **Evanti** “dakkhiṇena passenā”tiādinā vuttākārena seyyaṃ kappeti.

Kathaṃ niddāyanto sato sampajāno hoti? Bhavaṅgacittena hi niddūpagamaṇanti adhippāyo. **Appahānenāti** tadadhimuttatāya tadappahānaṃ daṭṭhabbaṃ. Tathā tesu niddokkamaṇassa ādipariyosānesu ajaḃhitasatisampajāṅṅaṃ hoti. Tenāha – “**niddaṃ okkamaṇtopi sato sampajāno hoti**”ti. **Etaṃ paṇāti** “niddaṃ okkamaṇtopi sato sampajāno hoti”ti vuttanayaṃ vadati. **Ñāṇadhātukanti na rocayimsūti** niddokkamaṇepi jāgaraṇe pavattaṅṅasabhāvamevāti na rocayimsu poraṅṅā. Nirantaraṃ bhavaṅgacittesu vattamaṇesu satisampajāṅṅasambhavoti adhippāyo. Purimasmiṅhi naye satisampajāṅṅassa asaṃvaro, na bhavaṅgassa. Indriyasaṃvaro, bhojane mattaṅṅutā, jāgariyānuyogoti imehi **tivaṅgikā**, nimittānubyaṅṅanaparivajjanādi sabbam vipassanāpakkhikamevāti adhippāyo.

Tānevāti vipassanākkhaṇe pavattāni indriyādāni. **Yāva arahattā desanā** vitthārato **kathetabbā**. Pāliyaṃ pana “yoni cassa āraddhā hoti āsavānaṃ khayāyā”ti saṅkhepena kathitā.

Rathopamasuttavaṅṅanā niṭṭhitā.

3. Kummopamasuttavaṇṇanā

240. Aṭṭhikummoti piṭṭhiyaṃ tikhiṇaṭṭhiko kummo. **Tantibandhoti** byāvaṭo. **Samugge viya** attano kapāle **pakkhipitvā**. **Samodahanto** sammā odahanto ajjhattameva dahanto. **Ārammaṇakapāleti** ārammaṇakaṭāhe. **Samodahantoti** diṭṭhamattasseva ca gahaṇato manovitakke tattheva sammadeva odahanto. Tañhi visayavasena pavattituṃ adento. **Pañca dhammeti** “kālena vakkhāmi”tiādinā (pari. 362) vuccamāne.

Kummopamasuttavaṇṇanā niṭṭhitā.

4. Paṭhamadārukkhandhopamasuttavaṇṇanā

241. Vilāsamāno viya **sāgaram patvā**. **Antosākhoti** gaṅgāya tīrassa anto onatasākho. **Temetīti** tinto hoti. **Tiriyaṃ patito** daṇḍasetu viya ṭhitattā mahājanassa **paccayo jāto**, tathā mahantabhāvena gaṅgāsotam otaraṇādi natthi.

Ayaṃ hīti anantaram vuttapuggalo. **Ariyamaggaṃ oruyhāti** catubbidham ariyamaggavīthim otarivā. “Cittam nāmeta”ntiādinā cintetvā ghibandhanam na vissajjetīti sambandho. **Attano bhajamānake**ti attano bhajante. Jīvikatthāya payujjitabbato **payogo**, khattavatthādi. Tato payogato **uṭṭhitam āyaṃ**. **Kiñcāpi bhikkhūnam kāyasāmaggiṃ deti** bhikkhatthāya.

Muṇḍaghaṭanti bhinnotṭham ghaṭam. **Khandheti** aṃse. **Saṅghabhoganti** saṅghasantakam bhogagāmaṃ **gantvā**. **Atthato evaṃ vadantīti** tathā atthassa sambhavato evaṃ vadantā viya honti. **Yāgumattake yāgunti** yāguṃ pivitvā tāya aparipakkāya eva aññaṃ yāguṃ ajjhoharivāti sambandho.

Kilesānurañjitovāti yonisomanasikārassa abhāvena kilesānugatacitto eva. **Akkhīni nīharitvāti** kodhavasena akkhike karonto akkhīni nīharitvā **vicarissati**. **Uddhato hoti** avūpasanto.

Diṭṭhigatikoti sāsaniko evaṃ ayoniso ummujjitvā sāsanam uddhammam ubbinayam katvā dīpento ariṭṭhasadiso. Tenāha “so hī”tiādi. **Arūpabhava rūpam atthi**, aññathā tato cutassa kuto rūpakkhandhassa sambhavo. **Asaññibhave cittam atthīti** etthāpi eseva nayo. **Bahucittakkhaṇiko lokuttaramaggo** “yo ime cattāro satipaṭṭhāne bhāveyya sattavassānī”tiādivacanato (dī. ni. 2.404; ma. ni. 1.137). **Anusayo cittavippayutto**, aññathā sāvajjānavajjadhammānam ekajjham uppatti siyā. **Te ca sattā sandhāvanti saṃsaranti**, aññathā kammaphalānam sambandho na siyāti. **Iti vadanto** evaṃ micchāvādam paggayha vadanto.

Temanarukkho viya...pe... dullabhadhammassavano ca puggalo saddhāsinehena atemanato. **Katavinayo** sikkhitavinayo yathā “katavijjo”ti. **Dhammakathikānam vicārethāti** idam deyyadhammam dhammakathikānam ayyānam tassa tassa yuttavasena vicārethāti niyyātanavasena **vatvā**. **Divākathiko sarabhāṇako** sāyanhe katheti, purimayāmaṃ kathento **rattikathiko** bhāṇakapuggalo.

Nandanavanābhirāmeti nandanavanam viya manorame. **Assa bhārahārabhikkhūti** assa kiccavāhakabhikkhū upajjhāyādayo. **Sukhanisinnakathanti** paṭisanthārakathāpubbakam upanisinnakatham **sutvā**.

Ṭhitasañṭhāneneva ṭhitākāreneva **ṭhitam**, nappayuttanti attho. Cittakammamūlādīni ṭhitasañṭhāneneva ṭhitāti yojanā. **Mudutāyāti** muduhadayatāya sāpekkhatāya.

Paṭipadanti samathavipassanāpaṭipattim. **Dīpetvā** pakāsetvā pakāṭam katvā. **Tatruppādoti** tatra

uppajjanakaāyuppādo. Khettaṃ sandhāya vadati. **Tela...pe... hatthāti** telaghaṭa-madhughaṭaphāṇitaghaṭādihattā. **Apakkamimsu** dubbicāritattā. **Pūresīti** heṭṭhā ca tatta tatta atītāni kālavacanāni porāṇaṭṭhakathāya āgatattā kira vuttāni.

Upagamanānupagamanādīni orimassa pārimassa ca upagamanānupagamanāni ceva majjhe saṃsīdanāni ca. **Paṭivijjhitunti** jānituṃ. **Etanti** yathāvuttaṃ cakkhusabhāvaṃ. **Domanassanti** tasseva mandabhāvapaccayaṃ domanassaṃ. **Āpajjantopi upagacchati nāma** tannimittasaṃkilesassa uppāditattā. **Tiṇṇaṃ lakkhaṇānanti** hutvā abhāvato ādiantavantato tāvakālikato niccapaṭikkhepatotiādīnaṃ tiṇṇaṃ lakkhaṇānaṃ sallakkhaṇavasena.

Vāmatoti micchā. **Dakkhiṇatoti** sammā. Yathā tassa tassa sattassa orabhāvattā ajjhattikāni āyatanāni **orimaṃ tīraṃ** katvā vuttāni, evaṃ nesaṃ parabhāvattā bāhirāni āyatanāni **pārimaṃ** vuttāni. Apāyamajjhe saṃsaraṇahetutāya nandirāgoṇa “majjhe saṃsādo”ti vutto.

Unnatoti “seyyohamasamī”tiādīnā unnatiṃ upagato. Attukkaṃsane paṃsukūlikabhāvena attānaṃ dahanato aññākāratāgahetabbo. **Pāsāṇo nu kho esa khāṇukoti** gahetabbadārukkhandhasadiso vutto.

Cuṇṇavicuṇṇaṃ hoti āvaṭṭavegassa balavabhāvato. **Catūsu apāyesūti** pañcakāmaguṇāvaṭṭe patitapuggalo manussalokepi guṇasarīrabhedanena dīgharattaṃ cuṇṇavicuṇṇaṃ āpajjatiyeva, tassa tathā āpannattā. Evañhi so apāyesu tādisesu jāyati.

Sīlassa duṭṭhaṃ nāma natthi, tasmā abhāvatto idha du-saddoti āha “**nissilo**”ti. “Pāpaṃ pāpena sukara”ntiādīsū (udā. 48) viya pāpa-saddo nihīnapariyāyoti āha “**lāmakadhammo**”ti. **Na sucīti** kāyavācācīttehi na suci. **Saṅkāya vāti** attano vā saṅkāya paresaṃ samācārakiriyaṃ sarati āsaṅkati. Tenāha “**tassa hī**”tiādi. **Tāni kammāni pavisaṭīti** tāni kammāni karontānaṃ antare pavisaṭīti. **Guṇānaṃ pūtibhāvenāti** guṇabhāvena gahitānaṃ sīladhammānaṃ saṃkiliṭṭhabhāvappattiyā. **Kacavarajātoti** abbhantaraṃ sañjātakacavaro, kacavarabhūto vā.

Aṇaṇā pabbajjāti aṇaṇasseva pabbajjā. Orimatīrādīnaṃ upagamanānupagamanādīnaṃ jotitattā **vaṭṭavivaṭṭaṃ kathitaṃ**.

Paṭhamadārukkhandhopamasuttavaṇṇanā niṭṭhitā.

5. Dutiyadārukkhandhopamasuttavaṇṇanā

242. Yā āpatti vuṭṭhānagāminī desanāgāminī, taṃ paṭicchāditakālato paṭṭhāya **saṃkiliṭṭhā** nāma antarāyikabhāvato. Āvikatā pana anāpattiṭṭhāne tiṭṭhatīti **asaṃkiliṭṭhā nāma**. Tenāha – “**āvikatā hissa phāsu hotī**”ti. **Evarūpaṃ saṃkiliṭṭhanti** paṭicchāditatāya vā duṭṭhullabhāvena vā saṃkiliṭṭhaṃ.

Dutiyadārukkhandhopamasuttavaṇṇanā niṭṭhitā.

6. Avassutapariyāyasuttavaṇṇanā

243. **Santhāgāranti** saññāpanāgāraṃ. Tenāha “**uyyogakālādīsū**”tiādi. **Ādi-saddena** maṅgalamahādīnaṃ saṅgaho daṭṭhabbo. **Santharantīti** vissamanti, parissamaṃ vinodentīti attho. **Sahāti** sannipātavasena ekajjhaṃ. **Saha atthānusāsanaṃ agāranti** tasmiṃ atthe **ttha-kārassa ntha-kāraṃ** katvā “**santhāgāra**”nti vuccatīti daṭṭhabbaṃ, paṭhamaṃ tatta sammantanavasena santharanti vicārentīti attho.

Tepiṭakaṃ buddhavacanaṃ āgatameva bhavissatīti buddhavacanaṃ āgamanasīsena

ariyaphaladhammānampi āgamaṇaṃ vuttameva. Tiyāmarattiṃ tattha vasantānaṃ phalasaṃpattivaḷaṅjanaṃ hotīti. Tasmañca bhikkhusaṅghe kalyāṇadhammā kalyāṇaputhujjanā vipassanaṃ ussukkāpentā hontīti ariyamaggadhammānampi tattha āgamaṇaṃ hotiyeva.

Allagomayenāti acchena allagomayarasena. **Opuñjāpetvāti** vilimpetvā. **Catujjātiyagandhehīti** kuṅkumaturukkhayavanapuppaphatamālapattagandhehi. **Nānāvaṇṇeti** nīlādivasena nānāvaṇṇe, bhittivisesavasena nānāsaṅghānarūpe. “**Mahāpiṭṭhikakojaveti** hatthipiṭṭhiādīsu attharitabbatāya ‘mahāpiṭṭhikā’ ti laddhasamaññe kojave” ti vadanti. Kuttake pana sandhāyetaṃ vuttaṃ, “caturaṅgulādhipapuppā mahāpiṭṭhikakojavā” ti vadanti. **Hatthatharaassattharā** hatthiassapiṭṭhīsu attharitabbā hatthiassarūpavicittā ca attharakā. **Sihattharakādayo** pana sīharūpādivicittā eva attharakā. **Cittattharakam** nānāvidharūpehi ceva nānāvidhamālākammādīhi ca vicittam attharakam.

Upadhānanti apassayanaṃ. **Upadahitvāti** apassayayoggabhāvena ṭhapetvā. Gandhehi katamālā **gandhadāmaṃ**. Tamālapattādīhi katamālā **pattadāmaṃ**. Ādi-saddena hīngulatakkolajātiphalajātipuppādīhi katadāmaṃ saṅgaṅhāti. Pallānkākārena katapīṭhaṃ **pallānkapiṭhaṃ**. Tīsu passesu ekapasse eva vā saupassayaṃ **apassayapiṭhaṃ**. Anapassayaṃ **muḍapīṭhaṃ**. **Yojanāvaṭṭeti** yojanaparikkhepokāse.

Samvidhāyāti antaravāsakassa koṇapadesaṃ itarapadesaṅca samaṃ katvā vidhāya. Tenāha – “**kattariyā padumaṃ kantento viyā**” ti, “**timaṅḍalaṃ paṭicchādentō**” ti ca. Yasmā buddhānaṃ rūpasampadā viya ākappasampadāpi paramukkamaṣataṃ gatā, tasmā tadā bhagavā evaṃ sobheyyāti dassento “**suvaṇṇapāmaṅgena**” tiādīmāha. Tattha “asameṇa buddhavesenā” tiādīnā tadā bhagavā buddhānubhāvassa niguhane kāraṇābhāvato tattha sannipatitadevamanussanāgayakkhagandhabbādīnaṃ pasādajananatthaṃ attano sabhāvapakatīyāva kapilavatthum pāvisīti dasseti. Buddhānaṃ kāyapabhā nāma pakatīyā asītiatthamattapadesaṃ visaratīti āha “**asītiatthattāṭṭhānaṃ aggahesi**” ti. Nīlapīṭalohitodātamañjiṭṭhapabhassarānaṃ vasena **chabbaṇṇā buddharasmiyo**.

Sabbapāliphulloti mūlato paṭṭhāya yāva sākhaḅgā samantato phullo vikaṣito. **Paṭipāṭiyā ṭhapitānanti** ādi parikappūpamā, **yathā taṃ...pe... alaṅkatam** aññaṃ virocāti, evaṃ virocittha, samatīmsāya pāramitāhi abhisaṅkhatattā evaṃ virocitthāti vuttaṃ hoti. “**Pañcavīsatiyā gaṅgānanti** satamukhā hutvā samuddaṃ pavīṭṭhāya mahāgaṅgāya mahantamahantānaṃ gaṅgānaṃ pañcavīsati” ti vadanti. **Papañcasūdaniyaṃ** (ma. ni. aṭṭha. 2.22) “pañcavīsatiyā nadīna” nti vuttaṃ, gaṅgādīnaṃ candabhāgāpariyosānānaṃ pañcavīsatiyā mahānadīnanti attho. Parikappavacanañhetam. **Sambhijjāti** sambhedaṃ missībhāvaṃ patvā **mukhadvāreti** samuddaṃ pavīṭṭhaṭṭhāne.

Nāgasupaṇṇagandhabbayakkhādīnanti ādi parikappavasena vuttaṃ. **Sahassenāti** padasahassena, bhāṇavārappamaṅgena ganthenāti attho.

Kampayanto vasundharanti attano guṇavisesehi pathavīkammaṃ unnādentō, evambhūtopi aheṭṭhayanto pāṇāni. Sabbapadakkhiṇattā buddhānaṃ **dakkhiṇaṃ paṭhamaṃ pādaṃ uddharanto**. **Samaṃ samphusate bhūmiṃ** suppatiṭṭhitapādātāya. Yadi pi bhūmiṃ samaṃ phusati, **rajasā nupalippati** sukhumattā chaviyā. **Ninnaṭṭhānaṃ unnamatīti** ādi buddhānaṃ suppatiṭṭhitapādātāsaṅkhātamaḥāpurisalakkhaṇapaṭilābhassa nissandaphalaṃ. **Nātidūre uddharatīti** atidūre ṭhapetum na uddharati. **Naccāsanne ca nikkhipanti** accāsanne ca ṭhāne anikkhipanto niyyāti. **Hāsayaṇto sadevake** loke tosentō. Catūhi pādehi caratīti **catucārī**.

Buddhānubhāvassa pakāsanavasena gatattā **vaṇṇakālo nāma esa**. Sarīravaṇṇe vā guṇavaṇṇe vā kathiyamāne **dukkathitanti na vattabbaṃ**. Kasmā? **Appamaṇavaṇṇā hi buddhā** bhagavanto, buddhaguṇasaṃvaṇṇanā jānantassa yathāraddhasaṃvaṇṇanaṃyeva anupavisati. **Dukūlacumbaṭakenāti** ganthitvā gahitadukūlavatthena.

Nāgavikkantacāraṇoti hatthināgasadisapadanikkhepo. **Satapuññalakkhaṇoti** anekasatapuññābhinihattamahāpurisalakkhaṇo. **Mañiverocano yathāti** caturāsītisahassamaṇiparivārito ativiya virocamaṇo vijjotamaṇo maṇi viya. “Verocano nāma eko maṇī”ti keci. **Mahāsālovāti** mahanto sālārukkho viya, suddhaṭṭhito koviḷārādi mahārukkho viya vā. **Padumo kokanado yathāti** kokanadasaṅkhātaṃ mahāpadumaṃ viya, vikasamānapadumaṃ viya vā.

Ākāsagaṅgaṃ otārento viyātidi tassā pakiṇṇakakathāya aññesaṃ sudukkarabhāvadassanañceva suṇantānaṃ accantasukhāvahabhāvadassanañca. **Pathavojam ākaḍḍhanto viyāti** nāliyaṃtaṃ yojetvā mahāpathaviyā heṭṭhimatale pappatakojamaṃ uddhamaṃ mukhamaṃ katvā ākaḍḍhanto viya. **Yojanikanti** yojanapamaṇamaṃ. **Madhubhaṇḍanti** madhupaṭalaṃ.

Mahantanti vipulaṃ uḷārapuññaṃ. **Sabbadānaṃ dinnameva hotīti** sabbameva paccayaajātaṃ āvāsadāyakena dinnameva hoti. Tathā hi dve tayo gāme piṇḍāya caritvā kiñci aladdhā āgatassapi chāyūdakasampannaṃ ārāmaṃ pavisitvā nhāyitvā paṭissaye muhuttaṃ nipajjitvā uṭṭhāya nisinnassa kāye balaṃ āharitvā pakkhittaṃ viya hoti. Bahi vicarantassa ca kāye vaṇṇadhātu vātātapehi kilamati, paṭissayaṃ pavisitvā dvāraṃ pidhāya muhuttaṃ nisinnassa visabhāgasantati vūpasammati, sabhāgasantati patiṭṭhāti, vaṇṇadhātu āharitvā pakkhittā viya hoti, bahi vicarantassa ca pāde kaṇṭakā vijjhanti, khāṇu paharati, sarīsapādi parissayā ceva corabhayañca uppajjati, paṭissayaṃ pavisitvā dvāraṃ pidhāya nisinnassa pana sabbepete parissayā na honti. Sajjhāyantassa dhammapāṭisukhaṃ, kammatṭhānaṃ manasikarontassa upasamasukhaṃ uppajjati bahiddhā vikkhepābhāvato. Bahi vicarantassa ca kāye sedā muccanti, akkhīni phandanti, senāsanaṃ pavisanakkhaṇe mañcapīṭhādīni na paññāyanti, muhuttaṃ nisinnassa pana akkhīpasādo āharitvā pakkhitto viya hoti, dvāravātapānamañcapīṭhādīni paññāyanti. Etasmiñca āvāse vasantaṃ disvā manussā catūhi paccayehi sakkaccaṃ upaṭṭhanti. Tena vuttaṃ – “**āvāsadānasmīhi dinne sabbadānaṃ dinnameva hotī**”ti. **Bhūmatṭhaka...pe... na sakkāti** ayamatto mahāsudassanavattuṇā (dī. ni. 2.241 ādayo) dīpetabbo. **Mātukucchi asambādhova hotīti** ayamatto antimabhavikānaṃ mahābodhisattānaṃ paṭisandhivasena dīpetabbo.

Sītanti ajjhantaṃ dhātukkabhavasena vā bahiddhā utuvipariṇāmasena vā uppajjanakasītaṃ. **Uṇhanti** aggisantāpaṃ, tassa ca davadhādīsu sambhavo daṭṭhabbo. **Paṭihantīti** paṭihanati. Yathā tadubhayavasena kāyacittānaṃ ābādho na hanati, evaṃ karoti. Sītuṇhabbhāhate hi sarīre vikkhittacitto bhikkhu yoniso padahitūṃ na sakkoti. **Vāḷamigānīti** sīhabyagghādivāḷamige. Guttasenāsanañhi pavisitvā dvāraṃ pidhāya nisinnassa te parissayā na honti. **Sarīsapeti** ye keci sarantā gacchante dīghajātike sappādike aññe ca tathārūpe. **Makaseti** nidassanamattametamaṃ, daṃsādīnaṃ eteneva saṅgaho daṭṭhabbo. **Sisireti** sītakālavasena sattāhavaddalīkādivasena ca uppanne sisirasamphasse. **Vuṭṭhiyoti** yadā tadā uppannā vassavuṭṭhiyo paṭihanatīti yojanā.

Vātātapo ghoroti rukkhagacchādīnaṃ ubbhanabhañjanādivasena pavattiyā ghorō sarajaarajādībhedo vāto ceva gimhapariḷāhasamayesu uppattiyā ghorō sūriyātapo ca. **Paṭihaññatīti** paṭibāhiyati. **Leṇatthanti** nānārammaṇato cittaṃ nivattitvā paṭisallānārāmatthaṃ. **Sukhatthanti** vuttaparissayābhāvena phāsuvihāratthaṃ. **Jhāyituntīti** aṭṭhatimāsāya ārammaṇesu yattha katthaci cittaṃ upanibandhitvā samādahanavasena jhāyitūṃ. **Vipassituntīti** aniccādivasena saṅkhāre sammasitūṃ.

Vihāreti paṭissaye. **Kārayeti** kārāpeyya. **Rammeti** manorame. **Vāsayetha bahussuteti** kāretvā pana ettha vihāresu bahussute sīlavante kalyāṇadhamme nivāseyya. Te nivāsento pana **tesaṃ** bahussutānaṃ yathā paccayehi kilamatho na hoti. Evaṃ **annañca pānañca vatthasenañca ca dadeyya ujubhūtesu** ajjhāsayasampannesu kammaphalānaṃ ratanattayaḅṅānañca saddahanena **vippasannena cetasā**. Idāni gahaṭṭhapabbajitānaṃ aññamaññūpakāratamaṃ dassetaṃ “**te tassā**”ti gāthamāha. Tattha **te**ti bahussutā. **Tassā**ti upāsakassa. **Dhammaṃ desentīti** sakalavaṭṭadukkhapanūdanaṃ niyyānikaṃ dhammaṃ kathenti. **Yaṃ so dhammaṃ idhaññāyāti** so puggalo yaṃ saddhammaṃ imasmiṃ sāsane sammāpaṭipajjanena jānitvā aggamaggādhiḅamena anāsavo

hutvā parinibbāyati.

Āvāseti āvāsadāne. **Ānisaṃsoti** udrayo. Pūjāsakkāravasena paṭhamayāmo khepito, satthu dhammadesanāya appāveseso majjhimayāmo gatoti pāliyaṃ “bahudeva ratti”nti vuttanti āha “**atirekataraṃ diyaḍḍhayāma**”nti. **Saṅgahaṃ nārohati** vipulavitthārabhāvato. Buddhānañhi bhattānumodanāpi thokaṃ vaḍḍhetvā vuccamānā dīghamajjhimapamānāpi hoti. Tathā hi suphusitaṃ dantāvaraṇaṃ, jivhā tanukā, bhavaṅgaparivāso paritto, natthi vegāyitaṃ, natthi vitthāyitaṃ, natthi abyāvaṭamaṇo, sabbaññutaññāṇaṃ samupabyūḷhaṃ, aparikkhayā paṭisambhidā.

Sandassetvātiādīsu sandassetvā āvāsadānapaṭisamyuttaṃ dhammiṃ kathaṃ katvā. Tato paraṃ, mahārāja, itipi sīlaṃ, itipi samādhi, itipi paññāti sīlādiguṇe tesam sammā dassetvā hatthena gahetvā viya paccakkhato pakāsetvā. **Samādapetvāti** evaṃ sīlaṃ samādātappaṃ, sīle patiṭṭhitena evaṃ samādhipaññā bhāvetabbāti yathā te sīlādiguṇe sammā ādiyanti, tathā gaṇhāpetvā. **Samuttejetvāti** yathāsamādinnaṃ sīlaṃ suvisuddhaṃ hoti, samathavipassanā ca bhāviyamānā yathā suṭṭhu visodhitā uparūpari visesāvahā honti, evaṃ samuttejetvā nisāmanavasena vodāpetvā. **Sampahaṃsetvāti** yathānusiṭṭhaṃ ṭhitasīlādiguṇehi sampati paṭiladdhaguṇānisaṃsehi ceva upariladdhabbaphalavisesehi ca cittaṃ sampahaṃsetvā laddhassāsavasena suṭṭhu tosetvā. Evametesam padānaṃ attho veditaḥ. Sakyarājāno yebhuyyena bhagavato dhammadesanāya sāsane laddhassādā laddhappatiṭṭhā ca.

Upasaggasaddānaṃ anekathattā abhi-saddo ati-saddena samānatthopi hotīti vuttaṃ “**abhikkantāti atikkantā**”ti.

Tatra kirātiādi kecivādoti baddhopi na hoti. Tenāha “**akāraṇameta**”ntiādi.

Kāyacittalahutādayo uppajjantīti idaṃ kāyikacetasikaaññathābhāvassa kāraṇavacanāṃ, lahutādiuppane savanānuttariyapaṭilābhena laddhabbadhammatthavedasamadhigamato. Vuttañhetam –

“Yathā, yathāvuso, bhikkhuno satthā vā dhammaṃ deseti aññataro vā garuṭṭhāniko sabrahmacārī, tathā tathā so tasmim dhamme labhati atthavedaṃ, labhati dhammavedaṃ, labhati dhammūpasamhitam pāmojja”ntiādi (dī. ni. 3.322, 355; a. ni. 5.26).

Piṭṭhivāto uppajji upādinnaśarīrasa tathārūpattā saṅkhārānañca aniccatāya dukkhānubandhattā. **Akāraṇaṃ vā etanti** yenādhippāyena vuttaṃ, tameva adhippāyaṃ vivarituṃ “**pahoti**”tiādi vuttaṃ. **Ekapallaṅkena nisīdituṃ pahoti** yathā taṃ veluvagāmake. **Ettake ṭhāneti** ettake ṭhāne ṭhānaṃ nipphannanti yojanā. **Taṅca khoti** vuṭṭhānasaññaṃ citte ṭhapanāṃ. **Dhammakathaṃ suṇamāno** dhammagāravena.

Avassutassāti avassutabhāvassa rāgādivasena. **Avassutassa kāraṇanti** tintabhāvakāraṇaṃ. **Kilesādhimuccanēti** kilesavasena paripphanditavasena. **Nibbāpanaṃ viyāti** vūpasamo viya. **Nibbisevanānti** paripphandanarahitānaṃ.

Avassutapariyāyasuttavaṇṇanā niṭṭhitā.

7. Dukkhadhammasuttavaṇṇanā

244. Dukkhadhammānti dukkhakāraṇānaṃ. Tenāha “**dukkhasambhavadhammāna**”ntiādi. Tattha kiṃ dukkhaṃ, kā dukkhadhammāti tadubhayaṃ dassetuṃ “**pañcasu hī**”ti vuttaṃ. **Teti** pañcakkhandhā. **Dukkhasambhavadhammattāti** dukkhuppattikāraṇattā. **Assāti** tena. Karaṇe hetam sāmivacanāṃ. **Kāmeti** vatthukāme kilesakāme ca. Puna **assāti** sāmīatthe eva sāmivacanāṃ. **Cāranti** cittācāraṃ. **Vihāranti** pañcadvārappavatticāravihāraṃ. “Ekaṭṭhā”ti ca vadanti. Teneva hi “anubandhitvā carantaṃ”iceva vuttaṃ. **Anubandhitvāti** ca vīthicittappavattito paṭṭhāya yāva tatiyajavanavārā anu anu bandhitvā. **Pakkhandanādīti ādi**-saddena kasigorakkhādivasenaṃpi kāmānaṃ

pariyesanadukkhaṃ saṅgaṇhāti.

Dāyatīti **dāyo**, vanaṃ. Tenāha “**aṭavi**”nti. **Kaṇṭakagabbhanti** ovarakasadisam vanaṃ. Nāmapadaṃ nāma kiriyāpadāpekkhanti “**vijjhī**”ti vacanasesena kiriyāpadaṃ gaṇhāti.

Dandhāyitattaṃ uppannakilesānaṃ avaṭṭhānaṃ. Tenāha “**uppannamattāyā**”tiādi. **Tāyāti** satiā. **Kāci kilesāti** cuddasavidhe cittassa kicce javanakicce eva cittakilesānaṃ uppattiṃ katvā tathā vuttaṃ. **Niggahitāva honti** pavattituṃ appadānavasena. Tenāha “**na saṅghātuṃ sakkontī**”ti. **Cakkhudvārasminti** pāḷiyam tassa paṭhamaṃ gahitatāya vuttaṃ, tena nayena sesadvārānipi gahitāneva honti. **Rāgādīsu uppannesu** paṭhamajavanavāre. Satisammoseṇa “**kilesā me uppannā**”ti **ñatvā** tathā paccāmāsasatiyā labbhanato. Tenāha – “**anacchariyaṃ ceta**”nti. **Āvaṭṭetvāti** ayoniso āvaṭṭetvā. **Āvajjanādīsūti** tato eva ayoniso āvajjanādīsu uppannesu iṭṭhārammaṇassa laddhattā paccayasiddhiyā sampattaṃ pavattanārahaṃ. **Nivattetvāti** dutiyajavanavārepi kilesupattiṃ nivattetvā. Kathaṃ panassa evaṃ laddhuṃ sakkāti āha “**āraddhavipassakānaṃ hī**”tiādi. **Bhāvanāpaṭisaṅkhāneti** bhāvanāyaṃ paṭisaṅkhāne ca yogino patiṭṭhitabhāvo. Tassa **ayamānisamso** – yaṃ paccayalābhena uppajjitūṃ laddhokāsāpi kilesā pubbe pavattabhāvanānubhāvena vikkhambhitā tathā tathā niggahitā eva hutvā nivattanti, kusalā dhammāva laddhokāsā uparūpari vaḍḍhanti.

Abhihaṭṭhanti abhiharitvā. **Anudahantīti** anudahantā viya honti. **Anusentīti** etthāpi eseva nayo. **Anāvaṭṭanteti** anivattante sāmāññatoti adhippāyo. **Vipassanābalameva dīpitaṃ** maggaphalādhigamassa ajotitattā.

Dukkhadhammasuttavaṇṇanā niṭṭhitā.

8. Kiṃsukopamasuttavaṇṇanā

245. Catunnaṃ ariyasaccānaṃ pariññābhisamayādivasena vividhadassananti kiccavasena nānādassanaṃ hotīti vuttaṃ, “**dassananti paṭhamamaggasetam adhivacana**”nti. Tayidaṃ uparimaggesu bhāvanāpariyāyassa nirulhattā paṭhamamaggassa paṭhamaṃ nibbānadassanato. Tenāha “**paṭhamamaggo hī**”tiādi. Koci yathāvuttaṃ aviparītaṃ atthaṃ ajānanto ñānadassanaṃ nāma ārammaṇakaraṇassa vasena atippasaṅgaṃ āsaṅkeyyāti taṃ nivattetuṃ “**gotrabhū panā**”tiādi vuttaṃ. **Na dassananti vuccatīti** ettha rājadassanaṃ udāharanti. **Cattāropi maggā dassanameva** yathāvuttenatthena, bhāvanāpariyāyo pana uparī tiṇṇaṃ maggānaṃ paṭhamamaggaupāyassa bhāvanākāreṇa pavattanato. Dassanaṃ visuddhi etthāti **dassanavisuddhikaṃ**, nibbānaṃ. Phassāyatanam kammaṭṭhānaṃ assa atthīti **phassāyatanakammaṭṭhāniko**. Esa nayo sesesupi padesu.

Padesasaṅkhāresūti saṅkhārekadesesu. Heṭṭhimaparicchena pathaviādike dhammamatte diṭṭhe rūpapariggaho, cakkhuviññāṇādike taṃsahagatadhammamatte diṭṭhe arūpapariggaho ca sijjhatīti vadanti.

Adhigatamaggameva kathesīti yena mukhena vipassanābhinivesaṃ akāsi, tamevassa mukhaṃ kathesī. **Ayam panāti** kammaṭṭhānaṃ pucchanto bhikkhu. **Imesanti** phassāyatanakammaṭṭhānikapañcakkhandhakammaṭṭhānikānaṃ vacanaṃ. “**Aññamaññaṃ na sameti**”ti vatvā tamevatthaṃ pākaṭaṃ karoti “**paṭhamenā**”tiādinā. Pañcakkhandhavimuttassa saṅkhārassa abhāvā “**nippadesesū**”ti vuttaṃ. **Tathevāti** yatheva phassāyatanakammaṭṭhānikaṃ, tatheva taṃ pañcakkhandhakammaṭṭhānikaṃ pucchitvā.

Samappavattā dhātuyoti rasādayo sarīradhātuyo samappavattā, na visamākārasaṅghitā ahesuṃ. Tenāha “**kallasarīraṃ balappatta**”nti. “**Atītā saṅkhārā**”tiādi vipassanābhinivesavasena vuttaṃ. Sammasanaṃ sabbatthakameva icchitabbaṃ. **Cāribhūminti** gocarāṭṭhānaṃ.

Kārakabhāvanti bhāvanānuyuñjanabhāvaṃ. **Paṇḍurogapurisoti** paṇḍurogī puriso. **Ariṭṭhanti** suttaṃ. **Bhesajjaṃ katvāti** bhesajjapayogaṃ katvā. **Karissāmīti** bhesajjaṃ karissāmi. **Jhāmathuṇo viyāti** daḍḍhathuṇo viya khārakajālanaddhattā taruṇamakulasantānasañchannattā.

Dakkhiṇadvāragāmeti dakkhiṇadvārasamīpe gāme. **Lohitakoti** lohitavaṇṇo. **Ocirakajātoti** jātaolambamānacirako viya. **Ādinnasipāṭikoti** gahitaphalapotako. **Sandacchāyoti** bahalacchāyo. Yasmā tassa rukkhassa sākhā aviraḷā ghanappattā aññamaññaṃ saṃsanditvā ṭhitā, tasmā chāyāpissa tādisīti vuttaṃ “**sandacchāyo nāma saṃsanditvā ṭhitacchāyo**”ti, ghanacchāyoti attho. **Tatthātiadi** upamāsaṃsandanaṃ.

Yena yena kārena adhimuttānanti chaphassāyatanādīmukhena yena yena vipassanābhīnivesena vipassantānaṃ nibbānañca adhimuttānaṃ. **Suṭṭhu visuddhaṃ** pariññāṭisamayādisiddhiyā. **Tena tenevākārenāti** attanādhimuttākārena. Idāni taṃ taṃ ākāraṃ upamāya saddhiṃ yojetvā dassetuṃ “**yathā hī**”tiādi āraddhaṃ. Taṃ suviññeyyameva.

Idanti nagaropamaṃ. **Taṃ sallakkhitanti** kiṃsukopamaḍīpitaṃ atthajātaṃ sace sallakkhitaṃ. **Assa** bhikkhuno. **Dhammadesanattanti** yathāsallakkhitassa atthassa vasena laddhavisessassa upabrūhanāya. **Tassevatthassāti** tassa dassanavisuddhisāṅkhātassa atthassa. **Corāsaṅkā na honti** majjhīmaḍesarajjassa pasannabhāvato. **Tipurisubbedhānīti** ubbedhena tipurisappamāṇāni nānābhittiviccittāni thambhānaṃ upari vividhamālākammādiviccittadhanurākāralakkhitāni manoramāni. Tenāha “**nagarassa alaṅkārattha**”nti. Nagaradvārasa thirabhāvāpādanavasena ṭhapetabbattā vuttaṃ “**coranivāraṇatthānīpi hontiyevā**”ti. **Piṭṭhasaṅghātassāti** dvārabāhassa. “Ime āvāsikā, ime āgantukā, tatthāpi ca imehi nagarassa nagarasāmīkassa ca attho. Imesaṃ vasena anatto siyā”ti jānanaññāsaṅkhātēna **paṇḍiccena samannāgato**. Aññātanivāraṇe paṭubhāvasaṅkhātēna **veyyattiyena samannāgato**. **Ṭhānuppattikapaññāsaṅkhātāyāti** tasmīṃ tasmīṃ atthakicce taṅkhaṇupajjanakapaṭibhānasāṅkhātāya.

Raññā āyutto niyojito **rājāyutto**, tatha tatha rañño kātabbakicce ṭhapitapuriso. **Katipāheyevāti** katipayadivaseyeva akiccakaraṇena tassa ṭhānaṃ vibbhamo jātoti katvā vuttaṃ – “**sabbāni vinicchayaṭṭhānādīni hāretvā**”ti.

Sīsamassa chindāhīti sīsabhūtaṃ uttamaṅgaṭṭhāniyaṃ tatha tassa rājakiccaṃ chindāti attho. Aññāthā tassa pākāṭike atthe gayhamāne pāṇātipāto āṇatto nāma siyā. Na hi cakkavattirājā tādisaṃ āṇāpeti, aññesampi tato nivārakattā. Atha vā **chindāhīti** mama āṇāya assa sīsāṃ chindanto viya attānaṃ dassehi, evaṃ so tatthovādapaṭīkarattapatto odameyyāti, tathā ceva upari paṭipatti āgatā. **Tatthāti** etasmīṃ paccantimanagare.

Uppannenāti samathakammaṭṭhāne uppanna.

Tassevāti sakkāyasaṅkhātassa nagarassa “dvārānī”ti vuttānīti ānetvā sambandho. “Sīghaṃ dūtayuga”nti vuttāti yojanā. Hadayavatthurūpassa majjhe sīghāṭakabhāvena gahitattā “**hadayavatthussa nissayabhūtānaṃ mahābhūtāna**”nti vuttaṃ. Yadi evaṃ vatthurūpameva gahetabbaṃ, tadevettha aggahetvā kasmā mahābhūtāggahaṇanti āha “**vatthurūpassa hī**”tiādi. **Yādisoti** sammādiṭṭhiādīnaṃ vasena yādiso eva pubbe āgatavipassanāmaggo. “**Ayampi aṭṭhaṅgasamannāgatattā tādiso evā**”ti vatvā ariyamaggo “**yathāgatamaggo**”ti vutto. **Idaṃ tāvetthāti** ettha etasmīṃ sutte dhammadesanattaṃ ābhatāya yathāvuttaupamāya idaṃ saṃsandanaṃ.

Idaṃ saṃsandananti idāni vakkhamānaṃ upamāya saṃsandanaṃ. **Nagarasāmiupamā** pañcakkhandhavasena dassanavisuddhipattaṃ khīṇāsavaṃ dassetuṃ ābhatā. Sīghāṭakūpamā catumahābhūtavasena dassanavisuddhipattaṃ khīṇāsavaṃ dassetuṃ ābhatāti yojanā. “**Catusaccameva kathita**”nti vatvā tāni saccāni niddhāretvā dassetuṃ “**sakalenapi hī**”tiādi vuttaṃ. Idha

nagarasambhāro chadvārādayo. Tena hi chaphassāyatanādayo upamitā. Te pana dukkhasaccapariyāpannāti vuttaṃ “**nagarasambhārena dukkhasaccameva kathita**”nti.

Kiṃsukopamasuttavaṇṇanā niṭṭhitā.

9. Viṇopamasuttavaṇṇanā

246. Bhikkhussa vā bhikkhuniyā vāti kāmaṃ pāliyaṃ parisādvayameva gahitaṃ, sesaparisānaṃ pana tadaññesampi devamanussānanti sabbasādhāraṇovāyaṃ dhammasaṅgahoti imamatthaṃ upamāpubbakam katvā dassetuṃ “**yathā nāmā**”tiādi āraddhaṃ. **Yajantoti** dadanto. **Vinditabboti** laddhabbo, adhigantabboti attho.

Chandoti taṇhāchando. Tenāha – “dubbalataṇhā so rañjetuṃ na sakkoti”’ti. **Pubbuppattikā** ekasmiṃ ārammaṇe paṭhamaṃ uppannā. Sā hi anāsevanattā mandā. **Soti chando. Rañjetuṃ na sakkoti** laddhāsevanattā. **Doso nāma** cittadūsanattā. **Tānīti** daṇḍādānādīni. **Tammūlakāti** lobhamūlakā tāva māyāsāṭṭheyyamānātimānadiṭṭhicāpalādayo, dosamūlakā upanāhamakkhapalāsaissāmacchariyathambhasārambhādayo, mohamūlakā ahirika-anottappa-thinamiddhavicikchuddhacca-viparītamanasikārādayo, saṃkilesadhammā gahitāva honti taṃmūlakattā. Yasmā pana sabbepi saṃkilesadhammā dvādasākusalacittuppādapariyāpannā eva, tasmā tesampettha gahitabhāvaṃ dassetuṃ “**chando rāgoti vā**”ti vuttaṃ.

Bhāyitabbaṭṭhena **sabhayo**. Bheravaṭṭhena **sappaṭibhayo**. Kusalapakkhassa vikkhambhanaṭṭhena **sakaṇṭako**. Kusalaanavajjadhammehi duravagāhaṭṭhena **sagahano**. Bhavasampattibhavanibbānānaṃ appadānabhāvato **ummaggo**. Duggatigāmimaggattā **kummaggo**. **Iriyanāti** vattanā paṭipajjanā. Duggatigāmītāya kilesa eva **kilesamaggo**. **Na sakkā sampattibhavaṃ gantuṃ** kuto nibbānagamānanti adhippāyo.

Asubhāvajjanādīhīti ādi-saddena aniccamanasikārādīnampi saṅgaho daṭṭhabbo. **Cittaṃ nivattati** sarāgacittaṃ na uppajjati paṭipakkhamanasikārena vinoditattā. **Majjhattārammaṇeti** aññānupekkhaṭṭhāniye ārammaṇe. **Uddesa...pe... āvajjantassāti** uddisāpanavasena uddesaṃ, paripucchāpanavasena paripucchaṃ, garūnaṃ santike vasanavasena garuvāsaṃ āvajjantassa. **Cittanti** gambhīraññācariya-paccavekkhaṇa-paññavanta-puggalasevanavasena tadadhimuttisiddhiyā aññānacittaṃ nivattati.

Yathā “pujjabhavaphalaṃ puñña”nti vuttaṃ “evamidam puññaṃ pavaḍḍhatī”’ti (dī. ni. 3.80), evaṃ kiṭṭhasambhavattā “kiṭṭha”nti vuttanti āha “**kiṭṭhanti kiṭṭhaṭṭhāne uppannasassa**”nti.

Ghaṭāti siṅgayugaṃ idhādhippetanti āha “**dvinnaṃ siṅgānaṃ antare**”’ti. **Ghaṭāti** goṇādīnaṃ siṅgantaraṭṭhassa samaññāti vadanti. **Nāsārajjuke**ti nāsārajjuṇāpātāṭṭhāne.

Dameti puthuttārammaṇato nivāreti. **Nanti** cittaṃ. Yaṃ suttaṃ **subhāsitaṃ** mayā. **Tadassāti** tadā assa bhikkhuno. **Ārammaṇeti** kammaṭṭhānārammaṇe.

Sudujitanti nibbisevanabhāvakaraṇena jitaṃ. **Sutajjitanti** suṭṭhu dūrakaraṇena jitaṃ, tathābhūtaṅca tajjitaṃ nāma hotīti tathā vuttaṃ. **Gocarajjhantanti** ajjhatabhūto gocarō. Kammaṭṭhānārammaṇaṅhi bahiddhārūpādīārammaṇavidhuratāya ajjhantanti vuccati. Samatho anurakkhaṇaṃ etassāti **samathānurakkhaṇaṃ**. Yathā indriyaṣaṃvarasīlaṃ samathānurakkhaṇaṃ hoti, tathā kathitanti attho. Yathā hi indriyaṣaṃvarasīlaṃ samathassa paccayo, evaṃ samathopi tassa paccayoti.

Vādiyamānāya vīṇāya. Cittam rañjetīti rajjanena. Avissajjanīyatāya cittam bandhatīti **bandhaniyo. Veṭṭhaketī** tantīnaṃ āsajjanaveṭṭhake. **Koṇanti** kavaṇato vīṇāya saddakaraṇato koṇanti laddhanāmaṃ dāruḍaṇḍaṃ siṅgādīsu yena kenaci kataṃ ghaṭikaṃ. Tenāha “**caturassaṃ sāradaṇḍaka**”nti.

Yasmā so rājā rājamahāmatto vā saddaṃ yathāsabhāvato na aññāsi, tasmiṃ tassa ajānanākārameva dassetuṃ “**saddaṃ passissāmī**”tiādi vuttaṃ.

Asatī kirāyanti pāliyaṃ liṅgavipallāsena vuttanti yathāliṅgameva vadanto “**asā**”ti āha. “**Asatīti lāmakādhivacana**”nti vatvā tattha payogaṃ dassetuṃ “**asā lokitthiyo nāmā**”ti vuttaṃ, loke itthiyo nāma asatiyoti attho, tattha kāraṇamāha “**velā tāsam na vijjati**”ti. Pakatiyā loke jeṭṭhabhātā kaniṭṭhabhātā mātulotiādikā **velā** mariyādā **tāsam na vijjati**. Kasmā? **Sārattā ca pagabbā ca** sabbesampi sambhogavasena viniyogaṃ gacchanti. Kathaṃ? **Sikhī sabbaghaso yathā**. Tenevāha –

“Sabbā nadī vaṅkagatī, sabbe kaṭṭhamayā vanā;
Sabbitthiyo kare pāpaṃ, labhamāne nivātake”ti. (jā. 2.21.308);

Aññampi tantibaddhaṃ caturassaambaṇavāditādīni. **Vīṇā viya pañcakkhandhā** anekadhammasamūhābhāvato. **Rājā viya yogāvacarō** tappaṭibaddhadhammagavesakattā. **Assāti** yogāvacarassa.

Nirayādito aññasmimpi **gati**-saddo vattati. Tato visesanatthaṃ “**gatigati**”ti vuttaṃ “**dukkhadukkhaṃ, rūparūpa**”nti ca yathā, gatisaññitaṃ pavattiṭṭhānanti attho. Tenāha – “**etthantare saṃsarati vattati**”ti. Sañjāyanapadeso eva gatīti **sañjātigati**.

Taṃ pana gatiṃ sattānaṃ saṃvegavatthubhūtassa paccakkhassa gabbhāsayaṃ vasena dassetuṃ “**ayamassa kāyo**”tiādi vuttaṃ. Rūpadhammassa salakkhaṇaṃ gati niṭṭhā, tato paraṃ aññaṃ kiñci natthīti **salakkhaṇagati**. **Abhāvo** accantābhāvo. Santānavicchedo **vi bhavagati** taṃniṭṭhānabhāvā. **Bhedoti** khaṇanirodho, idhāpi taṃniṭṭhānatāyeva pariyaṃ. **Yāva bhavaggāti** yāva sabbabhavaggā. Salakkhaṇavibhavagatibhedagatiyo “**eseva nayo**”ti imināva pakāsītāti na gahitā. **Tassa khīṇāsavassa na hoti** aggamaḡgena samucchinnattā.

Sīlaṃ kathitaṃ rūpādīsu chandādinivāraṇassa kathitattā. **Majjhe samādhībhāvanā kathitā** “**ajjhataṃveva santiṭṭhati...pe... samādhīyati**”ti jotitattā. **Pariyosāne ca nibbānaṃ kathitaṃ** “**yampissa...pe... na hoti**”ti vacanato.

Vīṇopamasuttavaṇṇanā niṭṭhitā.

10. Chappāṇakopamasuttavaṇṇanā

247. **Vaṇasarīro**ti vaṇitasarīro. **Pakkattāti** kuthitattā. Saradaṇḍesu sarasamaññāti kaṇḍa-saddo sarapariyāyoti āha – “**saravananti kaṇḍavana**”nti. **Arugatto...pe... veditabbo** guṇasarīrassa khaṇḍachiddasīlādīhi heṭṭhā majjhe uparibhāge ca bhedavisamacchinnavikāradosattā. Ettha kusā “**kaṇṭakā**”ti adhippetā kaṇṭakasadisattā, kusatiṇānaṃ eva vā vuttākārapadeso “**kusakaṇṭako**”ti vutto.

Gāmvāsīnaṃ vijjhanatṭhenati nārahova hutvā tesam kāraṇaṃ paṭiggahaṇavasena pīlanatṭhena.

Pakkhinti hatthiliṅgasakuṇaṃ. Tassa kira hatthisoṇḍasadisam mukhaṃ, tasmā “**hatthisoṇḍasakuṇa**”nti vuttaṃ. **Vissajjeyyāti** rajjuyā yathābaddhaṃ eva vissajjeyya.

Bhogehīti attano sarīrabhogehi. **Maṇḍalaṃ bandhitvā**ti yathā sarīraṃ maṇḍalākārena tiṭṭhati, evaṃ katvā. **Supissāmī**ti niddaṃ okkamissāmi. **Detukāmoti** uppatitukāmo. **Disā disanti** disato disaṃ.

Cha pānakā viya cha āyatanāni nānājjhāsayaṭṭā, nānājjhāsayaṭṭā ca nesaṃ nānāvisayaninnatāya daṭṭhabbā. **Daḷharajju viya taṇhā** tesāṃ bandhanato. **Majjhe gaṇṭhi viya avijjā** bandhanassa dubbinimmocanahetuto. **Ārammaṇaṃ balavaṃ hoti** manuññabhāvena ceva tattha taṇhābhinivesassa daḷhabhāvena ca.

Sarikkhakena vā upamāya āharaṇapakke. **Appanāti** saṃsandana. **Pāliyaṃyeva appitā** upamā “evameva kho”tiādina. Rūpacittādivisamaninnatā **cakkhussa visamajjhāsayaṭṭā**. Esa nayo sesesupi.

Kaṇṇacchiddakūpaketi kaṇṇacchiddasaññite āvāṭe. **Tassāti** sotassa. **Paccayo hotīti** upanissayo hoti tena vinā saddaggaṇaṇassa abhāvato. “**Ajaṭākāsopi vaṭṭati evā**”ti vatvā tassa paccayabhāvaṃ dassetuṃ “**antoleṇasmi**”ntiādi vuttaṃ. **Dhātuparamparā ghaṭṭentoti** bhūtaparamparāsaṅghaṭṭento.

Evaṃ santeti evaṃ bhūtaparamparāvasena sadde sotapathamāgacchante. **Sampattagocarāṭā hoti** sotassa. Ghānādīnaṃ viya “**dūre saddo**”ti **jānaṇaṃ na sambhaveyya** sampattagāhibhāvato. **Tathā tathā jānaṇākāro hoti** manoviññāṇassa gahaṇākāravisesato. Sotaviññāṇappavatti pana ubhayattha samānāva. Dūre ṭhitopi saddo tādise ṭhāne paṭighosādīnaṃ paccayo hoti ayokanto viya ayocalanassāti daṭṭhabbaṃ. **Dhammatāti** dhammasabhāvo, saddassa so sabhāvoti attho. **Tato tato savanaṃ hoti** ākāsaññitassa upanissayassa labbhanato. Yadi pana sotaṃ sampattagāhī siyā, cittasamuṭṭhānasaddo sotaviññāṇassa ārammaṇapaccayo na siyā. Paṭṭhāne ca avisesena “saddāyatanam sotaviññāṇassa ārammaṇapaccayena paccayo”ti vutto, bahiddhā ca cittajassa saddassa sambhavo natthi. Atha vā cittajo saddo dhātuparamparāya sotapasādaṃ ghaṭṭeti, na so cittajo saddo, yo paramparāya pavatto. Utujo hi so, tasmā yathuppanno saddo, tattha ṭhitova sotapasādassa āpāthaṃ āgacchatīti niṭṭhamettha gantabbaṃ. Tena vuttaṃ “**asampattagocarameveta**”nti.

Tadā ekaggacittataṃ āpajjati parissayānaṃ abhāvato. Nāsacchiddasaṅkhātākāsaṇissaye vattanato **ghānaṃ ākāsaṃjjhāsayaṃ** vuttaṃ. Vātena vinā gandhaggaṇaṇassa asambhavato **vātūpanissayagandhagocaraṃ**. Tenāha “**tathā hī**”tiādi.

Gāmato laddhabbaṃ āhāraṃ gāmaṃ, tanninnatāya **gāmajjhāsayaṭṭā** vuttā. Tathā hi jīvitanimittam raso jīvitam, tasmim ninnatāya taṃ avhāyatīti **jivhā**. **Na sakkā khelena atemitassa rasaṃ jānitum**, tasmā **āposannissitarasārammaṇā jivhāti**.

Āmakasusānato **bahi**. **Upādiṇṇakajjhāsayaṭṭi** upādiṇṇakaninno. Kāyapasādasannissayabhūtāya pathaviyā phoṭṭhabbārammaṇe ghaṭṭite eva tattha viññāṇuppatti, na aññathāti vuttaṃ “**pathavīsannissitaphoṭṭhabbārammaṇo**”ti. **Tathā hī**tiādi kāyassa upādiṇṇakajjhāsayaṭṭāya sādhaṃ. **Ajjhattikabāhirāti** ajjhattikā bāhirā vā. **Assāti** kāyassa. **Susanthatassāti**ādi tassa pathaviyā paccayabhāvadassanaṃ.

Nānājjhāsayaṭṭi nānārammaṇaninno. Tena manassa makkaṭassa viya anavaṭṭhitataṃ dasseti. Tenāha “**diṭṭhapubbepī**”tiādi. **Mūlabhavaṅgaggaṇaṇena** piṭṭhibhavaṅgaṃ nivatteti. **Assāti** manassa. Evaṃ kiriyamaṃ viññāṇaṃ daṭṭhabbaṃ. **Nānattanti** bhedo.

Yathārucippavattiyā nivāraṇavasena **baddhānaṃ**. **Nibbisevanabhāvanti** lolatāsāṅkhātaparipphandassa abhāvaṃ. **Nākaḍḍhatīti** savisaye rūpārammaṇe cittasantānaṃ, taṃsamaṅginaṃ vā puggalaṃ nākaḍḍhati. **Pubbabhāgavipassanāva kathitā** āyatanamukhena “evañhi vo, bhikkhave, sikkhitabba”nti vuttatā.

Chappāṇakopamasuttavaṇṇanā niṭṭhitā.

11. Yavakalāpisuttavaṇṇanā

248. Yavapuñjo suparipakkayavasamudāyo. **Kājahatthā**ti daṇḍahatthā. **Potheyyunti** yathā yavasāṅkhātāṃ dhaññaṃ vaṇṇato muccati, evaṃ potheyyūṃ. **Yave sāvetvāti** yavasāsato yave pothanena mocetvā vivecetvā.

Catumahāpatho viya cha āyatanāni ārammaṇadaṇḍakehi hananaṭṭhānattā. **Yavakalāpī viya satto** tehi haññaṃānattā. **Cha byābhaṅgiyo viya** sabhāvato chadhāpi paccekaṃ iṭṭhāniṭṭhamajjhavassena aṭṭhārasa ārammaṇāni yavakalāpaṭṭhāniyassa sattassa hananato. Bhavapatthanāya aparāparuppattiṃ sandhāya “**bhavapatthanā kilesā**”ti bahuvacananiddeso. Bhavapatthanā ca tassa paccayabhūtā kilesā cāti **bhavapatthanākilesāti** evaṃ vā ettha attho daṭṭhabbo. Yasmā sattānaṃ vaṭṭadukkhaṃ nāma sabbampi taṃ bhavapatthanāmūlakam, tasmā vuttaṃ “**evaṃ sattā**”tiādi. **Bhavapatthanakilesāti** ca bhavapatthanāmūlakam kilesam.

Bhumanti samīpatthe bhummaṃ. Tenāha “**sudhammāya dvāre**”ti. **Na katanti** dukkhuppādanam na kataṃ. **Navagūthasūkaram viyāti** navagūthabhakkhasūkaram viya. **Cittenevāti** yo bajjhāti, tassa citteneva. **Tasmāti** yasmā vepacittibandhanassa bandhanamuccanaṃ viya, tasmā “vepacittibandhana”nti vuttaṃ. **Ñāṇamokkham bandhananti** ñāṇena muccanaṃ bandhanam.

Maññaṃānoti parikappitatanhāvasena “etaṃ mamā”ti, diṭṭhivasena “eso me attā”ti, mānavasena “esohamasmī”ti maññaṃto. Khandhavinimuttassa maññaṃānavatthuno abhāvā “**khandhe maññaṃto**”ti vuttaṃ. **Etanti** “mārassā”ti etaṃ sāmivacanaṃ. **Kilesamārena baddhoti** kilesamārena teneva kilesabandhanena baddho. **Muttoti** etthāpi eseva nayo.

Taṇhāmaññaṃāyā sati diṭṭhimānāmaññaṃānaṃ pasaṅgo eva natthīti yathā “asmī”ti padena diṭṭhimānāmaññaṃā vuttā honti, evaṃ taṇhāmaññaṃāpīti vuttaṃ “**asmīti padena taṇhāmaññaṃā vutta**”nti. **Ayamahamasmīti padena diṭṭhimaññaṃānti** etarahi labbhamānadiṭṭhivatthuvassena. **Bhavissanti** anāgatadiṭṭhivatthuparikappanavassena diṭṭhimaññaṃānaṃ. Yebhuyyena hi anāgatāliṅganā sassatadiṭṭhi. Uchedavasena diṭṭhimaññaṃāntamevāti ānetvā sambandho. **Rūpītiādīni** padāni. **Sassatassevāti** sassatagāhasseva pabhedadīpanāni. Yasmā maññaṃānaṃ ābādhavasena **rogo**, antodosavasena **gaṇḍo**, aṅganikantavasena **sallam**, **tasmā imehi** taṇhādīhi kilesēhi pākāṭacalanavassena **iñjanti ceva**, apākāṭasañcalanavassena **phandanti ca**. **Papañcitam** saṃsāre cirāyanaṃ daṭṭhabbam, khandhasantānassa vā vitthāraṇam. **Pamattākārappattā** mucchanākārappattā. **Tesanti** taṇhādiṭṭhikilesānaṃ. **Ākārādassanattanti** pavattīākārādassanattam.

Māno nāma “seyyohamasmī”tiādinā majjanākārappavatti. **Taṇhāya sampayuttamānavassenāti** kasmā vuttaṃ? Nanu sabbo māno taṇhāsampayutto? Sati hi byabhicāre visesanaṃ icchitabbanti. Saccametaṃ, taṇhā pana atthi mānassa paccayabhūtā, atthi mānassa appaccayabhūtā, yato māno aniyato vuccati. Tathā hi paṭṭhāne “saṃyojanaṃ dhammaṃ paṭicca saṃyojano dhammo uppajjati hetupaccayā”ti ettha saṃyojanāni saṃyojanehi yathālābham yojetvā dassitayojanāya “kāmarāgasamyojanaṃ paṭicca mānasamyojanaṃ avijjāsamyojana”nti vatvā “kāmarāgasamyojanaṃ paṭicca avijjāsamyojana”nti, “mānasamyojanaṃ paṭicca bhavarāgasamyojanaṃ avijjāsamyojana”nti ca vatvā “bhavarāgasamyojanaṃ paṭicca avijjāsamyojana”nti vuttaṃ. Ettha ca kāmarāgabhavarāgasamyojanehi mānassa aniyatabhāvo pakāsito. Tattha yā taṇhā balavatī, taṃ sandhāya idaṃ vuttaṃ “**taṇhāya sampayuttamānavassenā**”ti. Balavataṇhāsampayutto hi māno sayampi balavā hutvā asmīti savisesam majjanavassena pavattatīti.

Diṭṭhivasenāti mānamūlakadiṭṭhivasena. “Seyyohamasmī”tiādinā hi bahulamānupetassa puggalassa rūpādīsu ekaṃ uddissa ayamahamasmīti diṭṭhiyā uppannāya mānassa appahīnattā mānopi

tattha tattheva uppajjati. Iti mānamūlakam diṭṭhiṃ sandhāyāha “**ayamahasmīti diṭṭhivasena vutta**”nti. Codako pana imamatthaṃ ajānanto anupalabbhamānameva sampayogatthaṃ gahetvā “**nanu cā**”tiādinā codeti. Itaro “**āma natthī**”ti tamatthaṃ sampañcchitvā “**mānassa panā**”tiādinā parihāramāha. Tassattho vutto eva.

Yavakalāpisuttavaṇṇanā niṭṭhitā.

Āsīvisavaggavaṇṇanā niṭṭhitā.

Catuttho paṇṇāsako.

Saḷāyatanasamṃyuttavaṇṇanā niṭṭhitā.

2. Vedanāsamṃyuttam

1. Sagāthāvaggo

1. Samādhisuttavaṇṇanā

249. Vedanā ca pajānātīti saccābhisambodhavasena vuccamānavedanānaṃ pajānaṃ sātisayasamādhānapubbakanti bhagavatā “samāhito”ti vuttanti āha “**upacārena vā appanāya vā samāhito**”ti. **Vedanāti** tissopi vedanā. **Dukkhasaccavasenāti** dukkhasaccabhāvena, pari jānana vasenāti attho. **Sambhavanti** samudayaṃ taṇhāvijjākammaphassādippabhedam upattikāraṇam. Tenāha “**samudayasaccavasena pajānātī**”ti. **Yatthāti** yaṃnimittam, yaṃ āgamma kāmatāṇhāvijjādinirodhā vedanānirodho, tesam ayaṃ nirodho. Nibbānaṃ ārabha ariyamaggappavattiyā hi nibbānaṃ vedanānirodhoti vutto. Khayaṃ gametīti khayagāmī, taṃ **khayagāminam**. Chātam vuccati taṇhā kāmaṇaṃ pātukāmatāvasena pavattanato, accantameva samucchinnatā natthi etasmiṃ chātanti **nicchāto**. Tenāha “**nittaṇho**”ti. **Sammasanacāravedanāti** sammasanūpacāravedanā. **Dvīhi padehīti** “samāhito sampajāno”ti imehi dvīhi. “Sato”ti pana idaṃ sampajānapadasseva upabrūhananti adhippāyo. **Sesehi** catūhi **catusaccam kathitam**, itarehi pana dvīhi catusaccabujjhanameva kathitam. **Sabbasaṅgāhikoti** sabbasabhāvadhammānaṃ saṅgaṇhanako. Tenāha “**catubhūmakadhammaparicchedo vutto**”ti.

Samādhisuttavaṇṇanā niṭṭhitā.

2. Sukhasuttavaṇṇanā

250. Dukkhaṃ na hotīti **adukkham**, sukhaṃ na hotīti **asukham**, ma-kāro padasandhikaro. **Adukkhamasukhanti** vedayitasaddāpekkhāya napuṃsakaniddeso. Sapparasantānagate sandhāya ajjhatabahiddhāgahaṇanti āha “**attano ca parassa cā**”ti. Tena sabbampi vedayitam gahitanti datṭhabbam. **Nassanasabhāvanti** ittarakhaṇatāya bhaṅgato uddham apassitabbasabhāvaṃ. Paloko bhedo etassa atthīti **palokinam**. Tenāha “**bhijjanasabhāva**”nti. **Ñāṇena phusitvā phusitvāti** pubbabhāge vipassanāñāṇena aniccā pabhaṅgunoti ārammaṇato, uttarakālam asammohato maggaparamparāya phusitvā phusitvā **vayaṃ passanto**. **Virajjatīti** maggavirāgena virajjati. **Sammasanacāravedanā kathitā** āradhavi passakānaṃ vasena desanāti. Lokiyalokuttarehi ñāṇehi yāthāvato pari jānanaṃ paṭivijjhanam **ñāṇaphusanam**.

Sukhasuttavaṇṇanā niṭṭhitā.

3. Pahānasuttavaṇṇanā

251. Sabbampi aṭṭhasatapabhedam **taṅham chindi** samucchedapahānavasena pajahi. Tenāha “**samucchindī**”ti. Yadaggena taṅhā sabbaso samucchinnā, tadaggena sabbānipi saññojanānīti āha “**dasavidhampī**”tiādi. **Sammāti** suṭṭhu. Pahānañca nāma upāyena ñāyena pahānanti āha “**hetunā kāraṇenā**”ti. **Dassanābhisamayāti** asammoḥapaṭivedhā. Arahattamaggo hi uppajjamānova sabhāvapaṭicchādakaṃ moham viddhamṣento eva pavattati, tena māno yāthāvato diṭṭho nāma hoti, **ayamassa dassanābhisamayo**. Yathā hi sūriye uṭṭhite andhakāro viddhamṣiyamāno vihato, evam arahattamagge uppajjamāne so sabbaso pahīno eva hoti, na tasmim santāne patiṭṭham labhati, **ayamassa pahānābhisamayo**. Tena vuttam “**arahattamaggo hī**”tiādi. **Kiccavasenāti** asammoḥapaṭivedhasaṅkhātassa dassanakiccassa anipphādanavasena.

Ye ime cattāro antāti sambandho. **Mariyādantoti** mariyādasāṅkhāto anto. Esa nayo sesattayepi. **Tesūti** catūsu antesu. **Adum catutthakoṭisaṅkhātam** sabbasseva vaṭṭadukkhasa **antam** paricchedam arahattamaggena mānassa diṭṭhattā pahīnattā ca **akāsīti** yojanā. **Samussayo** attabhāvo.

Na riñcatīti na viveceti na vissajjeti. Tenāha “**sampajaññaṃ na jahatī**”ti, sampajaññaṃ na pariccajatīti attho. **Saṅkhyam nopetīti** imassa “**diṭṭhadhamme anāsavo**”ti imassa vasena attham vadanto “**ratto duṭṭho**”ti avoca saupādisesanibbānavasena. **Saṅkhyam nopetīti** vā diṭṭhe-dhamme anāsavo dhammaṭṭho vedagū kāyassa bhedaṃ manusso devoti vā paññattim na upetīti anupādisesanibbānavasenapi attho vattabbo. Ettha ca sukhādīsu vedanāsu yathākkamaṃ rāgānusayādayo kathitāti āha – “**imasmim sutte ārammaṇānusayo kathito**”ti. Yo hi rāgādi paccayasamavāye atītiṭṭhādīsu uppajjanāraho maggena appahīno, so “**rāgānusayo**”tiādinā vutto, appahīnattho so maggena pahātabbo, na pariyaṭṭhānābhībhavatthoti.

Pahānasuttavaṇṇanā niṭṭhitā.

4. Pātālasuttavaṇṇanā

252. Yattha patiṭṭhā natthi ekantikāti ekantikassa mahato pātassa alanti ayamettha attho adhippetoti āha “**natthi ettha patiṭṭhā**”ti. **Asambhūtattanti** na sambhūtattam, musāti attho. **Soti** assutavā puthujjano. Yam tam udakam patatīti yojanā. Yasmā samuddapiṭṭhe antarantarā verambhavātasadiso mahāvāto uṭṭhahitvā mahāsamudde udakam uggacchāpeti, tam kadāci cakkavālābhīmukham, kadāci sinerupādābhīmukham gantvā tam patihanati, tasmā vuttam “**balavāmukham mahāsamuddassā**”tiādi. **Vegena pakkhandivāti** mahatā vātavegena samuddhatam teneva vegena pakkhandantañca hutvā. **Mahānarakapapāto viyāti** yojanāyāma vitthāragambhīrasobbhapapāto viya hoti. **Tathārūpānanti** tattha vasitum samatthānam. **Asantanti** abhūtam. Atthavasena hi vācā abhūtam nāma.

Na patiṭṭhāsīti patiṭṭham na labhi. **Anibaddhanti** anibandhanattham yaṃkiñci. **Dubbalañāpoti** ñāṇabalarahito. “**Assutavā puthujjano**”ti vatvā “**sutavā ariyasāvako**”ti vuttattā “**sotāpanno dhura**”nti vuttam. Itaresu ariyasāvakesu vattabbameva natthi. Tesañhi vedanā supariññātā. **Balavavipassako... pe... yogāvacaropi vaṭṭati** mattaso vedanānam pariññātattā.

Pātālasuttavaṇṇanā niṭṭhitā.

5. Daṭṭhabbasuttavaṇṇanā

253. Vipariñāmanavasena dukkhato daṭṭhabbāti kiñcāpi sukhā, pariñāmadukkhatā pana sukhavedanāya ekantikāti. **Vinivijjanaṭṭhenāti** pīlanavasena attabhāvassa vijjanaṭṭhena. **Hutvāti** paccayasamāgamena uppajjitvā. Tena pākabhāvapubbako attalābho vutto. **Abhāvākārenāti** bhaṅgupagamanākārena. Tena viddhamṣabhāvo vutto. Ubhayena udayabbayapariicchinnatāya sikhappattam aniccataṃ dasseti. Svāyam hutvā abhāvākāro itarāsupi vedanāsu labbhateva, adhiko ca pana dvinnam dukkhasabhāvo. Dukkhatāvasena purimānam vedanānam daṭṭhabbatāya dassitattā

pacchimāya vedanāya evaṃ daṭṭhabbatā dassitā. **Addāti** ñāṇagatiyā sacchikatvā adakkihi. Ñāṇagamanañhetam, yadidaṃ dukkhato dassanam. **Santasabhāvam** sukhadukkhato upasantarūpattā.

Daṭṭhabbasuttavaṇṇanā niṭṭhitā.

6. Sallasuttavaṇṇanā

254. Dvīsu janesūti sutavantaassutavantesu dvīsu janesu. **Anugatavedhanti** pubbe pavattavedhassa anugatavedham. **Balavatarā** diguṇā viya hutvā dalhatarapavattiyā. **Evamevāti** yathā viddhassa purisassa anuvedhanā balavatarā, evameva. **Samādhimagghaphalāni nissaraṇam** vikkhambhanasamucchedapaṭippassaddhivasena. Samādhisisena hettha jhānañca gahitam. **So na jānāti** anadhigatattā. **Nissaraṇanti jānāti** anissaraṇameva. **Tāsam** samadhigatānam **sukhadukkhavedanānam**. **Na vippayutto** appahīnakilesattā. **Saṅkhātadhammassāti** saṅkhāya paññāya pariññātacatukkhandhassa. Tenāha “**tulitadhammassā**”ti. **Imasmimpi sutte** purimasutte viya **ārammaṇānusayova kathito**, so pana tattha vuttanayeneva veditabbo. Anurodhavirodhaphānassa vuttattā **khīṇāsavo dhuraṃ**. **Anāgāmīpi vaṭṭati**, tassa virodhappahānam labhati.

Sallasuttavaṇṇanā niṭṭhitā.

7. Paṭhamagelaññasuttavaṇṇanā

255. Saddahitvā gilāne upaṭṭhātabbe maññissantīti yojanā. **Tatthāti** tasmim ṭhāne. Kammatṭhānānuyogo sappāyo yesam te **kammattṭhānasappāyā**, satipaṭṭhānaratāti attho. **Aniccatam anupassantoti** kāyam paṭicca uppanāya vedanāya ca aniccatam anupassanto. **Vayam anupassantoti**ādīsipi eseva nayo. **Vayanti** pana tāya eva khayasaṅkhātam. **Virāganti** virajjanam. **Paṭinissagganti** pariccāgapaṭinissaggaṃ, pakkhandanapaṭinissaggampi vā.

Āgamanīyapaṭipadāti ariyamaggassa āgamaṇaṭṭhāniyā pubbabhāgapaṭipadā. **Pubbabhāgāyeva** na lokuttarā. **Sampajañnam** pubbabhāgiyameva. **Tisso anupassanā pubbabhāgāyeva** vipassanāpariyāpannattā. **Missakāti** lokiya lokuttaramissakā. **Bhāvanākālo dassito** “nirodhānupassino viharato, paṭinissaggānupassino viharato rāgānusayo pahīyati”ti vuttattā.

Paṭhamagelaññasuttavaṇṇanā niṭṭhitā.

8-9. Dutiyagelaññasuttādivaṇṇanā

256-257. Phassam paṭiccāti ettha phassasīsenā phassāyatanānam gahaṇam. Na hi phassāyatanehi vinā phassassa sambhavo. Tenāha “**kāyova hi ettha phassoti vutto**”ti, phassasīsenā vuttoti adhippāyo. **Navamam uttānameva** heṭṭhā vuttanayattā.

Dutiyagelaññasuttādivaṇṇanā niṭṭhitā.

10. Phassamūlakasuttavaṇṇanā

258. Sukhavedanāya hitam **sukhavedaniyam**. So panesa hitabhāvo paccayabhāvenāti āha “**sukhavedanāya paccayabhūta**”nti. **Imasmimpi suttadvayeti** imasmim navame dasame ca suttepi. **Sammasanacāravedanāti** sammasanīyavedanā eva kathitā, na lokuttarāti adhippāyo.

Phassamūlakasuttavaṇṇanā niṭṭhitā.

Sagāthāvaggavaṇṇanā niṭṭhitā.

2. Rahogatavaggo

1. Rahogatasuttavaṇṇanā

259. Yamkiñci vedayitanti “sukhaṃ dukkhaṃ adukkhamasukha”nti vuttaṃ vedayitaṃ dukkhasmiṃ antogadhaṃ, dukkhanti vattabbaṃ labhati pariyāyenāti attho. Tenāha “**taṃ sabbhaṃ dukkhanti attho**”ti. **Yā esāti**ādīsu yo saṅkhārānaṃ aniccatāsaṅkhāto hutvā abhāvākāro, yā khayasaṅkhāvatā vinassanasāṅkhāvatā jarāya maraṇena cāti dvidhā vipariṇāmanasāṅkhāvatā, etaṃ sandhāya uddissa sabbhaṃ vedayitaṃ dukkhanti mayā vuttanti ayaṃ saṅkhepattho. **Sāti** saṅkhārānaṃ aniccatā. **Vedanānampi aniccatā eva** saṅkhārasāṅkhāvatā. Tāsaṃ aniccatā ca nāma maraṇaṃ bhaṅgoti katvā tato uttari dukkhaṃ nāma natthīti **sabbā vedanā “dukkhā”ti vuttā**, yathā “yadaniccaṃ taṃ dukkha”nti ca, “pañcupādānakkhandhā dukkhā”ti ca vuttaṃ. **Idaṃ** suttapadaṃ. **Cattāro āruppāti** catasso arūpasamāpattiyo. **Etthāti** ca etasmiṃ paṭippassaddhivāre.

Rahogatasuttavaṇṇanā niṭṭhitā.

4. Agārasuttavaṇṇanā

262. Puratthimāti vibhattilopena niddeso, nissakke vā etaṃ paccattavacanaṃ. **Paṭhamajjhānādivasenāti** paṭhamadutiyaṃjjhānavasena. **Anussativasenāti** nidassanamattaṃ aññassapi upacārajjhānaggahitassa savitakkacārassa nirāmisassa sukhassa labbhanato. Tassapi vā **paṭhamajjhānādīti** ettha **ādi**-saddena saṅgaho daṭṭhabbo. Kāmahetu dukkhappattānaṃ dukkhavedanā kāmāmisena **sāmisā vedanā**. **Anuttaravimokkhā** nāma arahattaphalaṃ. “Kudāssu nāmāhaṃ tadāyatanāṃ upasampajja viharissāmī”ti evaṃ pihaṃ upaṭṭhāpayato tasmim anijjhamāne pihappaccayā **uppannadomanassavedanā**. Nekkhammanissitā upekkhāvedanā **nirāmisā adukkhamasukhā** nāma. Savisesaṃ pana dassetuṃ “**catutthajjhānavasena uppannā adukkhamasukhavedanā**”ti vuttaṃ.

Agārasuttavaṇṇanā niṭṭhitā.

5-8. Paṭhamaānandasuttādivaṇṇanā

263-266. Heṭṭhā kathitanayāneva, veneyyajjhāsayaṃ pana tesāṃ desanāti daṭṭhabbaṃ. **Etthāti** etesu catūsu suttesu. **Purimāni dve** “paṭhamaṃ jhānaṃ samāpannassa vācā paṭippassaddhā hotī”tiādīnā nayena yāva khīṇāsavassa kilesapaṭippassaddhi, tāva desanāya pavattattā “**paripuṇṇapassaddhikāni**”ti vuttāni. Tāva paripūraṃ katvā adesitattā “**pacchimāni upaḍḍhapassaddhikāni, desanāyā**”tiādī vuttaṃ.

Paṭhamaānandasuttādivaṇṇanā niṭṭhitā.

9-10. Pañcakaṅgasuttādivaṇṇanā

267-268. Daṇḍamuggaraṃ aggasoṇḍamuggaraṃ. Kālasuttapakkipanaṃ **kālasuttanāli**. Vāsiādīni pañca āngāni assāti **pañcakaṅgo**. Vatthuvijjāya vuttavidhinā kattabbanissayāni ṭhapatīti **thapati**. **Paṇḍitaudāyitthero**, na lāḷudāyitthero. **Dvepānandāti** aṭṭhakathāya paduddhāro kato – “dvepi mayā ānandā”ti pana pāliyaṃ. Pasādakāyasannissitā **kāyikā**, cetosannissitā **cetasikā**. Ādhipaccaṭṭhena sukhameva indriyanti **sukhindriyaṃ**. **Upavicāravasenāti** rūpādīni upecca vicaraṇavasena. **Atīte** ārammaṇe. **Paccuppanneti** addhāpaccuppanne. **Evaṃ** aṭṭhādhiyaṃ sataṃ **aṭṭhasataṃ**.

Pāṭiyekko anusandhīti pucchānusandhiādīhi visuṃ tehi asammisso eko anusandhi. **Ekāpi vedanā kathitā** “tatra, bhikkhave, sutavā ariyasāvako”ti āharitvā “phassapaccayā vedanā”ti. Yasmā bhagavā catutthajjhānupekkhāvedanaṃ vatvā – “atthānanda, etasmā sukhā aññaṃ sukha”ntiādiṃ vadanto **thapatino vādaṃ upatthambheti** nāma. Tena hi upekkhāvedanā “sukha”nteva vuttā santasabhāvattā. **Abhikkantataranti** ativiya kantataraṃ manoramatararaṃ. Tenāha “**sundaratara**”nti. **Paṇītataranti** padhānabhāvaṃ nītatāya uḷārataraṃ. Tenāha “**atappakatara**”nti. **Sukhanti vuttā** paṭipakkhassa suṭṭhu khādanena, sukaraṃ okāsādānamassāti vā. **Nirodho sukhaṃ nāma** sabbaso udayabbayābhāvato. Tenāha “**niddukkhabhāvasaṅkhātena sukhaṭṭhenā**”ti.

Sukhasmiṃyevāti sukhamicceva paññapeti. **Nirodhasamāpattiṃ sīsaṃ katvāti** nirodhasamāpattidesanāya sīsaṃ uttamaṃ katvā. Desanāya uddesādhimutte uṭṭhāpetvā vitthāritattā “**neyyapuggalassa vasenā**”ti vuttaṃ. **Dasamaṃ** anantarasutte vuttanayatā **uttānatthameva**.

Pañcakaṅgasuttādivaṇṇanā niṭṭhitā.

Rahogatavaggavaṇṇanā niṭṭhitā.

3. Aṭṭhasatapariyāyavaggo

1. Sīvakasuttavaṇṇanā

269. Cūlā pana assa mahatī atthi savisesā, tasmā “**moḷiyasīvako**”ti vuccati. **Channaparibbājakoti** kambalādinā kopīnapaṭicchādakaparibbājako. **Pittapaccayānīti** pittahetukāni. “**Tisso vedanā**”ti vatvā tāsamaṃ sambhavaṃ dassetuṃ “**katha**”ntiādi vuttaṃ. **Kusalavedanā uppajjati** pittapaccayā. **Pittabhesajjaṃ karissāmīti** bhesajjasambharaṇatthañceva tadatthamaṃ āmisakiñjakkhasambharaṇatthañca pānaṃ hanatīti yojanā. **Majjhatto** bhesajjakaraṇe udāsīno.

Tasmāti yasmā pittādipaccayahetukanti attano ca lokassa ca paccakkhamaṃ atidhāvanti ye samaṇā vā brāhmaṇā vā, tasmā tesamaṃ micchā. Pittādīnaṃ tiṇṇampi samodhānasannipāte jātāni **sannipātikāni**. Purimautuno visadiso utuvipariṇāmoti āha “**visabhāgaututo jātāni**”ti. Anudako thaddhalūkhabhūmivibhāgo **jaṅgaladeso**, vuttavipariyāyena **anupadeso** veditabbo. **Malayamaṃ** himasītabahulo, itaro uṇhabahulo.

Attano pakaticariyānaṃ visamaṃ kāyassa pariharaṇavasena, jātāni pana asayhasahanaadesaakālacaraṇādīnā vedītabbānīti āha “**mahābhāravahanā**”tiādi. Parassa upakkamato nibbattāni **opakkamikānīti** āha – “**ayamaṃ coro vā**”tiādi. **Kevalanti** bāhirapaccayamaṃ anapekkhitvā kevalamaṃ teneva. Tenāha “**kammavipākatova jātāni**”ti. **Sakkā paṭibāhituṃ** patīkārena. **Lokavohāro nāma kathito** pittasamuṭṭhānādisamaññāya lokasiddhattā. Kāmaṃ sarīrasannissitā vedanā kammanibbattāva, tassā pana paccuppannapaccayavasena evamayaṃ lokavohāroti vuttañceva gahetvā paravādapaṭisedho katoti daṭṭhabbamaṃ.

Sīvakasuttavaṇṇanā niṭṭhitā.

2-10. Aṭṭhasatasuttādivaṇṇanā

270-278. Vedanānaṃ aṭṭhādhikamaṃ satamaṃ, tassa aṭṭhasatassa tabbhāvassa pariyaṃyō kāraṇamaṃ ettha atthīti **aṭṭhasatapariyāyo**, suttamaṃ. Tenāha “**aṭṭhasatassa kāraṇabhūta**”nti. **Dhammakāraṇanti** pariyaṭṭidhammabhūtaṃ kāraṇamaṃ. **Kāyikāti** pañcadvārakāyikā. Tenāha “**kāmāvacareyeva labbhanti**”ti, kāmabhūmikāti attho. **Arūpāvacare natthi**, tibhūmikāti attho. Tenāha – “arūpe tikacatukkajjhānaṃ uppajjati, tañca kho lokuttaraṃ, na lokiya”nti. **Itarā** upekkhāvedanā. **Upavicaranti**

upecca pajjantīti attho. **Tamsampayuttānanti** vicārasampayuttānaṃ.

Paṭilābhatoti paṭiladdhabhāvato. **Samanupassatoti** paccavekkhato passato. **Atītaṃ** khaṇattayātikkaṃmena atikkantaṃ, niruddhappattiyā **niruddhaṃ**, pakativijahanena **vipariṇataṃ**. **Samanussaratoti** cintayato. **Gehassitanti** kāmaguṇanissitaṃ. Kāmaguṇā hi idha gehanissitadhammena gehapariyāyena vuttā.

Vipariṇāmavirāganirodhanti vipariṇāmanaṃ virajjanalakkhaṇaṃ nirujjhanañca viditvā. **Pubbeti** atīte. **Etarahīti** idāni vattamānā. **Sammappaññāya passatoti** vipassanāpaññāya ceva maggapaññāya ca yāthāvato passato. **Ussukkāpetunti** vipassanaṃ paṭṭhapetvā maggapaṭivedhaṃ pāpetuṃ. Nibbānaṃ uddissa pavattitattā **nekkhammassitasomanassāni nāma**. **Lokāmisapaṭisaṃyuttānanti** kāmaguṇanissitānaṃ. **Tadāyatananti** taṃ āyatanam taṃ kāraṇam arahattaṃ. **Anuttaresu vimokkhesūti** ariyaphaladhammesu. **Pihanti** adhigamicchaṃ.

Upekkhāti somanassarahitaaññānupekkhā. Bālyayogato **bālassa**, tato eva **mūhassa puthujjanassa**. Kilesodhīnaṃ maggodhīhi ajitattā **anodhijinassa**. Sattamabhavādito uddhaṃ pavattanavipākassa ajitattā **avipākajinassa**. Anekādīnave vaṭṭe ādīnavassa ajānanena **anādīnavadassāvino**. Paṭipattiapaṭivedhabāhusaccābhāvena **assutavato puthujjanassa**. **Rūpaṃ sā nātivattati** na atikkamati ñāṇasampayuttābhāvato. **Sabbasaṅgāhakoti** sabbadhamme saṅgaṇhanako. **Tatiyādīni** yāva dasamā heṭṭhā vuttanayattā **uttānatthāneva**.

Atṭhasatasuttādivaṇṇanā niṭṭhitā.

11. Nirāmisasuttavaṇṇanā

279. Ārammaṇato sampayogato ca kilesāmisena **sāmisā**. **Nirāmisāyāti** nissakkavacanaṃ. **Nirāmisatarāvāti** ekaṃsavacanaṃ tassā tathā nissametabbatāya. Sā hi pīti sabbaso santakilesāmise santāne pavattiyā accantasabhāvadhammārammaṇavisayatāya sayampī sātisaṃyamaṃ santasabhāvākārena pavattiyā nirāmisāyapī nirāmisatarā vuttā. Tenāha “**nanu cā**”tiādi. Idāni tamatthaṃ upamāya sādhetuṃ “**yathā hī**”tiādīmāha. **Appaṭihārikanti** paṭiharaṇarahitaṃ appaṭihāraṃ, kenaci anāvaṇṇanti attho. **Sesavāresūti** sukhavāraupekkhāvāresu.

Vimokkhavāro pana na atidiṭṭho itarehi visadisattā. Tenāha “**vimokkhavāre panā**”tiādi. **Rūpapaṭisaṃyuttoti** bhāvitarūpapaṭisaṃyutto. Sāmisō nāma yasmā sāmisa-rūpapaṭibaddhavutti ceva sāmisa-rūpapaṭibhāgañca, tasmā “rūpāmisa”nti vuccati, tena rūpāmisenā **sāmisō nāma**. Arūpāmisaṃsa bhāvato **arūpapaṭisaṃyutto** vimokkho **nirāmisō nāma**.

Nirāmisasuttavaṇṇanā niṭṭhitā.

Atṭhasatapariyāyavaggavaṇṇanā niṭṭhitā.

Vedanāsāṃyuttavaṇṇanā niṭṭhitā.

3. Mātugāmasāṃyuttaṃ

1. Paṭhamapeyyālavaggo

1-2. Mātugāmasuttādivaṇṇanā

280-281. **Aguṇaṅgehīti** aguṇakoṭṭhāsehi. Rūpayatīti rūpaṃ, sarīrarūpaṃ. Sarīrarūpaṃ pāsamsaṃ

etassa atthīti rūpavā, tappaṭṭikkhepena **na ca rūpavā**, sampannarūpo na hotīti attho. Ñātikulato aññato vā āgatāya bhogasampadāya abhāvena **na bhogasampanno. Dussīloti** nissīlo. Nissīlatāya eva cassā pubbuttāyitādiācārābhāvo vutto. **Ālasiyoti** ālasiyatāya yutto. **Pajañcassa na labhatīti** pajābhāvasīsenā tassā parivārahāni vuttā. **Parivattetabbanti** purisavasena parivattetabbam.

Mātugāmasuttādivaṇṇanā niṭṭhitā.

3. Āveṇikadukkhasuttavaṇṇanā

282. Āveṇitabbato mariyādāya viṣuṃ asādhāraṇato passitabbato **āveṇikāni**. Paṭipacceke puggale niyuttānīti **pāṭipuggalikāni. Paricārikabhāvanti** upaṭṭhāyikabhāvaṃ.

Āveṇikadukkhasuttavaṇṇanā niṭṭhitā.

4. Tīhidhammehisuttādivaṇṇanā

283-303. Maccheramalapariyuṭṭhitenāti macchariyamalena abhibhūtena. **Tenāti** kassaci kiñci adānena ca. **Etam** “maccheramalapariyuṭṭhitenā”tiādi vuttaṃ. **Vilokento vicarati** issāpakatacittatāya. **Pañcamādīni** yāva ekādasamā **uttānatthāneva**.

Tīhidhammehisuttādivaṇṇanā niṭṭhitā.

3. Balavaggo

1. Visāradasuttavaṇṇanā

304. Rūpasampatti rūpabalaṃ taṃsamaṅgino upatthambhakabhāvato. Esa nayo sesesupi. Balāni hi sattānaṃ vuḍḍhiyā upatthambhakapaccayo hoti, yathā taṃ āhāro. Tenāha – “**imāni**”tiādi.

Visāradasuttavaṇṇanā niṭṭhitā.

2-10. Pasayhasuttādivaṇṇanā

305-313. Abhibhavitvā sabbam antojanaṃ sāmikañca. **Nāsentīti** nāsaṇaṃ adassaṇaṃ nenti nīharantīti attho.

Pasayhasuttādivaṇṇanā niṭṭhitā.

Mātugāmasaṃyuttavaṇṇanā niṭṭhitā.

4. Jambukhādakaṣaṃyuttaṃ

1. Nibbānapañhasuttavaṇṇanā

314. Nibbānaṃ āgammāti ettha āgammāti sabbasaṅkhārehi nibbinnassa viṣaṅkhāraninnassa gotrabhunā vivaṭṭitamānasassa maggena sacchikaraṇenāti attho. Sacchikiriyaṃānañhi taṃ adhigantvā ārammaṇapaccayabhūtañca paṭicca adhipatipaccayabhūte ca tasmim paramassāsabhāvena vimuttasaṅkhārassa paramagatibhāvena ca paṭiṭṭhānabhūte paṭiṭṭhāya khayasaṅkhāto maggo rāgādike khepetīti taṃsacchikaraṇābhāve rāgādīnaṃ anuppattinirodhagamaṇābhāvato “**nibbānaṃ āgamma rāgo**”

khīyati’ti vuttaṃ.

Imināva suttenāti imināva jambukhādakasuttena. **Kilesakkhayamattaṃ nibbānanti vadeyya** “rāgakkhayo”’tiādīnā sutte āgatattā. “Kilesakkhayamatta”’nti avisesena vuttattā āha “**kassā**”’tiādi. **Addhā attanoti vakkhati** “parassa kilesakkhayena parassa nibbānasampatti na yuttā”’ti. Nibbānārammaṇakaraṇena gotrabhukkhaṇe kilesakkhayappattitā ca āpannāti āha – “**kiṃ pana tesu akhīṇesuyevā**”’tiādi. Nanu ārammaṇakaraṇamattena kilesakkhayo anuppattoti na sakkā vattum. Cittaṅhi atītānāgatādisabbaṃ ālambanaṃ karoti, na nipphannamevāti. Gotrabhūpi maggena yā kilesānaṃ anuppattidhammatā kātabbā, taṃ ārabba pavattissatī? Na, appattanibbānassa nibbānārammaṇañābhāvato. Na hi aññe dhammā viya nibbānaṃ, taṃ pana atigambhīrattā appattena ālambitum na sakkā, tasmā tena gotrabhunā pattabbena tikālikasabhāvātikkantagambhīrabhāvena bhavitabbaṃ, kilesakkhayamattataṃ vā icchato gotrabhuto puretaraṃ nipphanna kilesakkhayena bhavitabbaṃ. Appattakilesakkhayārammaṇakaraṇe hi satī gotrabhuto puretaracittānīpi ālabbeyyunti.

Tasmātiādi vuttasseva atthassa nigamaṇaṃ. **Taṃ panetaṃ** nibbānaṃ. **Rūpino dhammā arūpino dhammātiādīsūti ādisaddena** lokuttaraanāsavādīnaṃ saṅgho daṭṭhabbo. Arūpadhammādhībhāvaggahaṇena cassa parinipphannatā dīpitā. Tenāha “**na kilesakkhayamattamevā**”’ti. Kilesakkhayamattatāya hi satī nibbānassa bahutā āpajjati “yattakā kilesā khīyanti, tattakāni nibbānāni”’ti. Abhāvassabhāvato gambhīrādībhāvo asaṅkhatādībhāvo ca na siyā, vutto ca so nibbānassa, tasmāssa paccetabbo parinipphannabhāvo. Yasmā ca sammutisaccārammaṇaṃ saṅkhatadhammārammaṇaṃ vā samucchavedasena kilese pajahitum na sakkoti, yato mahaggatañāṇaṃ vipassanāñāṇaṃ vā kilesavikkhambhanavasena tadaṅgasena vā pajahati, tasmā ariyamaggañāṇassa sammutisaccasaṅkhatadhammārammaṇehi viparītasabhāvena ārammaṇena bhavitabbaṃ. Tathā hi taṃ samucchavedasena kilese pajahīti evaṃ parinipphannasaṅkhatasabhāvaṃ nibbānanti niṭṭhamettha gantabbanti.

Nibbānapañhasuttavaṇṇanā niṭṭhitā.

3-15. Dhammavādīpañhasuttādivaṇṇanā

316-328. Pahāya gatattāti ariyamaggena jahitvā ñāṇagamanena gatattā. **Suṭṭhu gatāti** sammā gatā paṭipannāti **sugatā. Parijānanatthanti** tīhi pariññāhi parijānanatthaṃ. **Dukkhasaṅkhātōti** “dukkha”’nti saṅkhātabbo viditabbo ca **dukkhasabhāvo** dhammo **dukkhadukkhatā**. Yasmā dukkhavedanāviniṃmittasaṅkhatadhamme sukhavedanāya ca yathā idha saṅkhāradukkhatā vipariṇāmadukkhatāti dukkhapariyāyo niruppateva, tasmā dukkhasabhāvo dhammo ekena dukkhasaddena visesetvā vutto “**dukkhadukkhatā**”’ti. **Sesapadadvayeti** saṅkhāradukkhatā vipariṇāmadukkhatāti etasmiṃ padadvaye. Saṅkhārabhāvena dukkhasabhāvo **saṅkhāradukkhatā**. Sukhassa vipariṇāmanena dukkhasabhāvo **vipariṇāmadukkhatā**.

Dhammavādīpañhasuttādivaṇṇanā niṭṭhitā.

16. Dukkarapañhasuttavaṇṇanā

329. Pabbajjāyāti pabbajitapaṭipattiyā. **Dhammānudhammapaṭipanno bhikkhūti** dhammānudhammaṃ paṭipajjamāno bhikkhu. **Pātanti** pāto. **Nacirassanti** khippameva. Tenāha “**lahuyevā**”’ti.

Dukkarapañhasuttavaṇṇanā niṭṭhitā.

Jambukhādakasamṃyuttavaṇṇanā niṭṭhitā.

5. Sāmaṇḍakasam̐yuttavaṇṇanā

330-331. Imināva nayanāti yo jambukhādakasam̐yutte atthanayo, imināva nayena. Iminā hi dve sam̐yuttāni pālīto atthato ca aññamaññaṃ sadisānevāti dasseti.

Sāmaṇḍakasam̐yuttavaṇṇanā niṭṭhitā.

6. Moggallānasam̐yuttam̐

1-8. Paṭhamajjhānapañhasuttādivaṇṇanā

332-339. Kāmasahagatesu saññāmanasikāresu upaṭṭhahantesu byāpādādisahagatāpi saññāmanasikārā yathāpaccayaṃ upaṭṭhahantiyevāti vuttam̐ “kāmasahagatāti pañcanīvaraṇasahagatā”ti. Nīvaraṇānañhettha nidassanamattametam̐, yadidaṃ kāmaggahaṇam̐. Pahīnāvasesā cettha nīvaraṇā veditabbā, tasmā pañcaggahaṇam̐ na kattabbaṃ. **Tassāti mahāmoggallānattherassa santato upaṭṭhahimsu** aciṇṇavasitāya. Tenāha **“hānabhāgiyaṃ nāma ahoṣī”**ti. **Ārammaṇa...pe... sahatanti vuttam̐** itaresaṃ abhāvato.

Paṭhamajjhānapañhasuttādivaṇṇanā niṭṭhitā.

9. Animittapañhasuttavaṇṇanā

340. Vipassanāsamādhim̐yeva, na phalasangādhim̐. **Chejjakiccaṃ na nipphajjati** avicchedavasena appavattanato. **Nikantīti** vipassanaṃ assādentī pavattataṇhā. **Sādhetaṃ nāsakkhi** upakkiliṭṭhattā. **Nimittānusārīti** nicasukhaattanimittānaṃ apūraṇato rāgadosamohanimitānipettha nimittāneva. **Vuṭṭhāna...pe... samādhinti** etena yāva maggo nādhigato, tāva vuṭṭhānagāminivipassanamanuyuñjantopi yathārahaṃ animittam̐ appaṇihitam̐ suññatam̐ cetosamādhim̐ anuyutto viharatīti vattabbaṃ arahatīti dasseti. **Vipassanāsampayuttanti** vipassanāsāṅkhātāññasampayuttam̐. **Cetosamādhinti** cittasīsenā vipassanāsamādhimāha. **Uparimaggaphalasangādhinti** paṭhamamaggasamādhissa pageva adhigatattā.

Animittapañhasuttavaṇṇanā niṭṭhitā.

10-11. Sakkasuttādivaṇṇanā

341-342. Aveccappasādenāti vatthuttayaṃ yāthāvato ñatvā uppannapasādena, maggenāgatapasādenāti attho. So pana kenaci asaṃhāriyo asampavedhīti āha **“acalappasādenā”**ti. **Abhibhavanti** attano puññānubhāvena.

Sakkasuttādivaṇṇanā niṭṭhitā.

Moggallānasam̐yuttavaṇṇanā niṭṭhitā.

7. Cittasam̐yuttam̐

1. Saṃyojanasuttavaṇṇanā

343. Bhogagāmanti bhoguppattigāmaṃ. **Pavattatīti** appaṇihatam̐ hutvā pavattati paṭisambhidappattiyā.

Samyojanasuttavaṇṇanā niṭṭhitā.

2. Paṭhamaisidattasuttavaṇṇanā

344. Avisāradattāti pañhaṃ byākātuṃ veyyattiyābhāvena asamatthattā. Upāsako theresu byākātuṃ asakkontesu sayam byākātukāmo pucchati, na vihesādhippāyo. Paṭhamavacanena abyākaronte dīsvāva punappunam pucchitam viheso viya hotīti katvā vuttam **“viheseti”**ti.

Paṭhamaisidattasuttavaṇṇanā niṭṭhitā.

3. Dutiyaisidattasuttavaṇṇanā

345. Avantiyāti avantiratthe, tam pana majjhimapadesato dakkhiṇadisāyam. Tenāha **“dakkhiṇāpathe”**ti. **Adhippāyenā**ti tassa vacanassa anumodanādhippāyena vadati, na pana tato kiñci gahetukāmatādhippāyena.

Dutiyaisidattasuttavaṇṇanā niṭṭhitā.

4. Mahakapāṭihāriyasuttavaṇṇanā

346. Tesam anujānantoti tesam dāsakammakarānaṃ sesake yathārucci vicāraṇaṃ anujānanto. **Kudhitanti** balavatā sūriyasantāpena saṅkuthitam. Tenāha **“heṭṭhā”**tiādi. **Atitikhīṇanti** ativiya tikkhadhātukaṃ. **Asambhinnapadanti** aññattha anāgatattā tipītake avomissakapadaṃ, idheva āgatapadanti attho. **Paṭilīyamānenā**ti paṭikamsena visesanena vilīyamānena kāyena.

Ettha cāti etasmim adhiṭṭhāniddhikaraṇe. **Abbhamaṇḍapaṃ katvā**ti samantato chādanavasena maṇḍapaṃ viya meghapaṭalaṃ uppādetvā. **Devoti** megho. **Ekamekaṃ** phusitakaṃ **phusāyatu** jālavinaddhaṃ viya vassatu. Evaṃ vuttappakārena nānāparikammaṃ nānādhiṭṭhānaṃ ekato parikammaṃ ekato adhiṭṭhānanti catukkametta sambhavatīti dasseti **“ettha cā”**tiādinā. **Yathā tathā**ti yathāvuttesu catūsu pakāresu yena vā tena vā pakārena **karontassa**. **Kataparikammassā**ti “evaṃ vā evaṃ vā hotū”ti pavattitaparikammacittassa. **“Parikammānantarenā**ti adhiṭṭhānacittuppādanatthaṃ samāpannapādakajjhānato vuṭṭhāya adhiṭṭhānacittassa ekāvajjanavīthiyaṃ pavattaparikammaṃ sandhāya vutta”nti vadanti.

Mahakapāṭihāriyasuttavaṇṇanā niṭṭhitā.

5. Paṭhamakāmabhūsuttavaṇṇanā

347. Elaṃ vuccati doso, tam etassa natthīti nelaṃ, tam aṅgaṃ etassāti **nelaṅgo**, suvisuddhasīlaguṇo. Tenāha “nelaṅganti kho, bhante, sīlānametaṃ adhivacana”nti. Aṭṭhakathāyaṃ pana dosābhāvameva dassetuṃ **“nelaṅgoti niddoso”**ti vuttam. **Etaṃ bhikkhuṃ āgacchantanti** mahākappinattheraṃ sandhāya vuttam. **Attano diṭṭhena kathesi**ti attano sabbaññutaññāṇena paccakkhato upalakkhitena atthena kathesi. **Ayaṃ pana nayaggāhenā**ti ayaṃ pana gahapati asutvā kevalaṃ nayaggāhena āha.

Paṭhamakāmabhūsuttavaṇṇanā niṭṭhitā.

6. Dutiyakāmabhūsuttavaṇṇanā

348. Nirodhaṃ valañjeti anāgāmibhāvato. **Ime saṅkhārā**ti ime “kāyasāṅkhāro, vacīsāṅkhāro,

cittasaṅkhāro”ti vuccamānā tayo saṅkhārā. Saddatopi, atthatopi **aññamaññaṃ missā**, tato eva **ālulitā** ākulā, **avibhūtā** dubbibhāvanā, **duddīpanā** asaṅkarato dīpetuṃ dukkarā. Tathā hi kusalacetanā eva “kāyasaṅkhāro”tipi vuccati, “vacīsaṅkhāro”tipi, “cittasaṅkhāro”tipi. Assāsapassāsāpi katthaci “kāyasaṅkhāro”ti, vitakkavicārāpi “vacīsaṅkhāro”ti vuccanti, saññāvedanāpi “cittasaṅkhāro”ti vuccanti. Tena vuttaṃ “**tathā hī**”tiādi. Tattha ākaḍḍhitvā gahaṇaṃ **ādānaṃ**, sampattassa hatthe karaṇaṃ **gahaṇaṃ**, gahitassa vissajjanaṃ **muñcanaṃ**, phandaṇaṃ **copanaṃ pāpetvā** nipphādetvā. **Hanusañcopananti** kāyaviññattivāsena pubbabhāge hanusañcopanaṃ katvā. Evañhi vacībhedakaraṇaṃ. **Evaṃ imetiādi** yathāvuttassa atthassa nigamaṇaṃ.

Padatthaṃ pucchati itarasaṅkhārehi padatthato viśesaṃ kathāpessāmīti. **Kāyanissitāti** ettha kāyanissitā ca nesam tabbhāvabhāvitāya veditabbā, na kāyassa nissayapaccayatāvasenāti dassento “**kāye sati honti, asati na hontī**”ti āha. **Kāyoti** cettha karajakāyo daṭṭhabbo. **Cittanissitāti** cittaṃ nissāya taṃ nissayapaccayabhūtaṃ labhivā uppannā.

“Samāpajjāmī”ti padassa samīpe vuccamaṇaṃ “samāpajjissa”nti padaṃ āsannānāgatakālavācī eva bhavituṃ yuttaṃ, na itaranti āha – “**padadvayena nevasaññānāsaññāyatanaṃ samāpattikālo kathito**”ti. Tayidaṃ tassa tathā vattabbatāya vuttaṃ, na pana tassa tathā cittaṃ pavattisambhavato. Samāpannepi eseva nayo. **Purimehīti** “samāpajjissaṃ samāpajjāmī”ti dvīhi padehi. **Pacchimenāti** “samāpanno”ti padena.

Bhāvitam hoti uppāditaṃ hoti nirodhasamāpannatthāya. Anupubbasaṃpattisaṃpajjanasaṅkhātāya nirodhabhāvanāya taṃ cittaṃ bhāvitam hoti. Tenāha “**yaṃ ta**”ntiādi. **Dutiyaññāneyevāti** dutiyaññānakkhaṇe **nirujjhati**. Tattha anuppajjanato anuppādanato heṭṭhā nirodhoti adhippeto. Catunnaṃ arūpakkhandaṇaṃ tajjā parikammaṃ siddhā yā appavatti, tattha “nirodhasamāpattisaññā”ti, yā nesam tathā appavatti. Sā “**antonirodhe nirujjhati**”ti vuttā.

“Cittasaṅkhāro niruddho”ti vacanato tadaññesaṃ anirodhaṃ icchantānaṃ vādaṃ dassento “**cittasaṅkhāro niruddhoti vacanato**”tiādiṃ vatvā tattha atippasaṅgadassanaṃ mukhena taṃ vādaṃ nisedhetuṃ “**te vattabbā**”tiādimāha. **Abhinivesaṃ akatvāti** yathāgate byañjanaṃ matte abhinivesaṃ akatvā. **Ācariyaṇaṃ nayeti** ācariyaṇaṃ paramparāgate dhammanāyā dhammanettiyaṃ **ṭhatvā**.

Kiriyaṃ mayapavattasminti parittabhūmakakusalākusaladhammapabandhe **vattamāne**. Tasmiñhi vattamāne kāyika-vācasika-kiriyaṃ savavatti hoti, dassana-savanādivāsena ārammaṇaggahaṇe pavattamāneti attho. Tenāha – “**bahiddhārammaṇesu pasāde ghaṭṭentesū**”ti. **Makkhitāni viyāti** puñchitāni viya honti ghaṭṭanāya vibādhitattā. Etenāyaṃ ghaṭṭanā pañcadvārikaviññānaṃ vegasā uppajjanāya na ārammaṇanti dasseti. Tenevāha – “**antonirodhe pañca pasādā ativiya virocanti**”ti.

Tato paraṃ sacittako bhavissāmīti idaṃ atthato āpannaṃ gahetvā vuttaṃ – “ettakaṃ kālaṃ acittako bhavissāmī”ti eteneva tassa atthassa siddhattā. **Yaṃ evaṃ bhāvīti** ettha viṣuṃ cittaṃ bhāvanā nāma natthi, addhānaparicchedaṃ pana katvā nirodhasamāpattatthāya kātābaparikammabhāvanāya eva tassa sijjhanato.

Sā panesā nirodhakathā. **Dvīhi balehīti** samathavipassanābalehi. **Tayo ca saṅkhārānanti** tiṇṇaṃ kāyavacīcittasaṅkhārānaṃ paṭippassaddhiyā. **Soḷasahi ñāṇacariyāhīti** aniccānupassanādīnaṃ aṭṭhannaṃ anupassanāñānaṃ, aṭṭhannaṃ maggaṃ phalañānaṃ vasena imāhi soḷasahi ñāṇappavattīhi. **Navahi samādhicariyāhīti** aṭṭha samāpattiyo aṭṭha samādhicariyā, tāsam upacārasamādhī samādhībhāvasāmaññena ekā samādhicariyāti evaṃ navahi samādhicariyāhi. **Vasībhāvatāpaññāti** vasībhāvatāsaṅkhātā paññā. **Sabbākārena visuddhimagge kathitā**, te tāva ākāra tiṭṭhantu, sarūpamattassa panassa vattabbanti āha – “**ko panāyaṃ nirodho nāmā**”ti. Yadi khandhānaṃ appavatti, **atha kimatthametam** jhānasukhādiṃ viya **samāpajjantīti** āha “**saṅkhārāna**”ntiādi.

Phalasangamāpatticittanti arahattaṃ anāgāmi phalacittam. “Tato paraṃ bhavaṅgasamaye”ti vuttattā āha “**kiṃ pana...pe... na samuṭṭhāpeti**”ti. **Samuṭṭhāpeti** rūpasamuppādakattā. **Imassāti** nirodham samāpanabhikkhuno. **Sā na samuṭṭhāpeti**ti sā catutthajjhānikā phalasangamāpatti na samuṭṭhāpeti assāsapassāse. Phalasangamāpattiyā catutthajjhānikabhāvo kathaṃ nicchitoti āha – “**kiṃ vā etenā**”tiādi. Vakkhamānākārenapi parihāro hotīti. **Santasamāpattitoti** nirodhasamāpattimeva sandhāya vadati. **Abbohārikā honti** atisukhumasabhāvattā, sañjīvattherassa pubbe samāpattikkhaṇe assāsapassāsā abbohārikabhāvaṃ gacchanti. Tena vuttaṃ “**bhavaṅgasamayenevetaṃ kathita**”nti.

Kiriyamaya ...pe... uppajjatiti kasmā vuttaṃ? Nanu bhavaṅguppattikālampi vitakkavicārā uppajjantevāti? Kiñcāpi uppajjanti, vacīsankhāralakkhaṇappattā pana na hontīti imamatthaṃ dassetuṃ “**kiṃ bhavaṅga**”ntiādi vuttaṃ.

Suññato phassotiādayo saguṇenapi ārammaṇenāti ārammaṇabhūtametaṃ. **Suññatā nāma phalasangamāpatti** niccasukhaattasabhāvato suññattā. “**Suññato phasso**”ti vuttaṃ vuttanayena suññasabhāvattā. **Animittā nāma phalasangamāpatti** rāganimittādīnaṃ abhāvato. **Appaṇihitā nāma phalasangamāpatti** rāgapaṇidhiādīnamabhāvato. Sesam vuttanayameva. Tenāha “**animittappaṇihitesupi eseva nayo**”ti. **Rāganimittādīnanti** ettha **ādi**-saddena saṅkhāranimittassapi saṅgaho daṭṭhabbo. Yadaggena phalasangamāpattisamphasso suññato nāma, tadaggena phalasangamāpattipi suññatā nāma, phassasīsenā pana desanā āgatāti tathā vuttaṃ. Animittappaṇihitesupi eseva nayo.

Āgamaṇaṃ ettha, etāyāti vā āgamanikā, sā eva **āgamaniyā** ka-kārassa ya-kāraṃ katvā. **Vuṭṭhāti** nimittato maggassa uppādanena. **Animittā nāma** niccanimittassa ugghāṇato. Ettha ca vuṭṭhānameva pamāṇaṃ, na pariggahadassanāni. **Appaṇihitā nāma** sukhaṇidhiyā paṭipakkhato. **Suññatā nāma** attadiṭṭhiyā ujupaṭipakkhattā sattasuññatāya sudiṭṭhattā. **Maggo animitto nāma** vipassanāgamanato. **Phalaṃ animittaṃ nāma** maggāgamanato. **Vikappo āpajjeyya** āgamanassa vavathhānassa abhāvena, vipassanāya animittādīnāmālabho avavathhitoti adhippāyo. Tena vuttaṃ “**tasmā**”tiādi. Yasmā pana sā maggavuṭṭhānakāle evarūpāpi hotīti tassa vasena maggaphalānaṃ viya phassassapi pavattirūpattā yathāvutto vikappo anavasariṭi daṭṭhabbaṃ. **Tayo phassā phusanti**ti puggalabhedavasena vuttaṃ. Na hi ekaṃyeva puggalaṃ etasmiṃ khaṇe tayo phassā phusanti. “Tividho phasso phusati”ti vā bhavitabbaṃ. Yasmā pana “nirodhaphalasangamāpattiyā vuṭṭhitassā”tiādi yassa yathāvuttā tayo eva phassā sambhavanti, tassa anavasesaggahaṇavaseneva vuttaṃ “**tayo phassā phusanti**”ti.

Nibbānaṃ viveko nāma sabbasaṅkhāravivittabhāvato. Tasmim viveke ekanteneva ninnapoṇattā eva hi te paṭippassaddhasabbussukkā uttamapurisā catunnaṃ khandhānaṃ appavattiṃ anavasesaggahaṇalakkhaṇaṃ nirodhasamāpattiṃ samāpajjanti.

Dutiyakāmaḥsutavaṇṇanā niṭṭhitā.

7. Godattasuttavaṇṇanā

349. Nesanti appamāṇacetovimutti-ākiñcaññacetovimuttisaññitānaṃ jhānānaṃ. Athopi nānāti ānetvā yojanā. Pharaṇaappamāṇatāya “**appamāṇā cetovimutti**”ti laddhanāmaṃ brahmavihārajjhānanti āha “**bhūmantarato**”tiādi. **Ākiñcaññā cetovimutti**ti ākiñcaññāyatanaññānanti āha “**bhūmantarato**”tiādi. **Vipassanāti** aniccānupassanā, sabbāpi vā. **Pamāṇakaraṇo** nāma yassa sayam uppajjati, tassa guṇābhāvadassanavasena pamāṇakaraṇato.

Pharaṇaappamāṇatāyāti pharaṇavasena appamāṇagocaratāya. **Nibbānampi appamāṇameva** pamāṇagocarānaṃ kilesānaṃ ārammaṇabhāvassapi anāgamanato. **Khalanti** khale pasāritasālisīsādibhaṇḍaṃ. **Kiñcehīti** maddassu. Tenāha “**maddanaṭṭho**”ti. Ārammaṇabhūtaṃ, palibuddhakaṃ vā natthi etassa kiñcananti ākiñcanaṃ, ākiñcaneva **ākiñcaññaṃ**.

Rūpanimittassāti kasiṇarūpanimittassa. **Na gahitāti** sarūpato na gahitā, atthato pana gahitā eva. Tenāha – “**sā suññā rāgenātiādivacanato sabbattha anupavithhāvā**”ti.

Nānāti saddavasena. **Ekatthāti** ārammaṇavasena ārammaṇabhāvena ekasabhāvā. Tenāha “**appamāṇaṃ...pe... ekatthā**”ti. **Ārammaṇavasena**ti ārammaṇassa vasena. Cattāro hi maggā, cattāri phalāni ārammaṇavasena nibbānapaviṭṭhatāya ekatthā ekārammaṇā. **Aññasmiṃ pana ṭhāneti** idaṃ viṣuṃ viṣuṃ gahetvā vuttaṃ appamāṇādi pariyaṃvuttaṃ, nibbānaṃ ārabha pavattanato. Tasmā “**aññasmi**”nti idaṃ tena tena pariyaṃyena tattha tattha āgatabhāvaṃ sandhāya vuttaṃ.

Godattasuttavaṇṇanā niṭṭhitā.

8. Nigaṇṭhanāṭaputtasuttavaṇṇanā

350. Āgatāgamoti vācuggatapariyattidhammo. **Viññātasāsanoti** paṭividdhasatthusāsano. Tenāha “**anāgāmī**”tiādi. **Naggabhogganti** avasanabhāvena naggam, kuṭilajjhāsayatāya bhoggam, tato eva **nissirikaṃ**. Naggatāya hi so rūpena nissiriko, bhoggatāya cittena. **Bhagavato saddhāyāti** bhagavati saddhāya. Tasmim saddahanā okappanā tassa saddhātipi vattabbaṃ labhati. **Gacchāmīti** āgacchāmi, bujjhāmīti attho. Etaṃ nigaṇṭhena pucchitamattamāha.

Kāyaṃ unnāmetvāti kāyaṃ abhunnāmetvā. **Kucchiṃ niharitvāti** piṭṭhiyā ninnamanena kucchiṃ purato niharitvā. **Gīvaṃ** pasāraṇavasena **paggayha** paggahetvā **sabbam disaṃ pekkhamāno**. Sabbamidaṃ nigaṇṭhassa pahaṭṭhākāraddassanattham “idāni samaṇassa gotamassa upari vādaṃ āropetum labbhatī”ti. Tenāha “**vātaṃ vā so**”tiādi. **Sakāraṇāti** yuttisahitā. **Pañhamaggoti** pañhasaṅkhāto vīmaṃsā, evaṃ bhavitabbanti citteneva parivīmaṃsā pañhā. **Eko uddesoti** ekaṃ uddisanaṃ atthassa saṃkhittavacanaṃ. **Veyyākaraṇanti** niddisanaṃ atthassa vicāretvā kathanam. **Evanti** iminā nayena. **Sabbatthāti** sabbesu pañhuddesaveyyākaraṇesu attho vitthārato veditabbo.

Nigaṇṭhanāṭaputtasuttavaṇṇanā niṭṭhitā.

9. Acelakassapasuttavaṇṇanā

351. Alaṃ samattho ariyabhāvāyāti **alamariyo**. Ñeyyajānanaṭṭhena ñānameva paccakkhato dassanaṭṭhena ñānadassanaṃ, soyeva atisaṃyāṭṭhena **ñānadassanaviseso**. Pāvaḷā vuccati ānisadapadeso, taṃ pāvaḷaṃ rajoharaṇattham nipphoṭiyati etāyāti **pāvaḷanipphoṭanā**, morapiñchavatti.

Acelakassapasuttavaṇṇanā niṭṭhitā.

10. Gilānadassanasuttavaṇṇanā

352. Mattarājā nāma eko bhummadevo bhūtādhipati surāpotalarukkhanivāsī. Tena vuttaṃ “**mattarājakāle**”ti. “**Osadhitiṇavanappatisū**”ti vatvā te yathākkamaṃ dassento “**harītakā...pe... rukkhesu cā**”ti āha. **Patthanāvasena** cittaṃ **ṭhapehi**. **Samijjhissatīti** yathādhippāyaṃ samijjhissati. **Tena hīti** yasmā taṃ devāpi āsannamaraṇaṃ maññanti, tasmā sā vameva bhavissati, taṃ tumhākaṃ dīgharattaṃ hitāya sukhāya bhavissatīti adhippāyo.

Gilānadassanasuttavaṇṇanā niṭṭhitā.

Cittasamīyuttavaṇṇanā niṭṭhitā.

8. Gāmaṇisaṃyuttaṃ

1. Caṇḍasuttavaṇṇanā

353. “Yena midhekacco caṇḍo caṇḍotveva saṅkhaṃ gacchatī”ti evaṃ pañhapucchanena dhammasaṅgāhakattherehi **caṇḍoti gahitanāmo. Pākaṭaṃ karotīti dasseti** attano caṇḍabhāvaṃ.

Caṇḍasuttavaṇṇanā niṭṭhitā.

2. Tālapuṭasuttavaṇṇanā

354. Vāloti vuccati tālo, tassa tālapuṭaṃ nāma. Yathā āmalakīphalasaṃnākaṃ, so pana tālasadisamukhavaṇṇattā **tālapuṭoti evaṃnāmaḥko**. Tenāha “**tassa kirā**”tiādi. **Abhinīhārasaṃpanno** anekesu kappesu sambhataśāvaka bodhisambhāro. Tathā hesa asītiyā mahāsāvakesu abbhantaro jāto. **Sahassaṃ denti** naccaṃ passitukāmā. **Samajjavesanti** nepaccavesaṃ. **Kīlaṃ katvāti** naccakīlitaṃ kīlitaṃ, naccitvāti attho.

Pubbe tathāpavattavuttantadassane **saccena**, tabbipariyāye **alikeṇa. Rāgapaccayāti** rāgupattiyā kāraṇabhūtā. **Mukhato...pe... dassanādayoti ādi-**saddena mukhato aggijālanikkhamadassanādi ke saṅgaṇhāti. **Aññe ca...pe... abhinayāti** kāmassādasamuyuttānaṃ siṅgārahassaabbhutarasānañceva “aññe cā”ti vuttasantaḥbhaccharasānañca dassanakā abhinayā. **Dosapaccayāti** dosuppattiyā kāraṇabhūtā. **Hatthapādacchedādīti ādi-**saddena saṅgahitānaṃ ruddavīrabhayānakarasānaṃ dassanakā abhinayā. **Mohapaccayāti** mohuppattiyā kāraṇabhūtā. **Evamādayoti ādi-**saddena saṅgahitānaṃ karuṇāsantabhayānakarasānaṃ dassanakā abhinayā. Te hi rase sandhāya pāḷiyāṃ “ye dhammā rajanīyā, ye dhammā dosanīyā, ye dhammā mohanīyā”ti ca vuttaṃ.

Naṭavesaṃ gahetvāva paccanti kammaśarikkhaviṇṇāpākaśasena. **Taṃ sandhāyāti** taṃ yathāvuttaṃ niraye paccanaṃ sandhāya. **Etaṃ** “pahāso nāma nirayo, tattha upapajjati”ti **vuttaṃ**. Yathā loke atthavisesavaśasena sakamma kānīpi paḍāni akamma kānī bhavanti “vimuccati puriso”ti, evaṃ idha atthavisesavaśasena akamma kaṃ sakamma kaṃ katvā vuttaṃ – “**nāhaṃ, bhante, etaṃ rodāmi**”ti. Ko pana so atthaviseso? Asahanaṃ akkhamanaṃ, tasmā **na rodāmi** na sahaṃmi, na akkhamāmi attho. Rodana kāraṇaṃ hi asahanto tena abhibhūto rodati. Tamevassa sakamma kabhāvassa kāraṇabhūtaṃ atthavisesaṃ “**na assuvimocanamattenā**”ti vuttaṃ. **Mataṃ vā, amma, rodanti**ti etthāpi mataṃ rodanti, tassa maraṇaṃ na sahanti, nakkhamanti ti pākaṭoyamattho.

Tālapuṭasuttavaṇṇanā niṭṭhitā.

3-5. Yodhājīvasuttādivaṇṇanā

355-357. Yujjhanaṃ yodho, so ājīvo etassāti **yodhājīvo**. Tenāha – “**yuddhena jīvikaṃ kappanako**”ti, **ussāhaṃ vāyāmaṃ karotīti** yujjhanavaśasena ussāhaṃ vāyāmaṃ karoti. **Pariyāpādentīti** maraṇapariyantikaṃ āpadaṃ pāpenti. Tenāha “**marāṇaṃ paṭipajjāpentī**”ti. **Duṭṭhu ṭhapitanti** duṭṭhākāreṇa attano paresaṅga atthāvahabhāvaṃ na gataṃ paṭipannaṃ. Parehi saṅgāme jītā hatā ettha jāyanti ti **parajito nāma nirayo**. Asidhanugadāyasaṅkucakkāni **pañcāvudhāni. Taṃ sandhāyāti** taṃ yodhājīvaṃ puggalaṃ sandhāya. **Etaṃ** “yo so”tiādi **vuttaṃ. Catutthapañcamesūti** hatthārohaassaśrohasuttasu. **Eseva nayoti** eso tatiye vutto eva atthato viśesābhāvato.

Yodhājīvasuttādivaṇṇanā niṭṭhitā.

6. Asibandhakaputtasuttavaṇṇanā

358. **Pacchābhūmivāsino**ti aparadesavāsino. **Udakaśuddhikabhāvajānanatthāyāti** attano

udakasuddhikabhāvaṃ jānanatthañceva lokassa ca udakena suddhi hotīti imassa atthassa jānanatthañca. **Upari yāpentīti** upari brahmalokaṃ yāpenti. **Sammā nāpentīti** sammā ujukaṃyeva saggamaṃ lokaṃ gamenti. Tenāha – “**saggamaṃ nāma okkāmenti**”ti, avakkāmenti ogāhāpentīti attho. **Anuparigaccheyyāti** anuparito gaccheyya.

Asibandhakaputtasuttavaṇṇanā niṭṭhitā.

7. Khettūpamasuttavaṇṇanā

359. Thaddhanti kathinaṃ lūkhaṃ. **Ūsaranti** ūsajātaṃ. Catūhipi oghehi anabhibhavanīyatāya **ahaṃ dīpo**. Sabbaparissayehi anabhibhavanīyatāya **ahaṃ leṇo**. Sabbadukkhaparittāsanato tāyanaṭṭhena **ahaṃ tānaṃ**. Sabbabhayaḥimsanato **ahaṃ saraṇanti** yojetabbaṃ.

Udakamaṇikoti mahantaṃ udakabhājanaṃ. Bahi vissandanavasena udakaṃ na haratīti **ahārī**, parito na paggharatīti **aparihārī**. **Sakkaccameva desenti** saddhammagāravassa sabbasattesu mahākaruṇāya ca buddhānaṃ samānarasattā. **Catasso pana parisā** sathhugāravena attano ca saddhāsampannatāya **saddahitvā okappetvā suṇanti**, tasmā tā desanāphalena yujjanti. Kiccāsiddhiyā sattu desanā tattha **sakkaccadesanā nāma jātā**.

Khettūpamasuttavaṇṇanā niṭṭhitā.

8. Saṅkhadhamasuttavaṇṇanā

360. “Yo koci puriso pāṇātipātī musāvādī, sabbo so āpāyiko”ti vatvā puna “yaṃbahulaṃ yaṃbahulaṃ karoti, tena duggatiṃ gacchatī”ti vadanto **attanāva attano vādaṃ bhindati**. **Evaṃ santeti** yadi bahuso katena pāpakammaṃ āpāyiko, “yo koci pāṇamatipātetī”tiādivacanāṃ micchāti. **Cattāri padānīti** “yo koci pāṇamatipātetī”tiādinā nayena vuttā cattāro atthakoṭṭhāsā. **Diṭṭhiyā paccayā honti** “atthi kho pana mayā”tiādinā ayoniso ummujjantassa. **Balasampannoti** samattho. **Saṅkhadhamakoti** saṅkhassa dhamanacice cheko. **Adukkhenāti** sukhena. **Upacāropi appanāpi vaṭṭati** ubhinnaṃ sāmāññavacanabhāvato. Appamāṇakatabhāvo labbhateva. Tathā hi taṃ kilesānaṃ vikkhambhanasamatthatāya dīghasantānatāya vipulaphalatāya ca “**mahaggata**”nti vuccati.

Na ohīyatīti yasmim santāne kāmāvacarakammaṃ, mahaggatakammañca katūpacitaṃ vipākādāne laddhāvasaraṃ hutvā ṭhitāṃ, tesu kāmāvacarakammaṃ itaraṃ nīharitvā sayāṃ tattha ohīyitvā attano vipākaṃ dātuṃ na sakkoti, mahaggatakammameva pana itaraṃ paṭibāhitvā attano vipākaṃ dātuṃ sakkoti garubhāvato. Tenāha “**taṃ kāmāvacarakamma**”ntiādi. **Kilesavasenāti** pāpakammaṃ mūlabhūtakilesavasena. Pāṇātipātādayo hi dosamohalobhādīmūlakilesasamuṭṭhānā. **Kilesavasenāti** vā kammakilesavasena. Vuttañhetā – “pāṇātipāto kho, gahapatiputta, kammakilesa”tiādi (dī. ni. 3.245). **Yathānusandhināva gatanti** yathānusandhisāṅkhātaanusandhinā osānaṃ gataṃ saṃkilesasammukhena uṭṭhitāya vodānadhamavasena niṭṭhāpitattā.

Saṅkhadhamasuttavaṇṇanā niṭṭhitā.

9. Kulasuttavaṇṇanā

361. Evaṃ pavattañhitikāti evaṃ dvidhā pavattañhitikā. **Dvīhitikā** dukkarajīvikapayogā. Salākamattaṃ vuttaṃ etthāti **salākā vuttā**, purimāpade uttarapadalopo. **Ubhatokoṭṭikanti** yadi “kulānudayaṃ na vaṇṇemī”ti vadati, “bhūtā nikkaruṇā samaṇa tumhe”ti vādaṃ āropehi. Atha sabbadāpi “kulānudayaṃ vaṇṇemī”ti vadati. Evaṃ sante “kasmā evaṃ dubbhikkhe kāle mahatīyā parisāya parivuto janapadacārikaṃ carantā kulūpacchedāya paṭipajjathā”ti evaṃ ubhatokoṭṭikaṃ vādaṃ

āropehīti gāmaṇiṃ uyyojesi.

Dve anteti ubho koṭṭiyo. **Bahi nīharitunti** na vaṇṇemi vaṇṇemīti dve ante mocento taṃ pucchitamattaṃ **bahi nīharati** nāma. Tattha dosaṃ datvā codento taṃ apuccham karonto gilitvā viya anto **paveseti** nāma.

Ito so gāmaṇītiādi attano bhikkhūnaṃ aññesañca atthakāmānaṃ bhikkhappadānena aniṭṭhappattiabhāvadassanattaṃ āradḍham. **Dānena sambhūtānīti** dānamayena puññakiriyavatthunā sammadeva bhūtiṃ vaḍḍhiṃ pattāni. Saccena ariyavohārena sammadeva bhūtāni uppannāni **saccasambhūtānīti** āha “**saccaṃ nāma saccavādītā**”ti. **Sesasilanti** aṭṭhavidhaariyavohārato aññasīlaṃ. **Nihitanti** tasmim kule pubbapurisehi nidhānabhāvena nihitaṃ. **Duppayuttāti** kasivāṇijjādivasena duṭṭhu payuttā kammantā. **Vipajjantīti** nassanti. **Kulaṅgāroti** kulassa aṅgārasadiso vināsakapuggalo. **Aniccatāti** maraṇaṃ. Tasmim kule padhānapurisānaṃ bhogānaṃ vā sabbaso vināso. Tenāha “**hutvā abhāvo**”tiādi.

Kulasuttavaṇṇanā niṭṭhitā.

10. Maṇicūlakasuttavaṇṇanā

362. Taṃ parisanti taṃ rājantepure nisinnaṃ rājaparisaṃ. **Nayaggāheti** kutocipi asutvā kevalaṃ attano eva matiyā nayaggahaṇe ṭhatvā.

Kāretuṃ vaṭṭati sati sambhave paṭisankhārassa, senāsanavināso na ajjupekkhitabboti adhippāyo. Attano ettha kiccāvasāne yaṃ gihīnaṃyeva santakaṃ tāvakālikaṃ, taṃ gihivikantanti āha “**gihivikataṃ katvā**”ti. **Na vadāmi** pabbajjitāsāruppato.

Maṇicūlakasuttavaṇṇanā niṭṭhitā.

11. Bhadrakasuttavaṇṇanā

363. Evaṃnāmaketi mallā nāma jānapadino rājakumārā, nesam nivāsātāya “mallā”icceva bahuvacanavasena laddhanāmattā evaṃnāmake janapade. Natthi etassa pattiyā kālantarasaññito kālotti **akālo**, so eva **akāliko**. Tenāha – “**kālaṃ anatikkamitvā pattenā**”ti. So pana “yaṃkiñci dukkhaṃ uppajjamānaṃ uppajjati, sabbaṃ taṃ chandamūlaka”nti evaṃ vutto dukkhassa chandamūlabhāvo, evaṃ chandamūlakassa dukkhassa kathitattā “**imasmim sutte vaṭṭadukkhāṃ kathita**”nti vuttaṃ.

Bhadrakasuttavaṇṇanā niṭṭhitā.

12. Rāsīyasuttavaṇṇanā

364. Rāsīm katvā mārapāsavasena, tatrāpi antarabhedena vibhajitvā pucchitabbapañhe ekato rāsīm katvā. Tapanam attaparitāpanam tapo, so etassa atthīti tapassī, taṃ **tapassim**. So pana taṃ tapanam nissāya ṭhito nāma hotīti vuttaṃ “**tapanissitaka**”nti. So pana anekākārabhedena lūkhāṃ pharusam jīvanasīlattā **lūkhajīvī nāma**. Tenāha “**lūkhajīvika**”nti. Majjhimāya paṭipattiyā uppathabhāvena avaniyā gandhabbāti **antā**, tato eva lāmakattā **antā**. Lāmakampi “anto”ti vuccati “antamidaṃ, bhikkhave, jīvikānaṃ (itivu. 91; sam. ni. 3.80), eko anto”ti evamādīsu (sam. ni. 2.15; 3.90). Aṭṭhakathāyaṃ pana aññamaññaādharabhāvaṃ urīkatvā “**koṭṭhāsā**”ti vuttaṃ. Hīno gāmoti pāḷi. Gāma-saddo hīnapariyāyoti adhippāyenāha “**gāmmo**”ti. Gāme bhavoti **gāmmo**. **Gāma**-saddo cettha gāmaṃvāsivisayo “gāmo āgato”tiādīsu viya. Aṭṭhakathāyaṃ pana “**gāmaṃvāsīnaṃ dhammo**”ti vuttaṃ, tesam cārittanti attho. **Atta**-saddo idha sarīrapariyāyo “attantapo”tiādīsu viyāti āha “**sarīradukkhakaraṇanti attho**”ti.

Etthāti etasmim tapanissitagarahitabbapade kasmā antadvayamajjhimaṭṭipadāgahaṇaṃ? Attakilamathānuyogo tāva gayhatu idamatthitāyāti adhippāyo. Kāmabhogītapanissitakanijaravatthūnaṃ dassane yathādhippetassa atthassa vibhajitvā kathanaṃ sambhavatīti te dassetvā adhippetattho kathito.

Tamatthanti yo “kāmabhogītapanissitakesu garahitabbeyeva garahati, pasamsitabbeyeva ca pasamsatī”ti vutto attho, tamatthaṃ pakāseto. **Sāhasikakammenāti** ayuttena kamma. **Dhammena ca adhammena cāti** dhammikenā adhammikenā ca. Ayoniso pavattaṃ bāhirakaṃ sandhāya codako “**katha**”ntiādīmāha. Itaro nayidaṃ tādisaṃ attaparitāpanaṃ adhippettaṃ, atha kho yoniso pavattaṃ sāsanikamevāti dassento “**caturaṅgavīriyavasena cā**”ti āha. Tatha “kāmaṃ taco ca nhāru ca aṭṭhi ca avasissatū”tiādīnā (ma. ni. 2.184; saṃ. ni. 2.22.237; a. ni. 2.5) nayena vuttā sarīrenirapekkhavipassanāya ussukkāpanavasena pavattā vīriyabhāvanā “caturaṅgavīriyavasena”ti vuttā. Tathā abbhokāsikanesaṃjīkatapādinissitāva kilesanimmathanayogyā vīriyabhāvanā “**dhutaṅgavasena cā**”ti vuttāti. Ariyamaggena nissesakilesānaṃ pajāhanā **nijjarā**. Sā ca attapaccakkhatāya sandiṭṭhikā tiṇṇaṃ mūlakilesānaṃ pajāhanena “**tisso**”ti ca vuttā. Tenāha “**ekopi**”tiādi.

Rāsiyasuttavaṇṇanā niṭṭhitā.

13. Pāṭaliyasuttavaṇṇanā

365. “Māyañcāhaṃ pajānāmī”ti vacanaṃ kāmaṃ tesam māyāvībhāvadassanaparam, bhagavato pana māyāsātheyyādikassa sabbassa pāpadhammassa bodhimūle eva setughāto, tasmā sabbaso pahīnamāyo, sabbaññutāya māyaṃ aññe ca ñeyye sabbaso jānāti. Tena vuttaṃ “**māyañcāhaṃ, gāmaṇi, pajānāmī**”tiādi. **Māyañca pajānāmīti** na kevalamahaṃ māyaṃ eva jānāmi, atha kho aññampi idañcīdañca jānāmīti.

Itthikāmeḥīti itthīhi ceva tadaññakāmeḥi ca. **Ekasmim ṭhāneti** ekasmim padese. **Eekasseva** āgantukassa gahaṭṭhassa vā pabbajitassa vā. **Sattianurūpenāti** vibhavasattianurūpena. **Balānurūpenāti** parivārabalānurūpena. **Sattianurūpenāti** vā saddhāsattianurūpena. **Balānurūpenāti** vibhavabalānurūpena. Dhammesu samādhī dasakusaladhammesu samādhānaṃ. Aggahitacittatā pariyuṭṭhakāritā. Tena lokiyasīlavisuddhi diṭṭhivissuddhi ca vuttā. Tathā cāha – “ko cādi kusalānaṃ dhammānaṃ, sīlañca suvisuddhaṃ diṭṭhi ca ujukā”ti (saṃ. ni. 5.369). Tatha patiṭṭhitassa upari kattabbaṃ dassetuṃ “**dhammasamādhismim ṭhito**”tiādi vuttaṃ. **Ayaṃ paṭipadāti** tassa kammaphalavādino satthu vacanaṃ sabbesañca ayaṃ mayhaṃ sīlasaṃvarabrahmavihārabhāvanāsāṅkhātāpaṭipadā anaparādhakatāya eva saṃvattati. **Jayaggāhoti** ubhayathāpi mayhaṃ kāci jāni natthi.

Pañca dhammā dhammasamādhī nāma, vipassanāmaggaphaladhammamattaṃ vā. Tatiyavikappe sīlādivissuddhiyā saddhim brahmavihārā yathāvuttatīvidhadhammāvahattā **eva dhammasamādhī nāma**. **Pūrentassa uppannā cित्tekaggatāti** vuttakhaṇikacittakaggatā. Sāpi cittaṃ samādhānato “cittasamādhī”ti vuttā, tassa paṭipakkhaṃ vikkhambhantī samucchindantī ca hutvā pavattā yathāvuttasamādhī eva visesena **cittasamādhī nāma**.

Pāṭaliyasuttavaṇṇanā niṭṭhitā.

Gāmaṇisaṃyuttavaṇṇanā niṭṭhitā.

9. Asāṅkhatasaṃyuttaṃ

1. Paṭhamavaggo

1-11. Kāyagatāsatisuttādivaṇṇanā

366-376. Asaṅkhatanti na saṅkhatam hetupaccayeti. Tenāha “**akata**”nti. **Hitam esantenāti** mettāyantena. **Anukampamānenāti** karuṇāyantena. **Upādāyāti** ādiyitvāti ayamatthotiāha “**cittena pariggahetvā**”ti. **Aviparītadhammadesanāti** aviparītadhammassa desanā, paṭipattimpi sāvakā viya garuko bhagavā. **Dāyajjam** attano adhiṭṭhitam niyyātetī.

Bhikkhāsampattikālādīnaṃ sattannaṃ sappāyānaṃ sampattiyā labbhanakāle. Vipattikāle pana ettha vuttavipariyāyena attho veditabbo. **Bhāriyanti** dukkhabahulatāya dāruṇam. **Amhākam santikā** laddhabbā. **Tumhākam anusāsanī** tumhākam dātabbā anusāsanī.

Kāyagatāsatisuttādivaṇṇanā niṭṭhitā.

2. Dutiyavaggo

23-33. Asaṅkhatasuttādivaṇṇanā

377-409. Tattha ca natthi ettha taṇhāsāṅkhātāṃ nataṃ, natthi etasmim vā adhigate puggalabhāvoti **anataṃ**. **Anāsavanti** etthāpi eseva nayo. Saccadhammatāya **saccam**. Vaṭṭadukkhato pārametīti **pāram**. **Saṅhaṭṭhenāti** sukhumatṭhena nipuṇam. Tato eva **duddasatāya**. **Ajajjam** nicasabhāvattā. Natthi etassa nidassananti vā **anidassanam**. Etasmim adhigate natthi saṃsāre. Papañcanti vā **nippapañcam**.

Etasmim adhigate puggalassa maraṇam natthīti vā **amataṃ**. Atappakaṭṭhena vā **pañitam**. Sukhahetutāya vā **sivam**. Taṇhā khīyanti etthāti **taṇhakkhayaṃ**.

Aññassa tādisassa abhāvato vimhāpanīyatāya **abhūtamevāti**. Kutoci paccayato anibbattameva hutvā **bhūtam** vijjamānaṃ. Tenāha “**ajātam hutvā atthī**”ti. Natthi ettha dukkhanti niddukkham, tassa bhāvo **niddukkhattam**. Tasmā **anītikam** itirahitam. Vānaṃ vuccati taṇhā, tadabhāvena **nibbānam**. Byābajjham vuccati dukkham, tadabhāvena **abyābajjham**. Paramatthato saccato suddhibhāvena. Kāmā eva puthujjanehi allīyitabbato **ālayā**. Esa nayo sesesupi. **Patitṭhaṭṭhenāti** patitṭhābhāvena vaṭṭadukkhato muccitukāmānaṃ dipasadisam oghehi anajjhottharaṇīyattā. **Allīyitabbayuttatṭhenāti** allīyitum arahabhāvato. **Tāyanaṭṭhenāti** sapatatāyanaṭṭhena. **Bhayasaraṇaṭṭhenāti** bhayassa hiṃsanaṭṭhena. **Seṭṭham** uttamam. **Gatīti** gandhabbaṭṭhānaṃ.

Asaṅkhatasuttādivaṇṇanā niṭṭhitā.

Asaṅkhatasamṃyuttavaṇṇanā niṭṭhitā.

10. Abyākatasamṃyuttam

1. Khemāsuttavaṇṇanā

410. Bimbisārassa upāsikāti bimbisārassa orodhabhūtā upāsikā. **Paṇḍiccam** sikkhitabhāvena. **Veyyattiyam** visāradabhāvena. **Visāradā** nāma tihetukapaṭṭisandhisiddhasābhāvikapaññā, tāya samannāgatā.

Acchiddakagaṇanāya kusaloti navantagaṇanāya kusalo. **Aṅgulimuddāya gaṇanāya kusaloti** aṅgulikāya eva gaṇanāya kusalo seyyathāpi pādasikā. **Piṇḍagaṇanāyāti** saṅkalanapaṭṭuppannakārino piṇḍavasena gaṇanā. **Tathāgatoti** khīṇāsavo, tathāgataṃ sandhāya pucchatīti khīṇāsavoti cassa arahattaphalavasibhāvitakhandhe upādāya ayam paññatti hoti. Tesu khandhesu sati khīṇāsavā

sattasaṅkhātā hontīti vohārena paññāpetuṃ sakkā bhaveyya, asantesu na sakkā, tasmā paraṃ maraṇāti vuttattā tesam abhāvā “**abyākatameta**”nti vuttaṃ. Yadi evaṃ tesam abhāvato “na hoti tathāgato paraṃ maraṇā”ti puṭṭhāya “āmā”ti paṭijānitabbā siyā, taṃ pana sattasaṅkhātassa pucchitattā na paṭiññātanti daṭṭhabbaṃ. **Yena rūpenāti** sattatathāgate vuttarūpaṃ sabbaññutathāgate paṭikkhipituṃ “**taṃ rūpa**”ntiādi vuttaṃ. **Yaṃ upādāyāti** yaṃ khandhapañcakam upādāya. **Tadabhāvenāti** tassa khandhapañcakassa abhāvena. **Tassā paññattiyāti** sattapaññattiyā abhāvaṃ. Niruddhaṃ na nidasseti.

Khemāya theriyā vuttaṃ paṭhamam suttaṃ bhagavato seṭṭhatthadīpanato aggapadāvacaramva hotīti vuttaṃ “**aggapadasmi**”nti.

Khemāsuttavaṇṇanā niṭṭhitā.

2. Anurādhasuttavaṇṇanā

411. **Idha** saḷāyatanavagge saṅgāyanavasena saṅgītikārehi vuttaṃ.

3-8. Paṭhamasāriputtakotṭhikasuttādivaṇṇanā

412-417. **Rūpamattanti** ettha **matta**-saddo visesanivattiattho. Ko pana so visesoti? Yo bāhiraparikkappito idha tathāgatoti vuccamāno attā. **Anupalabbhiyasabhāvoti** anupalabbhiyattā.

Paṭhamasāriputtakotṭhikasuttādivaṇṇanā niṭṭhitā.

9. Kutūhalasālāsuttavaṇṇanā

418. **Nānāvidhanti** taṃtaṃdiṭṭhivādapaṭisaṃyuttaṃ aññampi vā nānāvidhaṃ tiracchānakathaṃ. Bahūnaṃ kutūhaluppattiṭṭhānatoti yojanā. **Yāva ābhassarabrahmalokā gacchatīti** agginā kappavuṭṭhānakāle gacchati, taṃ sandhāya vuttaṃ. **Imaṅca kāyanti** imaṃ rūpakāyaṃ. **Cuticcittena nikkhipatīti** cuticcittena bhijjamānena nikkhipati. Cuticcittassa hi oraṃ sattarasamassa cittassa uppādakkhaṇe uppannaṃ kammajarūpaṃ cuticcittena saddhiṃ nirujjhati, tato paraṃ kammajarūpaṃ na uppajjati. Yadi uppajjeyya, maraṇaṃ na siyā, cuticcittaṃ rūpaṃ na samuṭṭhāpeti, āhārajassa ca asambhavo eva, utujaṃ pana vattateva. Yasmā paṭisandhikkhaṇe satto aññatarāṇāya upapajjati nāma, cutikkhaṇe paṭisandhicittaṃ aladdhaṃ aññatarāṇāya, tasmā vuttaṃ “**cutikkhaṇe...pe... hotī**”ti.

Kutūhalasālāsuttavaṇṇanā niṭṭhitā.

10. Ānandasuttavaṇṇanā

419. **Tesam laddhiyāti** tesam sassatavādānaṃ laddhiyā saddhiṃ **etaṃ** “atthattā”ti vacanaṃ ekaṃ abhavissa. Tato eva anulomaṃ taṃ nābhavissa ñāṇassāti asāraṃ etanti adhippāyo. **Api nu metassāti** me etassa anattāti vipassanāñāṇassa anulomaṃ api nu abhavissa, vilomakameva tassa siyāti attho.

Ānandasuttavaṇṇanā niṭṭhitā.

11. Sabhiyakaccānasuttavaṇṇanā

420. Yassapa’ssāti pāṭhassa ayaṃ piṇḍattho “āvuso”tiādi. Tatthāyaṃ sambandho – āvuso, yassapi puggalassa tīṇi vassāni vuṭṭho, ettakena kālena “hetumhi sati rūpītiādi paññāpanā hoti, asati na hotī”ti ettakaṃ byākaraṇaṃ bhaveyya, tassa puggalassa ettakameva bahu, ko pana vādo atikkante! Ito atikkante dhammadesanānāyeva vādoyeva vattabbameva natthīti therassa pañhabyākaraṇaṃ sutvā paribbājako

pītisomanassaṃ pavedesi.

Sabhiyakaccānasuttavaṇṇanā niṭṭhitā.

Abyākatasamyuttavaṇṇanā niṭṭhitā.

Sāratthappakāsiniyā saṃyuttanikāya-aṭṭhakathāya

Salāyatanavaggavaṇṇanāya līnatthappakāsanā samattā.